












1000 1000 1000




Digitized by the Internet Archive
in 2016

<https://archive.org/details/lendimion00gomb>







L'ENDIMION
DE
GOMBAULD

A PARIS.

Avec Privilège du Roy. M D C XXIII. C de Pas se

Chez NICOLAS EVON rue Saint-Jacques
à l'enseigne S' Claude & de L'homme Sauvage.



A LA REYNE!



ADAME,

On peut dire aujourd'huy
d'Endymion, que la Lune
l'auoit endormy, & que le
à y

Soleil le resueille : puis que les
commandemens de vostre Ma-
jesté l'obligent de reuoir le jour;
Et qu'il n'y auoit plus desormais
pour luy de sommeil si profond
qui ne fust mille fois interrompu
du bruit de vostre gloire. Mais
bien que ses yeux soient de long
temps accoustumez à la contem-
plation des plus beaux Astres;
j'aurois tout sujet de craindre
qu'il ne peust que fort mal-aisé-
ment subsister deuant vostre lu-
miere : Si ie n'estois d'ailleurs
tout asseuré que la Vertu n'of-
fense jamais ceux qui la seruent,
Et qui l'adorent : Et que vostre
Majesté qui la représente en
toutes choses, nous faict aussi

bien voir, toutes les fois que nous
luy rendons la soumission, & la
reuerence qui luy est deuë, qu'elle
n'est point neë pour nostre con-
fusion, ny pour nostre perte, mais
pour le bon-heur, & pour la feli-
cité du monde. Je ne sçay quelle
douceur tempere si fauorable-
ment tout ce que la grandeur qui
l'environne a d'esclat, & de vio-
lence, que les yeux mesmes de
ceux qui la regardent, au lieu
d'en estre esblouys, en deuiennent
plus clairs, & trouuent en la pre-
sence de tant de perfections, &
de merueilles, leur souverain bien
& leurs delices. Je dirois aussi,
Madame, que les esprits en sont
inspirez, s'ils n'estoient tellement

rauis en eux-mesmes, qu'ils
sentent ce qu'ils ne peuvent ja-
mais dire; & que les signes seu-
lement de l'admiration, & de
l'estonnement qu'ils en tesmoi-
gnent, sont les plus viues images
de leurs pensees, & les plus forts
traicts de leur eloquence. Puis
qu'il est ainsi, Madame, que
les qualitez qui reluysent en
vostre Majesté, sont du tout es-
loignees de la comparaison des
choses mortelles, & des termes
dont nous auons accoustumé de
les exprimer; J'ayme beaucoup
mieux confesser ma foiblesse,
que de voir accuser ma teme-
rité, si l'extrême desir que j'ay
de contribuer quelques traicts


à sa loüange ; me faisoit parler trop humainement , d'une chose veritablement diuine. Je n'ay donc plus rien à dire , sinon , que mon obeysance me doit obtenir par tout le monde , toute l'excuse que ie scaurois desirer pour Endymion , & pour moy-mesme : Et que vostre Majesté , Madame , (afin que ie finisse comme i'ay commencé) donnant le jour à cet ouvrage , fait bien voir que la Lune , en quelque façon que ce soit , doit tousiours sa lumiere au Soleil : Et moy tout ce que ie suis capable d'employer de soin , & d'industrie , pour me rendre plus digne des com-

mandemens dont vostre Ma-
jesté daigne gratifier,

MADAME,

Son tres-humble , tres-
obeyssant , & tres-
fidele sujet , & ser-
uiteur,

GOMBAULD.



AV LECTEUR.



Il n'y a point de maistresse au monde qui face plus de jaloux que la Gloire: Mais ce n'est pas à ceux qui la possèdent véritablement qu'elle donne le plus d'ombrages. Je ne sçay quels esprits presomptueux, à qui son trosne, & son temple, sont pour jamais inaccessibles, & qui pour ne la cognoistre point, prennent ordinairement la Vanité pour elle, s'opposent indifféremment à tout ce qui luy veut rendre quelque hommage: Et bien qu'ils n'ayent ny l'art, ny l'industrie de luy dresser des monumens, ny des Autels qui luy soient agreables, ils s'employent laschement à destruire les edifices des autres; ou s'ils n'ont pas assez de force pour cet effect, à tout le moins ils taschent autant qu'il leur est possible de les descrire par leur censure, & par leur

mesdisance. Mais entre tous les hommes qui sont possédez de la presumption, & de l'enuie, & à qui la trop grande amour, & la trop bonne opinion qu'ils ont d'eux mesmes en a fait perdre la cognoissance, il ne s'en trouue point de plus vains, ny de plus insupportables que la pluspart de ceux qui se messent d'escrire. Et bien que le plus souuent ils s'en acquittent si mal, qu'ils semblent n'auoir d'autre dessein que de declarer leur impertinence à tout le monde, & ne faire de gros volumes, que de peur qu'on n'en doute; si est-ce qu'ils ne font rien qu'ils ne croient digne d'estre recueilly dans les Fastes de la Memoire & de la Renommée; & qu'ils ne consacrent incontinent à l'Idole de leur vanité. Mais comme ils ne sortent iamais hors de l'admiration d'eux-mesmes; c'est leur faire vne grande violence que de les obliger d'entendre l'estime qu'on fait des autres: Ils ne peuuent souffrir sans beaucoup d'impatience qu'on loue personne, non pas mesmes leurs semblables; car ils n'en croient point auoir.

Il y a quelques années qu'un de mes

amis ayant fujet de se plaindre d'une des plus grandes beautez du monde, en qui l'on ne ſçauroit trouuer rien à redire que le ſeul changement qu'il deſiroit luy reprocher par mes paroles : j'eſcriuis en ſa faueur cette petite aduventure, eſtant eſgalement preſſé de l'occaſion qui ſe preſentoit de la faire voir, & de l'impatience qu'il auoit de ſe plaindre. Et afin d'en faire mieux lire la plainte, & de la rendre plus agreable, ie me reſolus d'en deſguiſer quelque peu la verité ſoubs la fable d'Endymion, & de la Lune. Mais il y a beaucoup de difference d'un liure qu'on veut expoſer au jugement de tout le monde, & d'un petit discours qui n'eſt fait à d'autre fin que pour eſtre leu ſeulement vne fois d'une perſonne qu'on reſpecte, & pour luy representer de meilleure grace ce que la bouche n'oſeroit dire, & ce qu'une lettre ne ſçauroit comprendre. Si bien que ie fus tout eſtonné de voir que l'amitié des vns, & l'autorité des autres, me preſſoient eſgalement de le mettre au iour, & ne ſe laſſoient iamais de me le faire lire : & puis il faut ſi neceſſairement

obeir à la volonté des Dames, qu'on n'en peut auoir dispense par aucune sorte de raison ny d'excuse. Toutes ces choses me donnoient si peu de repos, qu'une fois il me prit fantaisie de l'abandonner aux injures du siecle, sans y mettre mon nom, & sans luy donner d'autre sauf-conduit que ces vers.

*Je ne suis fait que pour Diane,
Et mystereux, ou profane,
On me voit mal-gré mon auteur,
Qui n'a soucy, ny qu'on le nomme,
Ny d'en obliger un seul homme,
Ny de s'excuser au Lecteur.*

Toutesfois si tost que ie l'eus considéré tant soit peu, moy qui pour trop le lire aux autres, n'auois pas le courage de le lire pour moy-mesme, i'eus bien tost changé d'opinion, quand ie vis que pour l'auoir fait trop promptemēt, il ny auoit presque point d'esperance de le rendre meilleur, & qu'il me seroit plus expedient de le refaire tout entier, que d'en corriger vne partie. Cependant l'occasion de s'en seruir estoit perduë: Endymion luy mesme ne s'en soucioit plus, & Diane encores moins que personne

du monde: tellement que sans la puissance absolue qui la resueillé, i'estois résolu de le laisser dormir eternellement. Et certes ceux qui sont tant soit peu clairuoyans au mestier, ne distingueront que trop la simplicité dont ma negligence l'auoit habillé la premiere fois, d'auec les fleurs, & les guirlandes, dont la necessité de le faire voir a depuis obligé mon soin de le parer. Mais bien qu'en cela ie fusse le moins satisfait de moy-mesme; & que ie l'aye tousiours estimé beaucoup moindre que sa renommée; si est-ce qu'il n'a pas laissé d'exciter la jalousie de quelques vns qui s'imaginent estre les seuls arbitres & dispensateurs de la gloire, & qui ne pensent point qu'elle puisse estre legitimement donnée à personne, que par leurs jugemens, & par leurs suffrages. Son nom mesme leur estoit si peu supportable, qu'à l'extrême passion qu'ils eussent eue de faire vn sacrifice à Vulcan, il ne leur restoit plus que d'auoir Endymion pour victime. En fin comme ils ont veu que c'estoit s'accuser soy-mesme que de s'opposer indiscrettement à l'approbation

commune, qu'il ne laissoit pas d'auoir
acquise, encore qu'il ne l'eust point me-
ritée. A tout le moins me croyans tou-
ché comme eux de la maladie incur-
able de faire des liures, ils ont voulu que
l'ouurage de peu de iours fust celuy de
beaucoup d'années, & que le refus que
i'ay fait tant de fois de le mettre en lu-
miere, n'ayt esté qu'un retardement
pour l'ajuster, & pour le polir d'auantage.

Certes i'aurois en vain esté curieux de
sçauoir quelles sont les loix, & l'ordre
d'un discours heroique; quels person-
nages, quelles actions & que Morne-
mens on doit employer à sa perfection;
pour vouloir apres cela faire un liure d'un
si petite auēture, qui ne regarde que
la satisfaction d'une ou deux personnes.
Mais peut-estre s'auiseront ils de me di-
re ce que me disoit l'autre iour quel-
qu'un du mestier. Auriez vous, pour une
si legere plainte, tasché d'observer les
regles des plus grands ouurages? Auriez
vous meslé les armes avec les amours, &
regardé par tout l'excellēce des choses?
Auriez vous exposé vostre Endymion à
tant de monstres, & à tant d'ennemis &

de barbares, dont il semble n'estre pris que pour en estre adoré. Vous le faites de complexion plus amoureuse qu'un Paris, & toutesfois plus seuer & plus retenu qu'un Hippolyte: Il n'est point perfide, il n'est point surmōté de sa cholere; ny possédé del'amour d'une captiue, nō pas mesme d'une beauté mortelle: Il n'a pour object qu'une Deesse, & pour fin principale que la vertu. D'ailleurs il faut employer les Dieux, & les hōmes, pour dōner tāt soit peu d'amour à vostre Diophanie, & les moindres fautes vous tiennent lieu de crimes, dont la punition est infaillible. En fin vous avez entrepris un sacrifice, seul but de toute l'antiquité, & à la perfection duquel, personne iamais ne sçeut arriuer. Et vous nous dites que vous n'avez pas eu dessein de faire un liure. A cela ie respons que s'ils veulent qu'un petit combat de gens de pied, & de cheual passe pour les difficultez d'un siege, & d'une bataille; & si le petit voyage qu'Endymion fait en l'air, sans toutesfois abuser de l'Hippogryse, peut estre mis au lieu des erreurs de la mer, & de l'espreuue des mau-

uaifes rencontres, des tempestes, & des naufrages ; ils ne sont pas loin de leur conte. Encore y faudroit-il adiouster les conseils des Roys, & des Princes, les genealogies, les predictions, & les diuerfes causes de l'accroissement, ou de la decadence des Royaumes, & des Empires : Et par dessus tout cela, les conseils du Ciel mesme, autant qu'ils peuuent estre descouuerts à la cognoissance des hommes.

C'est par là que les Censeurs deuroient tesmoigner leur suffisance ; & faire voir le droict qu'ils ont de reprendre les autres, non par quelque legere vray-semblance d'opinions, mais par la verité de leurs œuures. Cependant, ce n'est pas pour cela qu'ils sont aux escoutes, Ils ne se foucient gueres de l'antiquité, ny de toutes ses loix. Si i'ay d'auenture vsé de quelque mot qui ne soit pas de leur terroir ; Si i'ay mal employé quelque monosyllabe, ils auront tousjours gagné leur cause. Et comme ils ne mesurent la perfection des choses qu'à la portée de leur esprit, & qu'ils n'approuuent point en autrui ce qui n'est

point

point en eux; tout ce qu'ils ne voudront point entendre, n'aura point de sens; & ce qui surpassera leur inuention, & leur force, tiendra lieu d'extrauagance. Il faudroit que nous fussions tous composez d'une mesme humeur; & que nous n'eussions pour tous qu'un mesme Genie; encores ne sçay-je si nous serions d'accord avec nous mesmes. O delicatresse du siecle! ô nouuelle eloquence! pourquoy vous tenez-vous si long-téps cachée? Mettez vous au iour; faites nous voir vos beautez: Nous auons tant de docteurs qui nous parlent de vos secrets, & de vos mysteres, mais nous n'auons pas vn liure, quelque petit qu'il soit, qui nous en donne l'exemple. Il me semble que ie les oy desia dire: Il faut que pour moy j'aduouë que ie n'y entends rien; ie n'en suis pas capable, ie confesse ma foiblesse, & mon ignorance: & pour toute raison, ce n'est pas mon goust, ny mon opinion, ou cela ne me plaist point. Petits monstres d'orgueil & d'enuie, qu'il vous sied mal de faire les difficiles: Faites que vous plaisiez premierement vous mesmes, & puis vous

aurez plus de raison de dire que les autres ne vous plaisent pas. Tant d'aages s'estoient ils passez sans hommes d'intelligence? Et n'attendoit-on que vostre venuë pour dessiller nos yeux, & pour dissiper nos tenebres?

Mais comme on ne sçauroit longtemps respondre à leur folie sans y participer; il me suffit de voir qu'elle est recognuë de tout le monde & qu'à ceux qui disoient que i'auois adjousté songe sur songe, plusieurs ont desia respondu qu'ils adioustoient sottise sur sottise: & qu'il ne falloit gueres auoir de sens cōmun pour iuger que celuy qui dort vn si long somme, seul, & principal sujet de cet ouurage, ne peut faire autre chose que des songes. Et ie diray cela d'auantage pour eux, qu'il est bien malaisé qu'il dorme si long-temps, & qu'il ne refue point quelques fois. Il n'y a personne aussi qui ne cognoisse que ceux qui m'ont accusé d'auoir quelque façon de parler poëtique, n'ont pas pris le loisir de considerer que tantost la Theologie des Payens, & tantost la force, & la majesté du style fabuleux, &

magique, que j'ay tafché d'imiter, ne me le permettent pas feulement, mais fouuent mefme m'y obligent.

Courage Endymion, nous ne fommes pas du tout abandonnez; plusieurs ont entrepris nostre defenfe; & tout bien confideré, nous n'auons point encores ouy dire qu'une feule perfonne de merite, & d'eftime, nous ayt fufcité ces murmures. Quelle loüange peut-on efperer de ceux qui fe mettent eux mefmes dans l'infamie? Aristide, ny Socrate ne nous accusent point, qu'auons nous affaire de nous esmouuoir? Qu'on parle, ou qu'on efcriue contre nous; ne foyons point injurieux aux misérables, ny à ceux qui fe defont de telle forte, qu'ils n'ont pas befoin d'autres ennemis que d'eux-mefmes. Il faut aduouër qu'une iufte & grande puiffance aide à l'ordre, & à la conduite des chofes humaines, puis que la verité demeure toujours la plus forte, & qu'elle contraint mefme fes ennemis de la confefser, & de la recognoiftre. Elle rend toft ou tard à chacun ce qui luy appartient. On a beau fe déguifer & fe feindre; ie ne voy

persōne, en quelque part que i'aille, qui passe pour vne autre que pour soy-mesme : Et de tous les vices du monde la vanité se cache le plus mal; elle se donne tant de peine pour faire voir ceux qu'elle possede, qu'elle est incontinent descouuerte.

Puis qu'il est ainsi, que tous les artifices d'autrui, ny les nostres ne sçauroient nous empescher d'estre, ny de paroistre ce que nous sōmes : Nous auons tout sujet de ne nous soucier gueres du blasme que nous pourroient donner ceux qui ne sçauent que mesdire, ny des loüanges importunes & flatteuses, de ceux qui semblent approuuer esgalement toutes choses. Et si nous sommes dignes d'auoir tant d'enuieux, nous tirerons mesme quelque bien du mal qu'ils nous voudront faire : Et ferons voir, (quelques douces que soient les faueurs de la Gloire) que nous ayons tousiours beaucoup mieux vn aduis, qu'une loüange.

Privilege du Roy.



O V I S par la grace de Dieu, Roy de France & de Nauarre, à nos amez & feaux les gens tenans nos Cours de Parlement, Baillifs, Seneschaux, Preuosts, leurs Lieutenants, & à tous nos autres Iusticiers & Officiers, chacun endroit soy ainsi qu'il appartiendra, Salut. Nostre bien aymé Nicolas Buon, Marchand Libraire en nostre Ville de Paris, nous a fait remonstrer qu'il a recouuert vn liure intitulé l'Endymion, composé par le sieur de Gombauld, pour l'embellissement duquel, & pour satisfaire au desir de la Reyne, nostre tres-honorée Compagne & Espouse: Il a fait tailler plusieurs belles figures en taille douce, pour lesquelles il luy a conuenu faire de grandes despeses. Lequel liure il desire-roit mettre en lumiere, & faire Imprimer, s'il auoit sur ce nos Lettres à ce necessaires. A ces causes, luy auons permis & permetons par ces presentes, Imprimer & faire Imprimer ledit Liure, & iceluy mettre & exposer en vente durant neuf ans. Pendant lequel temps, nous faisons tres-expresses inhibitiōs & defenses, à toutes autres personnes de quelle qualité & condition qu'ils soient, de l'Imprimer, n'y faire Imprimer, vendre, ny debiter en quelque lieu & endroit de nostre Royaume, contrefaire ny desguiser en quelque sorte & maniere que ce soit, avec figu-

res ou sans figures, iceluy Liure, ny mesme les figures d'iceluy pour estre mises en autres Liures : sans le consentement dudit suppliât ou de ceux qui auront charge de luy, à peine de deux mil liures d'amande, enuers ledit Buon, de confiscation des exemplaires, qui s'en trouueront auoir esté contrefaits à son prejudice, & de tous despens, dommages & interests. Si vous Mandons, que du contenu en ces presentes, vous faciez, souffriez, & laissiez iouyr & vser ledit suppliant, plaine-ment & paisiblement, sans souffrir qu'il luy soit fait, mis ou donné aucun trouble ou empeschement, au contraire, nonobstant oppositions ou appellations quelsconques, Voulons & Nous plaist, que mettant au commencement ou à la fin desdits liures, ces presentes ou extraict d'icelles, qu'elles soiēt tenuës pour deuëment signifiées, & qu'à la collation qui en pourra estre faite, par l'un de nos Amez & Feaux, Conseiller, Notaire, & Secretaire, foy soit adioustée comme au present original: à la charge toutesfois que ledit suppliant mettra deux exemplaires en nostre bibliotheque publique, auant que de les exposer en vente, à peine d'estre descheu du present Priuilege. Car tel est nostre plaisir, en tescmoin dequoy nous auons fait mettre nostre Seel à cesdites presentes. Donné à Saint Germain en Laye, le jour d'Octobre l'an de grace 1624. & de nostre regne le quinzième. Signé, RENOVARD.

Fautes en l'impression.

- Page 27. contentemêr lisez consentement
P. 46. l'vn ceux lisez l'vn de ceux
P. 159. ponit lisez point
P. 168. m'oblige l. m'obligeant
P. 169. elle en auoit l. il en auoit
P. 234. qu'onrecommandoit l. qu'ellesre-
commandoient
P. 239. quelle sçeut l. quelle sçeust
P. 257. qu'elle me faisoit l. qu'elles fai-
soient
P. 280. que ie ne mer repente l. que ie me
repente
P. 290. sur les jouës l. sur ses jouës
P. 301. & la teste l. la teste
P. 305. saurans l. sautans
P. 314. mes yeux l. les yeux
P. 315. qnelle l. quelle
P. 337. anfi que l. afin que
P. 346. vu sepulcre l. vn sepulcre.



L. Gaultier incidit. 1624



L'ENDYMION

DE GOMBAULD.



LIVRE PREMIER.

LA Nuiet estoit
des-ja fort avan-
cée, & le Sommeil
ayant charmé les
sens, & les soucys,
rendoit la pluspart des viuans fort
peu differens des morts: Quand on
ouit tout à coup vn bruit de trom-
pettes, & de clairons dans la Ville

d'Heraclee, & au dehors des trou-
pes de gens qui avec toutes sortes
d'instrumens d'airein, & de cuy-
ure, faisoient retentir tous les lieux
d'alentour, & couroient aux som-
mets du Mont Lathmos. Car la
Lune qui n'agueres tenoit lieu de
Soleil dans le Ciel, & qui effaçoit
la clarté des plus beaux Astres, fut
surprise d'une soudaine defaillan-
ce, & comme si quelque main
puissante l'eust effacée elle mesme
d'entre les Planetes, toute sa Lu-
miere fut conuertie en effroyables
tenebres, qui adjousterent une
autre Nuit à la Nuit mesme. Il
sembloit que l'Enfer eust estendu
ses limites iusques aux Cieux: Ou
que la Nature deuint aveugle, &
retournast à sa premiere confu-
sion. Tout estoit plein d'horreur,

& d'estonnement; & les plus profanes mesmes furent touchez de la crainte des Dieux. Or c'estoit la coustume des Anciens, de se servir en ceste occasion, des metaux dont le son est le plus esclattant; s'imaginans par ce moyen rappeler la Lune de quelque esvanoüissement; ou la deliurer des charmes des Magiciennes, qui se van-toient de la pouuoir tirer du Ciel, soubz la faueur de la Nuiet, & du Silence. Si bien que ceux-cy, la voyans peu à peu reuenir comme elle s'en estoit allée; & paroistre en moins d'un quart d'heure, en toutes ses formes diuerses; Aussi tost que les rayons du Soleil luy eurent redonné la clarté que l'ombre de la Terre luy auoit ostée, se persuaderent aisément qu'elle en

estoit fort obligée à leur soin, & à leur diligence ; & s'en allerent contens employer ce qui leur restoit de la nuit à prendre le repos qu'avec raison ils croyoient bien auoir merité des Dieux, puis qu'ils venoient de le donner à vne Deesse. Mais comme vn seul d'entr'eux nommé Pyzandre, plus attétif à la contemplation de ce bel Astre, & plus lent à la retraicte, eut de fortune tardé quelque temps apres les autres sur la Mōtagne: Voicy qu'il ouyt vn peu à l'escart, ie ne sçay quels accens pitoyables, quel heure mesme rédoit plus tristes, & plus clairs. Ce qui luy donna quelque peu de crainte au commencement, mais plus de curiosité de sçauoir ce que c'estoit: Si bien que s'en estant approché tout bellement, & sans se

descourir, il entendit ces paroles.

N'est-ce pas icy le Mont Lathmos? Qui est-ce qui m'a rendu en vn instant à ma Patrie, d'où n'aguères i'estois si esloigné? Et qui est-ce qui avec elle, m'a redonné la vie que ie croyois auoir perduë? Helas! voicy la victime, mais qu'est deuenu l'Autel & le Sacrificateur? Et quelle main croyant m'estre favorable, m'a tiré du milieu d'un si grand peuple? Est-ce toy, Diane, qui luys dans le Ciel encores plus belle que de coustume; Et qui me vois plus malheureux que iamais, si tant est que tu me daignes plus regarder? Soit que tu sois cruelle, soit que tu sois pitoyable, pourquoy ne me laisses tu mourir? Si tu me refuses tout autre bien, au moins ne m'oste point le dernier,

& le commun reconfort de tous les miserables. Quoy veux-tu que ie viue , afin de faire voir toute la colere du Ciel assemblée sur vn seul homme ? Et ne m'empeschestu de mourir vne fois , qu'afin que ie meure continuellement ? Et que le souuenir des graces que tu m'as faites autres-fois , me face consumer de regret , moy qui ne veux plus rien conseruer , apres les auoir perduës. Tu m'as aymé, Diane , pour exposer ma vie à tant de perils , que ie ne pouuois attendre pis de ta hayne , que ce qui m'est arriué de ta bien-veillance. Tu m'as aymé pour me donner, comme ie croy , mauuaise opinion des Dieux , & pour me faire voir qu'ils ne sont ny fideles, ny veritables. Je deuois iuger de ton humeur, &

de ta nature, par celle de ton empire, que le sort t'a donné sur les choses du monde les plus legeres, & les plus insensibles. Craignez, mortels, à mon exemple, l'amour des Deesses, qu'elle ne vous mette à l'espreuve de toutes sortes de malheurs. C'est en vain que la gloire en est la recompense, puis que l'excez de tant de peines en oste du tout le sentiment.

Dieux qu'est-ce que i'entends? dit lors Pyzandre en luy-mesme; Je croy recognoistre ceste voix, mais ie ne comprends point ceste plainte. Endymion seroit il en ces lieux, sans que i'en fusse aduerty? Estant de retour viuroit il comme absent? Et cherchant plustost les deserts, que les hommes, auroit il eu plus de soin de visiter ceste

montagne que ses amis ? Ainsi Pyzandre diuerfement combatu tantost d'un penfer, & tantost d'un autre, continua d'escouter, & Endymion de se plaindre.

Je souffre la peine, disoit-il, Deesse, & ie ne sçay point la faute que i'ay faite : sinon d'auoir adjousté le mespris de toutes choses à l'estime que ie faisois de ta bienveillance. Sois maintenant contraire à toy-mesme, & oubliant ce que tu dois à ma fidelité, pren contre moy la cause des Dieux, & des hommes, que i'ay tous offensez en la seule passion de t'adorer. Si tu ne m'accuses d'autre chose, ton accusation mesme suffit pour me iustifier. O que mon crime me tiét lieu d'un grand merite, & qu'il me rend beaucoup plus digne de re-

compense, que de punition ! Cependant ie n'ay peu rien aduancer, pour tout cela, ie n'ay peu rien edifier, non pas mesmes vn tombeau. Mais peut estre que mon affection est temeraire, aussi bien que ma plainte. A ce coup suis-ie forcé, pardonne le moy Deesse, de le demander à tes yeux, ausquels i'ay trop adjousté de foy, aussi bien qu'à tes promesses. Je le demanderois aussi volontiers à ton cœur, & à ton souuenir, si d'auanture ils te sont fideles à toy mesme. Ne pense pas que i'oublie mon deuoir, pour trop me ressouuenir de tes faueurs. Car s'il ne m'en reüffit autre chose que la perte de mon temps, & de moy-mesme, i'oseray te conseiller de fauoriser ainsi tes ennemis.

C'est luy mesme , disoit Pyzandre , ou c'est son ombre , qui peut-estre ne pouuant passer à la riue des morts , erre encores en ces lieux. Auroit-il finy sa vie par quelque naufrage , ou par quelque autre accident , qui le priuast de sepulture , & qui ne luy permist point d'auoir d'autre tombeau que le Ciel ? Tant que son corps sera veu du Soleil , son ame ne sera point receuë parmy les ombres. Toutesfois où est-ce que mon estonnement me fait esgarer ? Et qu'est-ce que mon apprehension me fait dire ? Ce ne sont pas là les discours d'un mort , mais bien de quelqu'un qui se fasche de viure. Cependant Endymion de qui la plainte , aussi bien que la passion , pouuoit estre infinie , Et qui sem-

bloit vouloir conuaincre vne Deesse d'ingratitude, & d'inconstance; ne manqua pas dans peu de paroles de se nommer luy-mesme, & de donner par ce moyen à Pyzandre la resolution de l'interrompre.

Il faut aduoüer, disoit-il, Deesse, que ie ne suis pas digne de la moindre faueur que tu m'as iamais faite, & que la consideration de moy-mesme me deuroit imposer silence. Mais quoy les Dieux sont-ils aueugles? & n'ont-ils qu'une cognoissance obscure des choses humaines? font-ils leurs deliberations sans iugement? & se peuuent-ils repentir de leurs premieres volontez? Pour moy ie croyois bien surpasser tous les hommes, aux vœux, & en l'affection de te seruir;

mais ie ne croyois pas surpasser vne Deesse en resolution, & en constance. Et i'esprouue que tu n'es pas moins muable que quelqu'une d'entre les mortelles; Et comme si ce n'estoit pas assez de changer, tu passes du changement à l'oubly. Le nom d'Endymion n'est plus en ta bouche, non plus que son estime en ton cœur: tu n'en parles plus à tes Nymphes, non pas mesme à tes pensées.

A ce nom d'Endymion; Pyzandre emporté de son impatience, s'estant tout à fait approché de luy, le trouua couché sur vne pente de la montagne, ayant les bras croisez, & les yeux tournez vers la Lune: Et commença de luy parler en ceste sorte. Quels Dieux tout ensemble contraires & fauo-

rables me font ouyr la voix d'une
personne qui m'est si chere , par
une plainte qui m'est si fascheuse,
& dont la cause m'est incognüe?
Ay-ie donc tant de fois desiré de
revoir Endymion, afin qu'aujour-
d'huy quelque sinistre accident
m'en face apprehender la rencon-
tre sur le point qu'elle m'est offer-
te? Hé ! mon cher Pyzandre, dit
Endymion en se leuant, & luy ten-
dant les bras. Quel bon-heur veut
commencer à me suiure. en me
rendant la presence de celuy que
i'ay si long-temps perdu de veüe,
& non de pensée? Ou quel mal-
heur veut continuer de m'affliger
de plus en plus, en t'affligeant? Car
ie croy qu'il n'y a que les mal-heu-
reux qui cherchent à ceste heure
les lieux escartez, & qui veillent ce-

pendant que les autres reposent. Dy moy de grace , qui t'amene icy. Vrayment dit Pyzandre , i'ay bien plus de sujet , & d'impatience d'apprendre de tes nouvelles par toy-mesme , puis que tu me retrouues en nostre commune patrie , où tu nous astous laissez pour aller courir sans doute , de plus estranges auantures que nous. Mais ie m'estonne bien fort , Endymion , de ce que tu sembles ignorer la cause qui m'amene icy. Car si le bruit que nous faisons tantost , est parueni iusques à la Lune , à plus forte raison pouuoit-il bien paruenir iusques à toy , & te reueiller mesme de quelque somme que tu peusses dormir. Tant s'en faut dit Endymion , que ie dormisse comme tu l'images

Pyzandre, que i'estois bien loin d'icy, où ie croyois qu'on m'eust fait dormir vn somme dont on ne se refueille iamais. I'en ay esté deliuré comme vne personne qui songe, & me suis trouué de retour en ce lieu, sans m'estre apperceu du chemin que i'ay fait. N'agueres vn fort grand bruit, ie l'aduouë, m'a fait vn fort mauuais office. Que pleust aux Dieux que toutes choses eussent esté paisibles; & qu'un sommeil vniuersel eust rendu tous les animaux de la terre aussi muets que ceux des eaux. Certes, Endymion, dit Pyzandre, ie n'entends point ce que tu me dis; & tes dernieres paroles sont encores plus obscures que les premieres. Je te prie ne me laisse point ignorer plus long-temps, ce que nostre

amitié nous doit rendre commun. Conte-moy tes auantures bonnes, ou mauuaises. Car tu sçais bien que c'est le propre de la communication de rendre les biens plus doux, & d'en augmenter le sentiment; comme au contraire de diminuer les maux, & de les soulager. Helas! respondit Endymion, par - où commenceray-ie, & où pourray-ie finir? Te feray-ie perdre le repos de la Nuiët, pour te faire part de mes peines? En quoy mesme mon esprit fuyt le souuenir de ce qu'il y a de plus agreable: tant il me desplait de voir que la Fortune se iouë indignement de mes travaux, & de ma patience. Ainsi se defendoit Endymion de luy en faire le discours: quand Pyzandre ayant encores adiousté d'autres conju-

conjurations aux premieres , l'obligea de s'asseoir avec luy, & de commencer en ceste sorte.

B



O! Pyzandre, que le destin est vn puissant maistre! Et qu'en vain nostre raison se trauaille, & s'efforce de luy resister, & de ne le suyure pas, en quelque part qu'il nous veuille mener, soit à nostre bien, soit à nostre dommage. Il nous oste le Iugement, & tantost par douceur, & tantost par violence, il nous fait perdre la trace de toute autre aduventure. Il faut que tu sçaches, afin que ie n'oublie rien à te dire, ce qui m'arriua lors que i'estois en la Ville d'Ephese. Vn iour de Feste à l'issuë des sacrifices, comme nous passions par la ruë, deuant l'vne des plus proches maisons du Temple de Diane: (Car de fortune Polydamon estoit avecques moy) ie fus tout estõné qu'une femme estant sur le seuil de sa

porte , & ayant ietté l'œil sur moy
parmy tant de passans , m'appella
par mon nom : chose estrange !
qu'elle me peust cognoistre en vn
instant , sans m'auoir iamais veu
qu'alors ; & sçauoir comment ie
m'appellois , sans l'auoir appris de
personne. Elle estoit d'ailleurs si
vieille qu'à grande peine eust elle
peu prouuer par des tesmoins,
qu'elle eust quelquesfois esté ieune.
Et avec son visage sans couleur,
& sans forme , ses yeux enfoncez,
ses iouës pendantes , & sa peau se-
che , & ridee ; Il luy restoit si peu de
traicts de la vie , qu'il sembloit
qu'elle ne demeurast au monde,
que pour y faire voir seulement l'i-
mage de la mort. Tant y a que par
vn effort extraordinaire , haussant
la veuë , qu'elle auoit tousiours

panchée sur la terre, & qui de long temps auoit perdu l'vsage de regarder le Ciel; viença, dit elle, Endymion. Moy qui voyois que son regard estoit tout esgaré, & qu'il sembloit à son geste, qu'elle fust transportee de quelque fureur, & comme animée d'un esprit plus fort que le sien; ne pouuant assez m'estonner de ceste nouueauté; le m'arrestay tout court, sans me mettre en deuoir ny de m'aduan- cer vers elle, ny de luy respondre. Mais elle s'approchant de moy, toute courbée, & chancelante, comme celle qui estoit lasse de porter le faix de tant d'années, & à qui l'espace de trois pas seulement qu'elle auoit à faire, tenoient lieu d'une fort longue carriere, & d'un exercice fort penible. Ne crains

point dit elle d'apprendre ta destinée; & aux hommes également & aux Dieux, les arrests de Themis sont inévitables. Et puis elle prononça ces vers.

*De l'Astre qui preside aux bois,
Tu verras sur toy mille fois
Les rayons les plus fauorables.
Mais en fin les voyant cesser,
Tu seras contraint de penser
Que les Dieux mesmes sont muables.
Si les desirs sont violens,
Les efforts sont foibles, & lents,
Et les Dieux mal-aisez à suyre.
Un charme pesant; & leger,
T'arreste, & te fait voyager;
Te fait mourir, & te fait viure.*

Puis comme elle se fut retirée,
ie croy me dit Polydamon, que

ceste femme est hors du sens. Car quelle cognoissance auezvous l'un de l'autre? Mais au lieu de luy respondre, ie pensois à ce qu'elle m'auoit dit; & iugeant qu'il y auoit ie ne sçay quoy d'extraordinaire, qui ressenoit plustost le Dieu, que la femme, & l'inspiration que la folie; afin de m'en esclaircir, ie demanday sur le champ, qui elle estoit à quelqu'un de ses voyfins. Es tu, me respondit il, Grec, ou Barbare, que tu ne cognoisses point la Vierge Parthenopée, l'une des principales de la race des Iamides qui prophetisent d'ordinaire aux Jeux Olympiques? Mais vn autre me dit plus humainement, que celle que nous estimions estre femme, estoit vne fille qui auoit pour le moins l'aage de cent ans: & qui

outre qu'elle estoit veritablement de ceste race de Prophetes issus d'Apollon, & d'Euadne, ayāt voüé constamment sa virginité à Diane, & employé toute sa vie à ses seruices, auoit receu d'elle au double le don de predire les choses futures.

La plus grande apprehension que i'eus alors, ce fut d'auoir perdu quelqu'une des paroles qu'elle m'auoit dites : En quoy la mesure des vers me fut grandement favorable : car à force de les tourner, & de les redire en moy-mesme ; par l'aide de l'une & de l'autre partie, i'eus bien-tost remis le tout en ma memoire. Je n'estois iamais las de m'en entretenir, & mon esprit anticipoit desia sur son bon heur, par l'esperance, & par mille sortes d'i-

maginations agreables. Les doux aspects qui m'estoient promis au commencement, m'ostoiert si fort la consideration de quelques facheuses auentures qui me menaçoient à la fin ; que les plus rigoureuses peines qui me pouuoient arriuer, me sembloient douces, & glorieuses, puis que Diane en deuoit estre la cause. Depuis ce temps là mes yeux ne trouuerent plus d'obiet qui les peust contenter s'il ne m'en faisoit ressouuenir ; & fuyant tout autre diuertissement, i'estois tousiours à cōtempler son image dans le Temple, ou son Astre dans le Ciel. Mais sur tout, estant de retour d'Ephese, ie me tenois volontiers au sommet de ceste montagne, où ie dormois vne grande partie du iour, pour em-

ployer la nuit à ceste douce contemplation. Ce qui à fait croire à plusieurs que ie dormois eternellement. Ainsi ie voyois moins ordinairement le Soleil que la Lune, dont la clarté m'estoit mille fois plus agreable que celle des plus beaux iours. Je la perdois si peu de veüe, que ie pouuois donner congnissance à tout le monde, des voyes qu'elle tient dans le Ciel, depuis la maison d'Helles iusques à celle d'Astrée, ou d'Erigone; & delà iusques chez Ganymede, & plus auant. Lors meisme que dans vn char attelé de Dragons, elle sort des maisons celestes, & va s'escarter iusques en la contrée des vnes, ou des autres filles d'Atlas. Soit que d'vn costé elle aille voir Cassiope, Andromede, & toute la fa-

mille de Cephée; Soit que de l'autre elle aille à la chasse vers le quartier d'Orion: Soit que par occasion, durant les grandes chaleurs, elle s'aille quelquesfois reposer dans les Antres du Centaure: Ou soit qu'à la fraischeur du soir, elle se pourmeine sur le riuage du grand fleuve celeste, qu'on appelle diuement, les vns du nom du Nil, & les autres de celuy de l'Eridan. Et la Deesse mesme prenoit tant de plaisir au soin, & à la passion que j'auois, que sa gloire fust par-tout recogneuë, qu'elle n'apportoit pas moins de contentement à se faire voir, que moy d'attention à la considerer. Et ie ne scay si mes yeux estoient ou plus assistez de sa faueur, & moins offencez de sa lumiere; ou si tout accoustumez à

cet exercice, ils penetroyent plus facilement iusqu'au Ciel. Mais comme si elle fust descenduë en la moyenne region de l'air, il me sembloir que ie voyois rouler son char sur les nuës; & que pour me gratifier le plus souuent, elle panchoit sur moy sa veuë, en la mesme façon qu'elle regarde les sacrifices qui luy sont les plus agreables. Elle ne lançoit en ma faueur, que les plus doux traicts que son cœur pouuoit enuoyer par ses yeux: & tous ces lieux en estoient rendus si clairs, qu'ils ne se ressentoyent nullement de l'absence du iour. O merueille du destin, & de la nature! Vne Deesse oublie tous les Dieux, pour regarder vn seul homme; & trouue quelque chose en la terre, qui luy fait mespriser

les Cieux. Il n'est rien de plus bas, que ce qui retient ordinairement les regards, & la pensée : & par son affection, elle deuient en quelque sorte humaine, & mortelle. Vn mortel au contraire ne contemple que les choses celestes, n'a dans l'ame qu'une diuinité ; & ses yeux ne sont attachez qu'à la beauté mesme, c'est à dire à Diane.

Mais quelle notable preuue de bien-veillâce en receus-ie vne fois que le Ciel tout couuert de nuages, qui sembloient estre jaloux de mon bonheur, m'empescha de la voir : Et combien me fut il fauorable d'auoir eu quelques iours contraires pour cet effect ? Car j'appris par le fidele raport de quelqu'une de ses Nymphes, qu'elle n'en auoit pas eu moins de des-

plaisir que moy; & que mesme elle s'en estoit plainte à la Deesse Iris. Iris, luy dit elle, ce me seroit peu de chose d'estre priuée quelque tēps de voir vne grande partie de la Terre, pourueu qu'aumoins ie visse les lieux qui me sont les plus agreables. Or ne te celeray-ie point que depuis peu i'ay pris en particuliere affection la Carie: Cependant il y a bien quatre iours que ie ne l'ay point veüe. Je prendrois beaucoup plus en gré de ne voir point l'Isle de Delos, ny la montagne de ma naissance, dont ie porte le nom. Escarte moy dont ie te prie vn peu les nuages, & destourne les, ou vers la Lycie, ou vers l'Ionie, ou bon te semblera: mais sur tout ne me cache point la ville d'Heraclee, ny le Mont Lathmos. Incontinent

il se fit vne grande ouuerture au Ciel, & les tenebres s'enfuyrent deuant la Deesse, qui commença de paroistre en son plus grand lustre, & comme si elle eust assemblé tous les rayons sur moy, ie me vis au mesme instant tout enuironné de lumiere. Heureux Endymion ! dit Pyzandre, si les doux aspects de la Lune suffisent pour rendre vn homme bien heureux ! Mais dis moy que pouuois tu faire tout le temps qu'on ne la voit point au Ciel ? Ce qu'elle fait elle mesme, dit Endymion, quand elle est priuée de voir le Soleil. Elle se couure d'un voile obscur, comme si elle ne le pouuoit perdre vn seul moment de veüe, sans en porter le deuil. Ainsi quelque flambeau qui m'esclairast, ie croyois viure

en tenebres, & n'auois point d'autre exercice que d'errer continuellement par les forests, pour voir si ie n'en sçaurois point de nouvelle: & si mon destin, ou sa faueur ne me permettroit point de la rencontrer: A quoy ie trauaillay quelque temps en vain, mais à la fin, comme c'est la coustume des Dieux, tantost de preuenir nos esperances, & tantost de venir quand nous ne les attendons plus; Ainsi m'arriua ce bon-heur lors que i'y pensois le moins.

Des-ja la nuit commençoit à plier ses voiles, & vn petit vent frais auantcoureur de la lumiere flattoit doucement le sommeil; & battant des aisles, chassoit deuant luy vne nuë claire, & subtile, n'estant chargée seulement que

d'vne

d'une legere rosée, qu'elle espan-
doit par toute la terre, en forme
de perles, qui brilloiét comme de
petits yeux sur la pointe des her-
bes & sur les fleurs. Quand au
refueil ressentant vn air plus doux
que de coustume, tel que les Dieux
l'ont dans le Ciel, ou l'apportent
avec eux sur la terre, lors qu'ils y
descendent; ie fus obligé de sor-
tir dehors, y estant attiré par ie
ne sçay quelle aymable violence,
qui n'eut pas moins de pouuoir
sur moy, que si quelque voix m'y
eust appelé. A peine auois-je fait
vn pas hors de cette grotte, que ie
vis deuant moy, sur cette petite
pointe de montagne, vne femme
(telle la croyois-je en ce premier
instant) mais si tost que i'eus tant
soit peu considéré sa beauté, la

taille , & sa majesté plus qu'humaine , ie reconnus bien que c'estoit quelque vne d'entre les Deesses. De quels termes pourra maintenant ma bouche exprimer ce qu'alors mes yeux peurent voir ? & d'où tireray-je des comparaisons , pour te représenter ce qui n'ayant rien de pareil , n'en peut souffrir aucune ? L'auray bien plus tost fait , si sans entreprendre de te figurer des clartez par des ombres , ie te dis que tu portes , autant qu'il te sera possible , l'œil de ta pensée par dessus tous les Cieux ; & que là tu consideres la Beauté mesme accompagnée d'une eternelle jeunesse , & qui par nul accident ne peut souffrir ny de changement , ny d'outrage. O que les beautez celestes , Pyzandre , sont differen-

res de celles d'icy bas! & qu'elles firent bien tost naistre en mon ame le mespris de tout ce que i'auois iamais veu auparauant! Mais sur tout que ce bon-heur me fut sensible, quand ayant apperceu l'arc qu'elle tenoit dans sa main, & le Croissant qui luisoit sur sa teste, ie recognus que c'estoit la Deesse à qui mon cœur adressoit tous ses vœux. De ce costé-là croyois-je venir le iour, & non pas du leuer du Soleil. Endymion, dit Pizandre, ie ne te veux point obliger à l'impossible; ny t'empescher beaucoup apres vne longue & vaine description des choses qui ne se peuuent représenter. Mais encore te prieray-je de me donner quelques traicts de cette beauté diuine, autant que nostre humain lan-

gage te le pourra permettre. Par-
my tant de perfections, dit Endy-
mion, ie ne sçauois laquelle ie de-
uois considerer la premiere; & le
desir que i'auois de les voir toutes,
faisoit que ie n'en examinóis pas
vne; & que ie ne voyois rien que
confusément. Tantost ie m'eston-
nois de voir, qu'en vne si parfaicte
stature, en quoy elle surpassoit de
beaucoup les mieux formées d'en-
tre les femmes, elle representoit
auoir vne aage si tendre: Car son
teint estoit plus ieune; & plus
beau, qu'on ne le voit en la pre-
miere fleur de la jeunesse mesme;
estant mēlé de certaines clartez
qui sembloient accorder les feux
avec les fleurs; & assisté d'vne ver-
tu diuine qui defendoit aux fai-
sons de ne luy faire point d'iniure,

& qui l'exemptoit pour iamais de la jurisdiction des années. Tantost i'admirois en elle ie ne sçay quelle douce fierté, qui comme elle a des appas pour attirer à soy les plus genereux courages, ne manque point aussi de rigueurs, pour rebutter ceux que la crainte accuse au dedans d'auoir peu de merite, & pour leur defendre de s'en approcher. Il sembloit que l'Honneur, & la Majesté, se tenoient sur son front, comme sur vn siege d'yuoire bien poly, faisans leur demeure eternelle sous le riche ornement de ses beaux cheueux, dont les vns estoient tressez, & cordonnez, & les autres retrouffez, & nouiez à la Laconienne, avec plus de grace, que d'artifice; n'ayans pas besoin qu'on adioustast rien à leur lustre,

non plus qu'à leur nombre. Quelques vns negligemment espars, & comme eschappez des liens, & de la captiuité des autres, se mouuoient sur ses jouës vermeilles, & sur ses espaules, & là, pour y soupirer en vain f'alloient prendre, en se jouiant, les Amours, & les Zephirs. On voyoit autour de sa bouche vermeille le Ris, & la plus mignarde de routes les Graces, qui tous deux ensemble, parmy leurs appas, & leurs caresses, en culti-uoient les œillets, au milieu des lys, & des roses. De quelque costé qu'elle tournast ses beaux yeux, tout ensemble si bruns, & si clairs, l'air en vn instant en estoit rendu si doux, & si serain, que toutes choses en estoient embellies, & reprenoient de nouvelles forces.

Ce sont veritablement ces deux Astres , qui quand il leur plaist font renaistre le Printemps sur la terre, & qui calment la mer quand elle est troublée. Mais à quoy m'obliges-tu? Pyzandre, & qu'est-ce que i'entreprends? de te parler de ces yeux, deuant lesquels il n'y en a point d'autres qui puissent tenir ferme, ny contester tant soit peu, sans en estre esbloüys. Si bien qu'à tous propos, i'estois contraint de baisser la veuë, que ie laissois tomber sur cette belle gorge; bien que c'estoit la destourner des feux, & des esclairs, pour l'aller perdre dans les neiges de son sein. Mais de fortune, pour estre plus qu'à demy couuert, ie ne voyois à chaque costé qu'un petit Croissant de ces deux petits globes vraiment

celestes, qui se mouuoient continuellement, & qui comme indignez d'estre captifs, repoussioient au large sa robbe autant qu'il leur estoit possible; de telle sorte que s'ils ne pouuoient faire monstre de leur blancheur esbloüissante, à tout le moins faisoient-ils bien iuger la perfection de leur forme ronde; & s'ils n'offensoient la veüe, ils ne laissoient pas de troubler l'imagination. C'est-là, Pyzandre, que les plus eloquents mesmes seroient rendus muets. Aussi n'en veux-je plus parler, de peur que la seule pensèe ne me face perdre la parole, & ne me laisse plus que les soupirs.

Tous ces lieux se resioüissoient de la presence de la Deesse, & sembloit qu'elle eut fait du mont

Lathmos vn Olympe. Pour moy
i'en respirois si à mon aise, qu'es-
prouuant tout ce que la vie sçau-
roit auoir de plus delicieux, je
croyois alors seulemēt auoir com-
mencé de viure. I'estois tout rauy
des merueilles d'un objet si rare,
quand tournant vers moy ses re-
gards, avec vne façon majestueuse,
dont les Graces sembloient con-
duire tous les mouuemens. Endy-
mion, (dit-elle, d'un ton de voix
si clair, & si doux, qu'il n'y a point
d'ame, qui dès le premier mot n'en
eust esté charmée) tes vœux m'ont
touchée iusqu'au Ciel, & ton af-
fection m'a esté agreable. Je sçay
combien tu prens de soin pour
faire cognoistre ma grandeur, &
ma gloire aux mortels. Si ie n'en
auois quelque sorte de ressenti-

ment, tu aurois raison de t'en plaindre, & de dire par tout le monde, que l'ingratitude loge dans le Ciel, aussi bien entre les Dieux, qu'entre les hommes. Vse de ton bon jugement, & demande moy ce que tu voudras, enquoy ie puisse tesmoigner ma recognoissance, & ne doute point que tu ne l'obtiennes. Moy qui demeuroidis tout interdit, & confus, tant de la voir, que d'en receuoir tant d'honneur: A qui l'admiration, & le respect impoisoient également silence; Je n'estois plus capable de rien desirer en ma vie; estimant toutes mes peines, & mes veilles trop récompensées d'un seul de ses regards, ou de la moindre parole qu'elle m'auoit dite. Si bien qu'en ce premier instant, ie ne pouuois

du tout parler ; & quant bien ie l'eusse peu , ie ne sçauois ce que ie luy deuois dire : & bien me seruit que par vn traict de sa bonté coutumiere, elle me donnaist quelque peu de temps de penser à moy , & de me recognoistre. Il me vint vne fois en la pensèe, de luy demander la mesme chose que mon pere obtint de Iupiter , de viure , & de mourir comme il voudroit. En fin voyant qu'il m'estoit force de parler ; la consideration de mon de- uoir m'ayant fait surmonter la crainte , & trouuer mesmes de- quoy dire malgré l'incertitude où i'estois ; ie luy respondis ainsi. Deesse , l'honneur que tu me fais excède par trop ma condition : donne moy ce qu'il te plaira : Car qu'est-ce que ie te pourrois

demander? l'oublie tout le passé, & ne puis rien imaginer pour l'advenir, tant ce qui m'est présent me possède. Permetts moy plustost de m'offrir à toy; & si tu me gratifies tant que de me recevoir, ie croiray que tu m'auras donné toutes choses. Je te demanderois volontiers, que le bon-heur duquel ie iouïs à cette heure, me fust eternal. Mais elle recognoissant bien l'extase, où m'auoit mis vn bon-heur non accoustumé, qui m'ayant au commencement fait perdre la parole, continuoit encores de m'oster la raison. Comment dit elle, souffrirois-tu plus long-temps ce qui en vn moment t'a perdu de telle sorte, que tu aurois besoin que quelqu'un te redonnast à toy-mesme? Quand bien tu serois des plus auât

au rang des immortels, encores ne pourrois-tu pas obtenir ce que tu viens de dire. Pense donc vistemét à me demander autre chose, pour ne me retenir d'avantage. Vrayment, luy dis-je, le temps deuroit bien estre cher aux hommes qui vivent si peu, si les Dieux mesmes infinis de nature, ont tant de soin de ne le perdre point. Mais à quoy m'obliges-tu, Deesse? Car comme à Diane, ie ne vois pas que ie te puisse rien demander selon mon desir; puisque l'honneur de te suivre, & de te servir en tous lieux, n'appartient qu'à tes Nymphes, & moy ie ne puis rien estimer qui me separe long-temps de ta presence. le prendray donc la hardiesse de parler à toy comme à la Lune, te suppliant par le credit que

tu as dans le Ciel, qu'il te plaise me faire auoir quelque place entre les Astres, & que ie fois l'vn ceux qui s'escartent le moins de ta veuë, & qui suiuent de plus pres ton char, en quelque part que tu ailles. Ou si le nombre des Astres est si parfaict qu'on n'y puisse rien adiouster, & si les destins y resistent, à tout le moins donne moy, parmy les mortels, de te rendre les vœux, & les sacrifices les plus agreables, & d'employer toute ma vie à tes seruices. Lors la Deesse ne se contenta pas de donner de la teste, vn signe d'approbation, & de consentement; mais avec vn souf-ris qui eust peu raur les hommes, & les Dieux, elle adiousta encores ces paroles: Bien, dit-elle, Soit au Ciel, soit en la Terre, ie ne per-

dray nulle occasion de te gratifier. Ne doute iamais de ma bonne volonté pour toy, ny de mon souvenir. A peine auoit-elle acheué, que ie la perdis de veüe en vn instant, & n'entendis seulement qu'vn petit bruit des fleches, & du carquois, qui luy battoit sur les espaules, comme elle se tournoit pour s'en aller. Cependant ie ne laissay pas de remarquer ce que i'auois souuent oüy dire; Que les Dieux ont vne façon d'aller, différente de celle des hommes; & que sans estre en peine de porter incessamment les pieds l'vn deuant l'autre, ils ont cette vertu, & ce pouuoir d'estre portez eux-mesmes en vn clin d'œil, où bon leur semble; & que toute voye en terre, ou au Ciel, leur est esgalement fa-

cile. Mais hélas ? i'eus grand tort que ie ne la fis jurer par le fleuve de Stix , ferment inuiolable aux Dieux. Endymion, dit Pizandre, les Dieux ne sont point, ou bien ils sont veritables, & recognoissent infalliblement l'amour qu'on leur porte : Car s'ils nous manquent, qui nous sera fidele ? Toutes choses nous doiuent manquer avec eux : Mais plustost cette montagne sera conuertie en plaine, ou en vallée ; Et le Meandre fuyant la mer Ionienne , retournera sur ses pas, & s'en ira finir à sa source, que la parole des Dieux ne soit ferme ; & principalement de Diane ce grand ornement du monde, à qui les Destins font tenir en tant de lieux la place de Iupiter. Mais de grace, Endymion, con-

tinué :

tinuë. Je regrette tout le temps
que j'employe à autre chose qu'à
t'escouter ; tant il me tarde que
ie ne voye la fuyte de tes aduen-
tures.

D



Le Ressentiment que j'auois d'une telle faueur, dit Endymion, fut long-temps le seul entretien de ma vie : & mon bon-heur ne souffroit point de cōparaïson, non pas mesme avec les plus heureux de tous les hōmes. La grandeur du sujet que i'adorois, & qui me fauorisoit de tant de biē veillāce, mettoit toutes les dignitez du monde au dessous de ma condition, & de ma gloire. Toute conuersation m'estoit importune, & celle la mesme de mes amis les plus intimes; tant pour ce qu'ils ne faisoient qu'interrompre les plus doux contentemens de mon ame, que pour la difficulté que ie faisois de leur communiquer la moindre de mes pensées. Mon souuenir me rendoit à tout propos la Deesse aussi

presente que si elle eust esté deuant mes yeux : & mesme il sembloit que i'y trouuasse encore plus de delices que durant la presence mesme ; pour ce que l'excez de mon rauissement ne m'auoit pas permis d'estre à moy , & m'ostoit l'vsage de mes sens, & de mon iugement. I'allay cent, & cent fois visiter la place où ie l'auois veuë, & n'estois iamais las d'y chercher quelqu'une de ses traces que ie n'auois point encore remarquée. Je baïsois l'herbe que ses pieds, qui auoient accoustumé de marcher sur les Cieux auoient foulée, & me rendois Gardien du lieu comme d'un Temple, ou d'un Autel. Mais si mes pensées me la remettoient deuant les yeux, aussi faisoient mes songes : Songes plus beaux, & plus

clairs que le iour , & desquels ie n'eusse iamais voulu me refueiller. Tantost ie croyois la voir , sans qu'elle me tint d'autre langage que celuy des yeux, qui me regardoient si fauorablement , que la langue ne sçauroit exprimer ce qu'ils me sembloient dire. Et tantost aussi ie croyois qu'elle parloit à moy , avec vn geste qui valoit autant, ou plus que la parole. Quelquesfois me iettant à ses pieds , ie la voulois arrester , & luy baisois le bord de son voile, & quelquesfois, ô songes trop audacieux ! ie luy baisois la main mesme. Mais que dis-je ? la main. A quel degré de gloire, & de felicité , le Sommeil n'esleue t'il pas les plus miserables ? Et combien me faisoit il gouster encore de plus douces faueurs, si la

bouche qui les receuoit les ose dire? puisque mesme elle estoit tenue si close, & si pressée, que cela luy sembloit recommander le silence? Aussi n'en parlois-je qu'à mes pensées. Celestes douceurs, dis-fois-je, delices nonpareilles, estes vous faulses, ou veritables? Mais comment faulses, puisque vous estes si sensibles? Et comment veritables, puisque ce n'est qu'en songeant? Soit que i'en veuille faire mes plaintes, soit que i'en veuille rédre mes vœux & mes graces; à qui me dois-je adresser ou au Sommeil, ou à Diane, ou à tous les deux ensemble? L'un me ferme les yeux, & l'autre me ferme la bouche, & d'une douce violence contraire à soy mesme, me tire l'ame & l'empesche de sortir. O Deesse! si tu me fauo-

riles tant que d'assister toy-mesme, & d'estre veritablement presente à ce doux mystere; A quelle fin vses-tu de la commodité du sommeil? Ou si tu en es fort esloignée, & si tu n'y contribuës nullement, pourquoy luy permets-tu d'abuser en ma faueur de ton jmage? Peut estre l'obliges-tu d'ajouter ses charmes aux tiens, afin de mieux temperer les vns par les autres, & de me conseruer la vie. Est-ce donc ainsi que les Deesses se communiquent plus familièrement aux mortels? Et leurs plus grandes faueurs sont elles si fort inegales à nos sens, que pour y participer, il faille qu'ils soient assoupis? c'est à dire demy morts de peur de mourir tout à faict. C'est pouruoir fauorablement à ce qui

m'en pourroit arriuer: Car ie ne doute point que si pour me gratifier de la sorte, tu me prenois autrement qu'endormy, tu ne me fisses mourir mille fois de trop de contentemēt; & que tu n'eusses la peine de me redonner la vie autāt de fois que tu me l'aurois ostée. Ainsi, Pyzandre, ie cognoissois le jour que i'estois homme, bien que la nuit me rendist pareil aux Dieux.

Pardonne moy, Diane, si d'auanture ie suis coupable de dire librement ce que nulle loy ne me commande de taire. Le sage, dit Pyzandre, tait la pluspart de ses pensées: mais quelle sagesse nous oblige de taire nos songes? Chacun se donne la liberté d'en parler à qui bon luy semble; & permet à sa curiosité d'en consulter toutes

fortes d'interpretes, pour tirer selō ce qu'il craint, ou ce qu'il desire, quelque lumiere de leur obscurité, & quelque verité de leur mensonge. Et puis on n'impute à personne les folies, ny les vanitez du sommeil auquel toutes choses sont permises. Il nous arriue à tous, Pyzandre, dit Endymion, de voir en dormant quelques images sombres, & confuses des choses qui occupent le plus nostre esprit quand nous veillons : mais d'auroir comme i'auois toutes les nuits, de continuelles visions de Diane : de voir si clair, ayant les yeux clos, & tous mes sens estans charmez, de goûter des douceurs si sensibles, dont le plaisir excedoit tout ce que i'en sçauois jamais dire, c'est vn secret que ie ne puis comprendre.






L'ENDYMION

DE GOMBAULD.



LIVRE SECOND.

 VELQUE temps apres,
ne pouuant pas tous-
iours me repaistre d'i-
mages vaines, ny d'as-
pects si fort esloignez, quoy que
fort agreables, ie desirois impa-
tiemmēt de reuoir sur la terre, celle
que ie voyois seulement au Ciel. A
quoy bien que Deesse, & Deesse en-

core fauorable, elle me sembloit apporter trop de longueur, & trop peu de resolution. I'osois me promettre, qu'ayant esté persuadée à me vouloir tant de bien, par les soins que i'auois eu de me tenir continuellement en sa presence, elle le feroit encores d'auantage par mes paroles. Et pour n'en perdre nulle ocafiõ, i'aymois pour l'amour d'elle la chasse, & la pesche, sçachant qu'elle preside à l'vne, & à l'autre. Mais c'estoit envain, car cependant que ie l'alloyis chercher aux lieux les plus deserts du Meandre, elle estoit peut estre aux riuers d'Eurote, ou de Penée, elle couroit quelque Lion en Getulie, ou quelque Cerf en Crete, ou quelque Tigre en Armenie. Il y a tant de riuieres, de forests & de montagnes plus

agréables que celles de Carie, tant de chemins douteux, & escartez, & tant de messagers, & de voyageurs dont elle a le soin, que c'eust esté merueille si ie l'eusse rencontrée. Je ne sçauois donc plus ce que ie deuois faire, ny à qui me conseiller, quand ie vins à me ressouuenir d'Ismene, avec qui i'auois vne assez familiere conuersation. Tu sçais bien l'estime qu'elle merite sur toutes les femmes, la grande science qu'elle a des choses diuines, & humaines. Apollon ne cognoist pas mieux qu'elle, la puissance, & la vertu des herbes: Et la Lune mesme ne descend pas du Ciel pour vne autre plus volontiers que pour elle. Veritablement, dit, Pyzandre, on tient qu'elle est capable de tout ce qu'elle veut, &

que la Theſſalie n'eut iamais ſa pareille. Vn iour, dit Endymion, ie reſolus de l'aller trouuer, & de faire tout ce qui me ſeroit poſſible pour charmer la plus charmante de toutes les femmes.

Iſmene, luy diſ-je, vnique honneur de ton ſexe, & de qui les mœurs, & les vertus, ne cedent pas meſme aux Deeſſes: De quelles loüanges ne t'honoreraſ-tu point, & de quels deuoirs ne te ſeraſ-tu point obligé, ſi tu me fauoriſes tant, que de me tirer de la peine où ie ſuis; car quiconque eſt affligé de corps, ou d'eſprit, recherche l'honneur de ta veuë, & te trouue incontinent fauorable. Ta rencontre eſt à tous de bon preſage, & en quelque part que tu ailles, tu eſt toujours plus deſirée, que tu n'eſ

pas presente. Mais comme tu es capable de faire le bien qu'on ne te sçauroit iamais rendre ; aussi faut-il de necessité que tu en trouues la recompense en la seule gloire qui t'en est deuë. Autrement qu'est-ce que tous mes efforts sçauroient adiouster à la felicité de celle qui n'a besoin de personne, & à qui sa propre vertu suffit pour toutes les choses qui luy sont necessaires ? Qui dispose esgalemēt des Dieux, & des hommes, & qui quand bon luy semble peut mesme changer l'ordre du destin, & de la Nature ! Que si tu veux vser en toutes choses de l'exemple des Dieux, le mal qu'ils peuuent faire, les fait craindre : mais leurs bien-faiçts principalement les font adorer. Et toute puissance est vaine, qui n'assiste

point, lors qu'elle est iustement reclamée. Iamais à ma requeste la nuit ne surprendra les hommes en plein iour: & la force des charmes ne troublera point le cours, ny la clarté des astres. On ne verra point à mon occasiō, retourner les fleuves vers leurs sources, ny grossir leurs ondes, tous les vents estans calmes. La semence des laboureurs ne passera point d'un champ à vn autre, pour frustrer leur esperance au temps de la moisson: & les montagnes, ny les forests ne changeront point de place, ny de possesseurs. Aussi ne demande-je point de toy, que tu troubles le repos ny des viuans, ny des morts: ny que les ombres reuiennēt, & qu'elles te respondent. Moins encores que par des philtres, ou d'autres breuua-

breuages contraires, tu faces naistre, ou mourir quelque amour. Je sçay bien que tu n'abuses iamais de ton sçauoir: C'est pourquoy les Dieux t'ayment, & t'augmentent tous les iours la cognoissance qui te rend pareille à eux mesmes. Mais bien te diray-ie que depuis quelque temps, vn iuste sujet m'oblige de visiter continuellement les lieux les plus escartez des riuages, des plaines, des bois, & des montagnes, pour trouuer s'il m'est possible l'occasion de reuoir la Deesse Diane, qui m'a quelques fois esté si liberale de sa veuë, & de ses promesses. En quoy premiere-ment, i'ose demander ton conseil, & puis quelque effect de ton pou- uoir, & de ta bonne volonté.

Lors apres auoir vn peu pensé

E

en elle meſme , leuant les yeux qu'elle auoit eu quelque temps attachez à la terre, elle me reſpondit ainſi. Je m'eſtimerois fort heureuſe, Endymion, de pouuoir trouuer l'occaſion de te ſeruir, que i'ay ſouhaitée avec tant de vœux, & que ie rechercheray touſiours parmy toutes ſortes de difficultez. Je t'aduoüeray franchement qu'il n'y a choſe ſi difficile, dont le ſçauoir, & la prudence , ne puiſſent venir à bout: Et que non ſeulement la Deeſſe que tu deſires voir, ſoit que tu la demandes en qualité de Lune , de Diane, ou d'Hecate; mais auſſi l'un, & l'autre Iupiter, & toute la troupe des Dieux enſemble, cedent en fin à la puiffance des charmes. L'importance eſt d'en bien vſer, de peur que la vengeance

ce n'en suiue de bien pres l'abus. N'as tu iamais oüy dire que Neme-
 fis vengeresse des forfaits, qu'on
 appelle autrement Adrastée, pour
 ce qu'elle est inéuitable, a son tro-
 ne assis sur la Lune, comme les Æ-
 gyptiens la representent: afin que
 de-là, elle voye plus clairement les
 actions des hommes, & qu'elle pu-
 nisse les audacieux, & les teme-
 raires? Ne sçais-tu point aussi que
 d'autres la mettent les fieux à
 la main inseparablement au co-
 sté de l'Esperance, afin que nul
 n'aspire impunément à ce qu'il
 n'est pas permis d'esperer. Si
 donc tu ne veux attirer sur toy la
 colere du Ciel, au lieu d'en tirer la
 Lune: il faut qu'elle soit appelée
 pour chose iuste: & puis prendre
 l'occasion d'un silence qui ne soit

point interrompu : que toutes choses reposēt iusques aux feuilles des arbres : pour ce que si le moindre bruit la surprend, auant qu'elle ayt touché du pied la terre, tu la verras remonter au Ciel encore plus viste qu'elle n'en fera descenduë. Les Dieux, Endymion, s'approchent difficilement des hommes; mais ils s'en reculent fort aisément; pource qu'ils ont tousiours plus de sujet de leur estre contraires, que fauorables: & le moindre inconuenient est capable de troubler, & d'interrompre les plus grands mysteres. Cestuy-cy particulièrement demande tant d'observation, & de subtilité; qu'il le faut desrober de la veuë de tous les Dieux, & de tous les hommes: & quand bien vn sommeil vni-

uersel auroit assoupy les vns & les autres, si est ce que la necessité, & la prouidence, nous apprenent que Iupiter seul ne dort iamais.

Si le Ciel, luy dis-je, Ismene, nous est si peu fauorable, peut estre que la terre nous le fera d'auantage. Et puis que la Deesse depart également son soin, & sa presence à l'un & à l'autre; si nous la pouuons trouuer par les forests, ou par les montagnes, qu'est-il besoin de chercher pour cet effect, les voyes les plus difficiles? Et de preuenir avec tant de hazard de la perdre, l'occasion qui d'elle mesme nous pourra suiure?

Veritablement, respondit elle, c'est vn autre moyen que ie te voulois dire, qui ne manque point aussi d'obstacles, ny de difficultez.

Car bien que quelquesfois on la puisse trouver dans l'Ionie mesme, ou en quelque autre partie de la Grece: tantost dans les bois de Marathon, ou d'Erymante, tantost sur les sommets d'Hymette, de Cytheron, d'Othrys, ou de Pinde, si est ce que le plus souuent il la faut aller chercher parmy les Sarmates, ou parmy les Garamantes; ou en quelque lieu du monde le plus secret, & le plus esloigné. D'ailleurs elle y est ordinairement accompagnée de ses Nymphes, que leur profession, & leur exercice ont rendu la pluspart si rigoureuses, & si peu capables de conuersation, que la presence des hommes seulement les offense; & peu s'en faut qu'elles ne leur declarent la mesme guerre qu'elles font aux bestes

les plus sauvages. Mais ce qui est de plus fascheux, & de plus insupportable à ceux qui desirent l'abord de la Deesse: C'est qu'il y en a d'entre elles qui ne la perdent non plus de veüe, que si le Ciel la leur auoit donnée en garde. Vne Doris, vne Laomedée, Nymphes ambitieuses, jalouses, & curieuses, la tiennent de si pres, & l'assiègent de de telle sorte, qu'elle n'est pas seulement inaccessible, mais aussi véritablement captiue. Encores seroit-ce peu de chose, qu'elles voulussent tout sçauoir, tout cōtreroller & tout conduire, si elles ne vouloiēt point aussi tout auoir. Il n'est pas croyable cōme les Dieux mesmes, aussi bien que les hommes, par ie ne sçay quel excez de bonté, & d'indulgence, se laissent mener in-

siblement à l'appetit de ceux qu'ils aiment. Si bien que pour trop gratifier vne seule, ou deux , ou trois personnes ; il semble qu'ils diminuēt beaucoup de la liberalité qu'ils doiuent à plusieurs, que ie ne die, à tout le monde. Vn petit nombre est comblé de leurs bien-faiçts, cependant qu'une multitude en patit, accuse en vain le Ciel, & deteste la façon de gouverner, avec la vie, & la lumiere. Dironsnous pourtant que les Dieux en soient moins iustes? Non , mais disons plustost qu'ils gouvernent toutes choses, comme il plaist à la Destinée, selon l'innocence, ou la corruption des siecles. Ce que ie te dis , Endymion, pour l'affection que ie te porte, afin que tu n'oublies rien à considerer.

Ismene luy dis-je , que ie voye Diane, & que ie meure : peut estre luy prendra-t'il encore quelque enuie de parler à moy. Pour meriter cette faueur, ie suis content d'exposer ma vie à toutes sortes de perils; & s'il m'arriue de la perdre, ce ne sera point à regret, pourueu qu'elle sçache seulement que c'est pour l'amour d'elle.

Ah Dieux! dit elle alors, que ma memoire me fait souuent de mauvais offices; & que i'ay grandement abusé du temps, & de ta patience. N'est-ce pas-là mon songe de cette nuit, qui m'a predict tout ce que tu me viens de dire? & où i'ay veu Diane mesme, qui m'a ordonné ce que ie deuois faire, & m'a monstté les moyens, que tout à cette heure i'estois en peine de

trouver ? Voicy tout à propos le temps qu'elle quitte le Ciel pour passer quelques iours sur la terre. Je sçay dans le monde vne grande forest consacrée à la Deesse, où la beauté des lieux , & l'innocence des peuples l'obligent de se tenir souuent , & de se plaire. C'est-là qu'elle tient ordinairement son char , & ses armes. C'est-là que la quantité des bestes sauvages luy rend la chasse plus diuerse , & plus agreable qu'en nulle autre part. Trouue-toy le iour du Soleil, vers le soir, aux sommets de Lathmos : & le lendemain qui sera le iour de la Deesse, ie tascheray de faire qu'il te soit heureux, si d'avanture ta félicité ne consiste qu'en l'honneur de sa veuë.

Sur cette resolution, Pyzandre,

qui fut faicte le iour de Venus, ie pris congé d'elle, iusqu'au tēps qu'elle m'auoit ordonné, qui me dura tant à venir, que i'aurois de la peine à te dire, si mon impatient desir me donna plus d'inquietude, ou mon esperance plus de soulagement. Mais surtout, le iour du Soleil me sembla si long, que i'eusse bien voulu haſter le Soleil meſme, & le faire precipiter à son couchant.

A la fin les ombres des forests, & des montagnes commencerent à croistre, & l'auancourriere du iour, & de la nuit; qui paroist tousiours la premiere en la carriere celeste, y auoit deſ-ja ſa lampe allumée; l'Occident eſtoit auſſi rouge que s'il euſt recueilly dans ſon ſein tout le feu du monde : ou ſi la

cheutte de quelque autre Phaëton y eust fait vn nouuel embrasemēt. Tels sont ordinairement les soirs qui presagent à l'aduenir plusieurs beaux iours sans trouble, & sans nuage; & tel deuoit estre celuy qui promettoit le lendemain la veuë de Diane: Quand voicy venir Ismene, qui montoit aussi gayemēt sur le sommet où ie l'attendois, que si Mercure l'eust conduite, ou les Zephirs l'eussent portée. Qu'est-ce-là, dit elle à l'abord, Endymion, si ton cœur n'est meilleur que ton visage, comment penses-tu venir à bout de ton entreprise? Il semble que tu n'ayes pas dormy depuis le iour que tu m'as laissée, tant tu es defaict: Je m'e suis bien doutée, que l'inquietude de ton esprit ne permettroit point à ton corps de

prendre de repos, & preuoyant le mal, ie n'ay pas manqué d'en apporter le remede. Voicy dequoy, dit elle, me monstrant vne petite phiole. I'estois il y a quelque temps au Royaume du Sommeil, où ie puisay cet eau à la fontaine, qui arrose ses iardins, & qui fait croistre ses pauots, & ses mandragores, l'vne des sources du fleuve Lethés; prens-en seulement deux ou trois gouttes, & tu dormiras, ie t'en assure, du meilleur somme que tu ayes dormy en ta vie. Aussi bien est il necessaire que tu reposes cependant que ie trauailleray, de peur que ton impatience ne me trouble. Ces mysteres, Endymion, demandēt le repos, & le silence, & ne veulent point d'autres spectateurs, ny d'autres telmoins, que ceux-là

qui les pratiquent, & qui sont destinéz à cet office. Oste moy donc, ie te prie l'apprehension de ton inquietude : ne ruine point tes desseins par ta curiosité, ny par ta presence : & de quelque costé que ie me tourne, que i'aille, ou que ie vienne, laisse moy faire du tout à ma liberté; de peur que tu ne sois outre mesure estonné de voir des choses incroyables, & qu'en fin mesmes la terreur ne te saisisse. Car que dirois-tu, si tu me voyois tantost descendre du Ciel, avec le chariot de la Lune? Je fis tout ce qu'elle me dit m'en allant coucher dans cette grotte, ou ie sentis bien tost la grande vertu de si peu d'eau que i'auois prise, dont ie fus tellement assoupy, que si personne ne m'en eut resueillé, ie croy que i'y eusse

dormy eternellement.

Le silence, comme il est à croire, estoit par tout, & les Astres auoient des-jà bien auancé leur course, quand voicy, que sans sçauoir ce qu'auoit fait Ismene, ny qu'elle vertu d'herbes, de gestes, ou de paroles, ny qu'elle force d'animaux, ny en fin quelle puissance celeste, ou terrestre elle auoit employée. Je me sentis trāsporter avec beaucoup de plaisir & fort peu d'apprehension; ie ne sçauois dire si c'estoit dans vn char d'yuoire, ou d'ebene, ny s'il estoit attelé de cheuaux ou de dragons, car ie voyois le moins ce qui estoit le plus près de moy; semblable aux hommes vains, & ambitieux, qui voyent tousiours plustost les choses esloignées, qu'ils ne se voyent pas eux

mesmes. Je ne sçauois dire si c'estoit par l'industrie d'Ismene, ou par l'inspiration de quelqu'un des Dieux, ou si Morphée me donnoit de si claires visions. Mais ie cognoissois les choses que ie n'eusse point cognues ayant les yeux ouuerts iusqu'à discerner les montagnes, les fleuves, & les prouinces, sur lesquelles i'estois porté. Vne seule rencontre me donna de quoy péser dès le commencement: Ce fut qu'au mesme instant que ie me sentis esleuer, i'entendis vne voix en l'air, & vis vn monstre qui auoit seulement vn visage de forme humaine, & en tout le reste celle d'un oyseau, & qui me suiuit iusques à tant qu'il m'eust dit ces paroles. Va-t'en à la mal-heure, & puisses-tu faire mentir l'Oracle qui


qui dit que quelqu'un de ta race doit oster à la Ville d'Olympie vne partie de sa gloire , en bastissant vne autre à la memoire de son nom, où nos jeux celebres doiuent estre vn iour transferez. Pize, Pize, tu n'es point encore au monde, & des-jà ta renommée m'est importune. I'eusse eu de quoy m'estonner de cette premiere vision; si ce que i'entendis de l'Oracle ne m'eust donné plus d'esperance, que les premieres paroles ne me donnerent de crainte. Mais ie ne scauois point ce que vouloit dire ce mot de Pize, sinon que ce fust le nom de quelque Ville, qui deuoit vn iour estre bastie par quelqu'un de mes descendans. Et quand au reste, ie creus que c'estoit le Demon d'Olympie qui parloit

de la sorte, ou à tout le moins quelque Magicienne du lieu mesme, qui auoit pris la forme d'un oyseau pour voler parmy les tenebres. Ainsi tirant tousiours du costé de l'Orient, & porté d'un mouvement tout diuin, & tout celeste, ie trauersay comme en vn instant la Lycie, vne grande partie du mont Taurus, la Lycaonie, la Tyanée, le fleuve Melas, le mont Argée, & toute la Cappadoce, iusques à l'Euphrate, que ie commençay de voir dans l'Armenie mineure, & duquel bien tost apres dans la majeure, ie remarquay les sources au mont Periardes si renommé pour sa fertilité : puis tournant tant soit peu du costé du Septentrion, ie passay le fleuve Araxes près de son emboucheure comme

LIVRE SECOND. 83

il se va rendre dans la Mer Caspienne.

F ij.



En fin apres auoir encores tra-
uerfé quelques montagnes, ie me
trouuay comme en vn lieu de re-
pos, où ayant demeuré quelque
peu de temps au mesme assoupisse-
ment que deuant, je sentis Isme-
ne, qui me tirant par la main, me
fit leuer, & me dit : à cette heure
il est temps d'aller, Endymion : à
cette heure il est besoin de resolu-
tion, & de courage. Mets ton espée
à ton costé (car elle auoit eu soin
de l'apporter de la montagne.) Ti-
re la hors du fourreau, & qu'elle
luisse dans ta main sans t'émouuoir
beaucoup pour quelque rencon-
tre que tu faces. Car tu n'as icy af-
faire qu'avec vn peuple vain, & le-
ger, qui ne pouuant supporter la
clarté, est contraint d'errer parmy
les tenebres ; & qui au lustre du fer

seulemēt fremit de crainte. Quelques monstres qui te suiuent, ou qui se presentent à toy, ne t'en estonne point, & sçache que leurs formes les rendent beaucoup plus espouuentables que leurs forces. Va-t'en le droit chemin, & surtout quand tu seras à la forest, où tu dois voir la Deesse, donne toy garde de couper, ou de rompre ny branche, ny feuille, car le lieu est sacré; & peut estre offenserois-tu sans y penser quelque Nymphé, à qui par la faueur de Diane, il est donné de viure vne seconde vie, & de passer plusieurs siecles sous l'escorce d'un arbre. Pour moy i'auray tant de soin de sçauoir où tu seras, comme i'ay sçeu où estoit Diane: que si quelque peril te menace, tu n'auras pas

si tost prononcé trois fois le nom d'Ismene; que tu me verras presente à ton secours. Et si ton aventure est telle, que sans les Dieux mes forces ne soient pas suffisantes pour te deliurer; ie feray plustost violence aux Dieux mesmes, & tireray la Lune du Ciel, afin qu'elle te tire de la peine où tu te feras mis pour l'amour d'elle.

Sur ces assurances ie me resolu de marcher au trauers de l'obscurité, où tout ce que ie pouuois faire c'estoit de voir le chemin que ie deuois tenir. A peine eus-je fait trois pas, que pensant tourner les yeux vers Ismene, ie ne la vis plus, & ne sçeus ce qu'elle deuint. Ie ne pense point qu'il y ayt de courage qui alors ne se fut estonné. Car ie me vis enuironné des plus effroya-

bles monstres qu'on sçauroit imaginer; & qui sembloient estre nez d'une telle confusion, qu'on n'en pouuoit aisément discerner ny le sexe, ny les especes. L'Afrique n'a rien de prodigieux, qui ne fut de la partie. Les Hydres, les Gorgonnes, & tant de sortes de Chimeres se presenterent à moy, que i'eusse eu beaucoup de peine à me resoudre, & tout suiet de craindre que ie ne fusse transformé moy-mesme par l'horrible aspect de leurs formes: si me souuenant de ce que m'auoit dit Ismene, ie n'eusse plus adiousté de foy à mes oreilles qu'à mes yeux. Si ie pensois tourner la teste pour regarder en arriere, ie me voyois poursuiuy d'une infinité de bestes sauuages toutes prestes de me donner quelque attainte,

ou de me deuorer , & quelque effort que ie fisse, pour en éuiter ou la poursuite, ou la rencontre, ie ne pouuois non plus hafter le pas, que si i'eusse eu les fers aux pieds, ou si quelque charme les eust retenus. D'ailleurs ie voyois à tous momens courir des Centaures qui trauersoient mon chemin , & qui cherchoient continuellement ce qu'ils ne pouuoient iamais trouver. Tantost ie voyois voler des Harpyes qui rauissoient tout de toutes parts, & qui tiroient mesmes tribut des morts. Tantost ie ie me trouuois au milieu d'un peuple difforme , & parmy ie ne sçay quels hommes vains, fantasques, & muables , qui s'assembloient mille fois pour neant : & dont les vns estoient boiteux, vouëtez, & contre-

faicts, & les autres gresles, & foibles, & rarement en voyois-je qui fussent bien formez. Mais si leurs formes estoient miserables, & vaines, aussi estoient leurs exercices. Car les vns se trauailloient à faire de mauuais edifices sur les ruines de leurs séblables. Et les autres, parmy les tristes reliques des embrazemens, remuoient routes choses pour chercher des tresors, & ne trouuoient à la fin que des charbons ardents. Les vns vendoient de la fumée, & les autres des fruiets du jardin de Tantale. Et bien que ces choses me semblassent estre de nul vsage, si est ce qu'elles ne laissoient pas d'estre bien cher achetées.

Or des-jà vne petite partie du Ciel commençoit de blanchir vers

l'Orient, & d'annoncer d'un bout du monde à l'autre, le leuer de l'Aurore: Quand tous ces objets commencerent aussi d'estre plus rares, & moins visibles, & en fin de disparoistre: Ou à tout le moins les Scylles, & les Meduses, estoient conuerties en rochers, & en arbres, & les Serpens en roseaux cassez. Peu de temps apres ie vis paroistre vne grande forest qui sembloit se resiouyr de la venue du jour, & d'as laquelle ie fus bien auant à l'ombre, plustost que le Soleil n'eust monsté ses premiers rayons. Puis que ce jour-là, dit Pyzandre, tu deuois auoir l'honneur de voir Diane; c'eust esté trop de voir deux si grandes lumieres en un mesme jour. L'esperance de cette veüe, dit Endymion, m'eslou-

uoit plus que de coustume, & l'incertitude de ce qui me deuoit arriuer, me donnoit tantost vne pensée, & tantost vne autre; ne sçachant pas mesmes ny le lieu, ny le temps, auquel ce bon heur m'estoit destiné. Cependant ie considerois la grosseur, & la hauteur des arbres, avec la large estenduë de leurs branches, qui representoient vne si grande antiquité, qu'ils sembloient estre nez avec le monde. Nymphes immortelles, disois-je en ma pensée (car les lieux estoient si sombres & si muets, qu'il n'estoit pas permis ce me sembloit d'ouurir la bouche, pour y soupirer seulement ;) O Hamadryades! que de Cerfs, & de Corbeaux dont la vie est si longue, ont eu loisir de viure & de

mourir : & que le Phenix mesme s'est peu renouveler de fois depuis vostre naissance ! Ainsi ie continuay long-temps de marcher ; quand au lieu de voir croistre la lumiere, il sembloit que ie demeurasse tousiours entre la nuit & le jour : & mesme ie croyois suivre les tenebres, & me retirer avec elles, tant ie voyois de plus en plus espaisir les ombres. Le silence & la solitude auoient ie ne sçay quoy d'horrible & d'effroyable qui ne me donnoit pas moins d'estonnement, que les monstres que ie venois de laisser. D'ailleurs ma route estoit si fort diminuée que ie n'y cognoissois plus rien : & plus j'allois en auant, plus les lieux me donnoient vn certain respect deux-mesmes, qui me faisoit iuger

qu'ayant perdu les traces des hommes, ie n'estois pas loin du séjour des Dieux. Et en effect ayant leué la teste, ie vis vn Tableau attaché à vn arbre qui excedoit en grosseur, & en grandeur tous les autres, où il y auoit escrit en grosses lettres, N'ARRESTEZ POINT ICY MORTELS, SI VOVS NE VOVLEZ BIEN TOST SOUFFRIR LA PUNITION DE VOSTRE TEMERITE'. A peine auois-je acheué de lire ces paroles, que ie sentis trembler la terre souz mes pieds, & les cymes des arbres en furent esmeuës. Ces choses eurent bien le pouuoir de m'arrester, mais non pas si tost de me faire destourner, i'estois des-ja tellement accoustumé de voir des prodiges, & des monstres, qu'il me falchoit

de fuyr deuant les Dieux mesmes. Que pensois-tu faire, dit Pyzandre, il n'y a point de valeur, ny de force humaine qui ne doiuent ceder incontinent aux menaces des Dieux. Et quiconque feroit si temeraire que de leur vouloir tant soit peu resister, il monstreroit seulement qu'il auroit trop de courage à se perdre. Vne seule consideration, Pyzandre, dit Endymion, me fist en fin resoudre à me retirer de là. C'est la coustume que i'ay (par ie ne sçay quelle destinée) de n'auoir iamais d'aucun, grand bien que les apparences, les commencemens, les promesses, & les esperances. Si bien que i'eus quelque apprehension, que le Ciel se lassant des-ja de m'estre fauorable, au lieu de Diane que j'allois

chercher ne me fit rencontrer Hecate dont la seule presence rend les hommes insensés, ou les transformant en pierres, leur oste du tout le sentiment. Et de fait i'ouys tout à l'heure vn bruit effroyable, & tel que celuy des chiens qui hurlent parmy les tenebres, & tout ensemble des Lions qui rugissent & des Serpens qui siffent, & quelque chose encore de plus estrange, que l'exemple d'aucune voix ne scauroit representer. Ce qui croissoit de plus en plus, & s'auançoit comme vn vét qui se leue, murmure, & gronde contre les bois, & les montagnes qui resistent à son cours, & retardent sa violēce, ou comme la pluye, & l'orage, ont tousiours quelque bruit auantcoureur de leur venue, qui semble nous ad-


uertir

uertir, & nous donner le temps de nous mettre à couuert deuant qu'ils viennent fondre sur nos tefles. Lors ie continuay de plus en plus d'adjoufter la crainte à la confideration; mon visage pallit, mes cheueux se dresserent, & ie fus tout faisi d'horreur, & d'effroy. Il me fut bien force de quitter la place, & de trouuer des voyes où mesmes il n'y en auoit point. Ie ne ne fçauois de quel costé me tourner, & m'en allant en desordre au trauers de la forest, ie commençay de desesperer de ma fortune & de me repentir de mon entreprise. Mais quand nous defaillons à nous mesmes, & que nous sommes au bout de tous nos conseils, que nostre prudence n'y voit plus goutte, & qu'elle demeure confu-

se, c'est lors que les Dieux se font voir, & qu'ils se remoignent puissans, & fauorables à ceux qui implorent leur assistance, & qui se commettent entierement à leur garde. Si bien que ce qui n'aguere me tenoit lieu de mauuaise rencontre, me fut vne adresse pour me conduire à ce que je desirois trouuer. C'est l'erreur ordinaire des hommes que de mettre au rang des malheurs & des peines, les moyens qui les font paruenir à leur felicité. Car je ne fus gueres loin, que je vis reluire deuant moy ie ne sçay quelle clarté, dont les rayons d'argent faisoient comme vn jour à part, & chassant d'alentour d'eux les tenebres, rendoient bien auant les ombres moins obscures. Bien-tost apres, je vis pa-

roistre vn Croissant plus clair que les estoilles, & à qui est deu le premier honneur apres le Soleil. Mes yeux en furent soudain esbloüis, & mon cœur esmeu d'un battement continuel, que j'auois peine d'arrester. En fin ayant rassuré ma veüe, je recognus que c'estoit Diane, qui selon ce que je peus juger auoit les yeux sur moy deuant que je l'eusse apperceüe, pour-ce que l'apprehension que j'auois eüe, ne me permettoit pas tant de penser à ce qui estoit deuant moy, qu'à ce qui me pouuoit suiure. Je m'arrestay tout court, & sentis mon ame en ce mesme instant faisie de ioye, & ensemble de respect & de crainte. Mais voyant que ses regards estoient aussi doux que de coustume, je pris la har-

diessé, toutes fois lentement, & à la
desrobée, de m'auancer encore de
quelques pas, iusqu'à tant que
je peusse mieux recognoistre les
lieux, & les personnes, pour-ce
que les branches, & les feuillages
me cachoient toute sa compa-
gnie, & en partie la Deesse mesme.





Lors je la vis assise sur vne roche, que pour luy seruir seulement la Nature auoit esleuée à la hauteur d'un siege. De là sourdoit vne fontaine autour de laquelle estoient quelques Nymphes sur de petits gazons fleuris: dont les vnes ayant leurs testes appuyées sur leurs mains, & leurs coudes sur leurs genoux, sembloient dormir, ou resuer profondement au murmure de l'eau courante: Les autres toutes panchées se miroient dedās: & quelques autres que je ne pouuois pas bien voir, estoient couchées par cy, par-là sur l'herbe. Mais sans me diuertir beaucoup à considerer les particularitez du lieu, j'auois tousiours les yeux sur Diane, qui le plus souuent aussi les auoit sur moy. Et sans doute, Pyzandre,

s'il est vray que les yeux soient les veritables tefmoins de l'ame, elle auoit quelque dessein de parler à moy: Quand vne Nymphé qui estoit la plus pres d'elle, & qui auparauât s'amusoit à escrire sur la roche avec la pointe d'une fiesche, vint à leuer la teste, & peu de téps apres à m'appercevoir. Incontinent toute esmeuë elle se tourna vers Diane: Hé Deesse ! dit elle, qui est le temeraire qui te regarde impunément ? Quel priuilege a-t'il de se trouuer en ces lieux, & de se presenter deuant toy. - Vrayement il ne tient pas à luy qu'il ne soit des-jà receu parmy nous, & qu'il n'ayt part à toutes nos actions, & à nos secrets. Puis prenant son arc, & y accommodant la fiesche dont elle escriuoit auparauant ; Permetis moy,

dit elle, que j'abbate d'un coup, l'homme, & son audace. Non, non luy respondit Diane en riant, s'il doit mourir, il faut qu'il meure de ma main. Au mesme temps elle appella vne Nymphhe qui estoit derriere elle, & de qui, comme tu scauras apres, i'appris tout ce qui s'estoit passé. Apporte moy, luy dit elle tout bas, ces deux petits faisceaux de flesches, que nous donna l'autre iour le fils de Venus quand nous passames par la forest d'Idalie. La Nymphhe ne fit que se baisser pour les prendre, & les luy presenta incontinent. Lors Diane, (O deliurance cruelle! ô moyen de me sauuer, pire que la volonté de me faire mourir!) les ayant desliées, commença de m'en tirer vne, & puis vne autre; sans faire

routesfois beaucoup d'effort : car se sont des fleches qui partent presque d'elles mesmes, & qui ne manquent point de donner au but où l'intention les enuoye, & principalement estant conduites de la main de Diane. Elles eschappent quelquesfois à l'innocence mesme, & ne font pas moins de mal que si elles estoient accompagnées du dessein. Le plus souuent aussi les Nymphes s'en seruent par trahison, & par malice, prenant plaisir de faire à autruy le mal, dont elles ne veulent jamais auoir de pitié, ny de sentiment. Voyant donc que Diane continuoit de me les tirer toutes les vnes apres les autres : Ah Deesse ! disois-je, mais elle ne l'entendoit pas, que penserai-je de faire ? Sçais tu bien au moins la

vertu de ces fleches ? peut estre les espans-tu par mespris, à cause qu'elles te semblent si foibles, & si legeres. N'estoit ce pas assez de m'en tirer vne, ou deux seulement droit au cœur des-ja tout accoustumé d'estre blessé de tes traicts ; sans m'en couvrir depuis la teste jusqu'aux pieds. Je tins ferme, Pyzandre, tant qu'il me fut possible, mais à la fin comme elle m'en eut remply les yeux, & que j'en fus du tout aveuglé : le sentis vn si puissant venin qui se glissa dans mes veines, que perdant peu à peu l'usage de toutes mes forces, ie me laissay tomber au pied d'un arbre. Là je me sentoïis mourir d'une mort continuele, & si je ne voyois point de fin à ma vie : mais il sembloit

qu'en moy la vie & la mort disputassent avec pareilles forces, à laquelle des deux je deuois estre: & l'extrême douleur que j'en ressentois me persuadoit à tout moment que la mort s'en alloit estre la plus forte. Si bien que perdant l'esperance de parler jamais plus à Diane; j'abandonnois ces plaintes au hazard qu'elles fussent portées iusques à ses oreilles.

Donc le seul desir de te reuoir, Deesse, m'a faict exposer ma vie à tout ce que le Ciel & la Terre, ont de dangers, pour venir receuoir la mort de tes mains! & tant de monstres ne m'ont espargné que pour me reseruer à tes rigueurs! Qui eust jamais pensé que de tous les perils qui me menaçoient, le plus redou-

table eut esté la rencontre de Diane ? Dequoy suis-je si coupable, pour meriter d'estre puny d'un si soudain changement ? Il semble qu'aujourd'huy tu consultes entre la hayne, & la bienueillance, laquelle des deux tu dois exercer sur moy. Comment accorderas-tu la qualité de Deesse, avec tant d'irresolution & d'inconstance ? Toutesfois tu ne perseueres que trop à me faire esprouver les traits qui partent de tes yeux, & de tes mains ; Tu m'en as tellement couuert, que ma playe est vniuerselle, & qu'il ne reste plus de lieu sur moy capable de receuoir vne seule attainte, si d'auanture tu ne veux faire d'autres playes dans les playes mesmes. Je ne te demande pour tout reconfort, sinon que mourant par

tes mains, il me soit au moins permis de te le dire: & que si tu prens tant de plaisir à ma douleur, tu daignes en escouter la plainte: c'est elle qui t'en tesmoignera la violence: Ou bien monstre que tu es véritablement Deesse, & que tu lis dans mon cœur, ce qu'en vain ma parole se traueilleroit de te faire entendre.

En cet estat incertain de ma bonne, ou de ma mauuaise fortune, Pyzandre, où la destinée sembloit douter elle mesme de ce qu'elle deuoit faire de moy: Je ne laissois pas de m'estimer trop heureux d'auoir veu Diane, & de ne souffrir de mal que celuy qu'elle m'auoit fait. Et bien que mon bon-heur fust continuellement accompagné de mes plaintes, le

fuiet me les rendoit si douces, & si honorables, que quiconque ne se pouuoit plaindre de la façon, me sembloit digne d'estre plaint, ou d'estre mesprisé. Car si d'un costé, ie faisois l'experience de tout ce que peut la douleur; aussi d'ailleurs ressentois-je les douceurs d'une felicité qui n'est point commune aux autres mortels, sinon lors qu'il plaist à quelqu'un des Dieux de les raur d'aïse, & de gloire, en les honorant de sa veuë, & de sa presence. Et de fait comme si quelque Deité se fust approchée de moy, pour en chasser la mort, & pour m'en defendre, ou comme si la main mesme qui m'auoit faict le mal, m'en eut apporté le remede; Je sentoïis au milieu de ma plus forte passion, vn air gracieux, vn

vent fauorable, vne douce haleine qui sembloit sortir d'une bouche diuine ; & quelque chose encore qui ne se peut exprimer qu'en fouspirant : En quoy il y auoit vn meſlange de douceur, & d'amertume, ſi bien temperé de l'une, & de l'autre, que le mal ne ſeruoit que d'une ayde neceſſaire pour en augmenter le bien.

I'eſtois en cet extaſe, où me reduiſoiēt les delices que ie trouuois en ma douleur meſme: Quand i'entendis vne Nymphe, qui appellant vn chien, crioit à haute voix, Lycanthe, Lycanthe, & qui cherchant de tous coſtez, en fin s'approcha de moy : & m'ayant quelque peu conſideré: Hola, dit elle, dors-tu? Ouy que fais-tu là? ſouffres-tu quelque mal? Pour ceſte fois je ne luy

ſçeus

fçeus respōdre que par vn soufpir. Mais continuant, elle me dit, Parle à moy ie te prie, & me declare ta peine. Alors ie luy respondis. Helas ! comment me demandes-tu si ie souffre, me voyant tout percé de fiefches ? Qu'est-ce que tu veux dire, dit elle, tout percé de fiefches ? Refues-tu ? Ouure les yeux, Regarde moy, ou plustoft regarde-toy toy mesme. Comment dis-je ouuriray-je les yeux, où i'ay plus receu de coups qu'en nulle autre part ? Oüy vrayment, dit elle en se baiffant, & m'ouurant les paupieres avec les doigts, voyez qu'ils sont bien malades ; Lors non sans quelque estonnement, ie vis la lumiere dont ie pensois estre priué pour iamais. Puis comme elle m'eut tiré par vn bras, ie me mis

en deuoir de me leuer, & demeurant quelque temps assis ; la premiere chose que ie fis, ie tournay les yeux du costé où estoit Diane, mais ie ne la vis plus, ny personne de sa compagnie, hors mis la Nymphé qui estoit aupres de moy. Apres venant à me cōsiderer moy-mesme, ie ne vis non plus ny les fiesches, ny les playes dōt ie me plaignois si fort, & si mon cœur ne laissoit pas d'en sentir la violence, & d'en soupirer à tous moments. Mais comme ie pensay dire, en me leuant, qu'ay-ie fait ? bons Dieux ! pour meriter de seruir de butte à tous les traits de Diane ? Est-ce ainsi, dit la Nymphé, que tu recognois la grace qu'elle ta faicte de te sauuer la vie ? Car tu estois venu t'exposer à la mercy des Nym-

phes les plus ennemies des hommes, & les plus rigoureuses qu'on ſçauroit voir; & que pas vn ne viét jamais chercher en ces folitudes, & à ces fontaines, ſans encourir bien toſt la peine de ſa curioſité. Lors ie la priay de me dire ce qui s'eſtoit paſſé ſur mon ſuiet: ce qu'elle me raconta, comme ie t'en ay deſ-jà dit vne partie. Mais ce n'eſt rien de nouveau, dit elle, de voir la Deeſſe portée à te gratifier. Qu'eſt ce qu'elle ne dit point de toy l'autre jour en l'aſſemblée des Nayades, & des Nereides, vers l'emboucheure du Meandre, entre Milet, & Priene? Et meſme parlant à nous, qui la ſeruons plus particulierement, Voicy dit elle, le pais d'Endymion: Il y a quelque temps que ie ne l'ay point veu: ſçachez aujourd'huy

des Nymphes de ces lieux, & de luy
mesme, s'il est possible, quel séjour
le retient d'ordinaire, quel soin
l'occupe, & ce que nous pouuons
faire pour son contentemēt. Que
si d'auanture il se presente en quel-
que part que nous soyons, quand
ce seroit aux lieux les plus solitai-
res, & les moins frequentez des
hommes, ne l'empeschez point de
me voir, soyez luy fauorables, &
que vostre rigueur ordinaire ne le
rebutte point. Et de fait, me dit la
Nymphé, il n'y a pas vne des
Dryades, des Napées, ny des Orea-
des qui ne sçache ton nom, sans
te cognoistre, & qui ne l'ayt appris
de l'estime qu'elle fait ordinaire-
ment de toy: Elle en parle aux
Syluains, & aux Faunes: elle en
parle aux Dieux celestes. Belle

Nymphé, luy dis-ie, à ce que ie voy, tu sçais bien que la Deesse m'a tousiours gratifié de quelque particuliere bienueillance. Oüy, oüy, respondit elle, je le sçay bien. Ne trouue donc point estrange, luy dis-je, si du mesme sujet que i'ay de me contenter, ie tire celuy que i'ay de me plaindre. Car comment se peut accorder cela, qu'elle me veuille si long-temps le bien qu'elle ne me fait iamais? Je ne sçay quelle humeur contraire à soy mesme, qui resiste à ce qu'elle veut, incertaine de ce qu'elle doit faire, & tardiue à se resoudre, me fera perdre à la fin ce qu'elle me differe incessamment: & le temps qui cōme luy fait changer toutes choses, luy donnera tant d'autres diuertissemens, que toute cette

bonne volonté s'estant esvanoüie, elle pensera mesme qu'elle ny aura iamais pensé. Et lors en vain accuseray-je les Dieux d'estre muables, & de donner des paroles aussi bien que les hommes. Ne croy point cela, dit la Nymphé, mais souuién toy que les Dieux mesmes sont emmenez par le destin, & cedent à la Necessité. Sçache qu'elle n'a pas pour elle le repos qu'elle donne aux nations. Comment penses-tu, qu'elle puisse satisfaire, ie ne diray pas à tant de personnes. mais à tant de peuples differents qui desirent sa faueur & sa presence? Tantost la Scythie la demande, tantost la Grece, & tantost l'Ethiopie. Mais que dis-je? Tout le monde luy fait des vœux. Quelle terre est visitée du Soleil, qui ne le

soit aussi de Diane, & de sa renommée? & s'il faut qu'elle se trouue partout, comment pourroit elle estre long-temps en vn lieu? Tous ces grands soins des plus importantes affaires du monde n'ont point empesché que tu n'ayes eu beaucoup de part en sa pensée, & qu'elle n'ayt parlé plusieurs fois de ton merite. Encore aujourd'huy elle m'a tres expressement commandé de t'asseurer qu'elle se souuient fort particulièrement de toy, & que l'occasion de te le témoigner luy sera fort chere. Si cela ne te suffit, & si tu as quelque chose à luy dire, trouue-toy demain au plus haut du jour vers la montagne prochaine, en la vallée des pins: & si tost que ie m'en seray apperceuë, ie la tireray seule à

l'escart de toutes ses Nymphes, où je m'asseure qu'elle te donnera toute la commodité de parler, que tu sçauois justement desirer d'une Deesse. Belle Nymphé, luy dis-je, tu m'obliges tant, que tu te rends ma vie eternellement sujette. Mais encore me permettras-tu de te dire ce que tu sçais mieux que moy, que la distance, & l'inegalité qui est entre les Dieux, & nous, est si grande, que tant s'en faut que nostre ambition les regarde, & que nous puissions leur porter enuie sans estre ridicules, que mesme nous ne pouuons les aymer, si premierement ils ne nous ayment: mais aussi si tost qu'ils nous preuiennent, c'est à nous de les suyure avec toute sorte de soin, & de diligence: & c'est ainsi que ie re-

cherche l'honneur de parler à Diane ; n'ayant toutesfois rien à luy dire , qu'en suite de ce qu'il luy a pleu me gratifier la premiere , & qu'elle a desiré plusieurs fois de parler à moy sans y estre portée d'autre sujet que de son inclination, & de sa bienueillance. Que si le malheur m'en vouloit tant , que le temps luy en eust osté la volonté , ce seroit avec iuste raison , que le respect m'en osteroit la hardiesse , & m'imposeroit vn eternal silence. O ! que ie serois heureux , si luy en prenoit quelque fauorable enuie ! J'auray soin de luy en rendre demain l'occasion presente , selon l'aduis que tu m'en donnes. Bien , dit-elle , c'est à toy d'y penser : il est temps que ie m'en aille , Adieu. Et me monstrant le chemin que

ie deuois tenir, elle m'obligea de prendre de sa main, & de gouster de certaines douceurs si delicieuses, que ie luy demanday si c'estoit pour finir mes douleurs, ou bien pour les faire durer dauantage, & me rendre immortel avec elles. Et voyant qu'elle s'en alloit sans me respondre que par vn ris seulemēt; Adieu, luy dis je, la plus courtoise, & la plus honneste de toutes les Nymphes; ie ne te puis souhaiter de plus grande felicité que la continuation de celle dont tu es en possession, qui est d'estre tousiours aupres de Diane. Ainsi ie m'en allay repassant mille fois en ma pensée, tout ce qui m'estoit arriué: Tantost louiant, & tantost ozant accuser Diane, de ce que luy estant si facile de me rendre plus heu-

reux, elle me laissoit tousiours en doute, & en inquietude. Cependant comme i'estois des-jà lassé, le chemin me sembloit croistre, & le iour diminuer. Quand j'apperçeus quelques traces d'hommes, & iugeay, selon l'apparence, que ie n'estois plus exposé à nul danger. En fin i'acheuay ma iournée avec le Soleil, qui ne faisoit gueres que d'arriuer au bout de sa carriere, quand ie me vis au bout de la forest; où ne descouurant rien que des montagnes, & ne voyant point de retraite meilleure que dans la forest mesme; apres auoir choisi de l'œil vn lieu propre pour me reposer, ie m'en allay coucher au pied d'un Myrthe, où la mousse estoit plus espaisse qu'en nulle autre part, comme si mon sort m'eust

conduit où la Nature auoit préparé de long temps vn lit pour mon repos.





L'ENDYMION

DE GOMBAULD.



LIVRE TROISIEME



PEINE la Nuit, &
le silence, auoient
rendu toutes choses
tranquilles, & muet-
tes, quand i'esprou-
uay bien tost que le Sommeil ne
desdaigne point les lits sans arti-
fice, & comme on dit, qu'il se
tient plus volontiers aux cabanes

des pauvres Bergers, qu'aux palais des grands, parmy l'or, & la soye, se faschant d'estre achepté si cher, luy que les Dieux ont dōné si libéralement aux hommes. Je dormis donc vn premier sōme fort court, mais fort paisible: Puis vn second fort interrōpu de songes. Tantost ie me trauaillois à chercher Diane avec beaucoup de sollicitude, & toutesfois ie ne la pouuois trouver. Tātost il me sēbloit qu'à tous propos i'auois quelque chose à demeller avec des hommes que ie ne cognoissois point. Et cōme c'est la coustume de ceux qui se couchent avec quelque dessein, ou quelque apprehension, de se resueiller avec beaucoup moins de difficulté, & en dormant mesme, de se tenir tousiours sur leurs gardes: l'attendois le

dois le iour avec impatience, & troublois mon repos de mille inquietudes: Quand sur le point que l'Aurore cōmençoit à paroistre, ie vis ce me sembloit l'Aurore mesme qui se presentoit à moy, ou à tout le moins vne beauté qui en auoit les cheueux, le teint, & les yeux; coiffée de telle sorte que l'Art sembloit vouloir disputer l'auantage avec la Nature, dont toutesfois il estoit surpassé: & parée comme si ç'eust esté le iour de ses Nopces avec quelqu'un des Dieux; ou des plus notables d'entre les hommes. Sa robe estoit blanche, toute parsemée de fleurs, qui sembloient tomber de tous costez de son sein, & de sa teste: & sa ceinture estoit d'or en forme d'abeilles sur des fleurs, dont les

feüillages estoient d'esmeraudes. Elle auoit vn cousteau dans la main droite, & cherchoit à couper vne branche du Myrthe, au pied duquel i'estois couché: Mais n'y pouuant atteindre, elle fut contrainte de s'adresser à moy: & me regardant d'un œil, qui seul me pouuoit persuader ce qu'elle eust desiré, s'il eust esté capable de me le faire entendre; elle me dist ces paroles. Je me suis aujourd'huy leuée long temps auant le Soleil, pour ce qu'il m'est ordonné d'assister bien tost à vn sacrifice, où i'aurois besoin d'une branche de Myrthe, & ie ne trouue personne qui me la donne, sans que ie me mette en peine de la demander. Toy que les Dieux m'ont peut estre enuoyé, pour me tirer de

cette peine ; Accorde moy ie te prie, ce que nul ne me voudroit refuser. Et en recognoissance de ce bon office, ie te donneray à toy seul le cœur, & l'affection que plusieurs ont désirée, & que nul n'a jamais encore obtenuë. En quoy i'ose bien dire que la recompense surpassera de beaucoup la peine, & que mesme tu n'en deurois point desirer d'autre, si d'avanture tu es d'une nation, & d'une nature courtoise, que la faueur que ie te fay de t'en prier. Elle se fust contentée de ne m'en dire point davantage ; & moy de luy obeir toute à l'heure : Mais comme ie demeuroid immobile, tant i'auois de peine à vaincre le charme dont l'estois retenu, elle creut aussi que l'estois insensible. Si bien qu'elle

adiousta encores d'autres persuasions aux premieres. Si peu, dit-elle, que tu sois clair-voyant, ce que tu vois en moy, te represente assez ce que ie suis, sans que tu puisses m'obliger de bonne grace à te le dire; non plus qu'à te rendre d'avantage raison de ce que ie demande; Si est-ce que pour oster à ton esprit tout sujet de doute, & d'excuse: Je ne fay point de difficulté de te declarer & l'un & l'autre. Sçache donc encores (si ie dois plus suiure en cela la commune opinion, que celle que i'ay de moy-mesme) que ie suis tenuë pour l'exemple & l'honneur des filles de tous ces lieux icy, & de qui la vertu, non plus que la beauté, comme d'une Decesse entre les mortelles, ne souffre point de

comparaifon, ny mefme d'enuie:
En vain pourchaffée, en vain foli-
citée de toute la fleur des ieunes
gens, qui au moindre figne que ie
leur donneroïs, de ce que ie de-
fire, ne le chercheroient pas feu-
lement dans cette foreft, mais
par tout le monde. Et ie ne penfe
pas que tu leur cedes ny en cour-
toisie, ny en affection quand le
fujet le merite. Quoy qu'il en
foit, quand ton humeur ne fe-
roit point portée à m'obliger,
ie croy que tu y ferois forcé par ta
deftinée: & que tu ferois pour la
gloire d'une grande Deeffe, ce que
tu ne voudrois pas faire pour moy.
Toutesfois ie ne fçay pas fi c'est de
toy, que nos Oracles parlent tant,
quand ils difent qu'une petite
branche de Myrthe doit eftre la

cause du plus grand, & du plus célèbre sacrifice que nous ayons jamais fait à la Lune; & que lors mesme elle doit descendre du Ciel en faueur de celuy qui l'aura coupée, & moy cependant, ie la porteray dans le sein pour l'amour de toy; où si elle n'apporte aucun fruit; à tout le moins elle y fleurira jusques à tant que nous allions tous deux au grand Autel: & là ie te dois sacrifier mon cœur, comme toy le tien à Diane. A ces paroles ie me voulus leuer, & me mettre en deuoir de la seruir en tout ce qu'elle desiroit; mais elle me dit, superbe ie te prie; garde-toy bien de te leuer deuant que ie me sois retirée vn peu à l'escart: Le jour commence à descouurir toutes choses, & si d'auanture j'estois ap-

perceue par quelqu'un des gardes de la forest, mon intention n'estant point recogneue, on m'imputeroit à crime d'estre trouuée seule avec toy; & l'heure mesme adjousteroit quelque chose à la mauuaise opinion qu'on en pourroit auoir. Toy donc aussi, quand tu auras abbatu la branche au pied du Myrthe, ne manque point de te retirer à part, pour me donner le temps de la venir prendre. Elle partit en disant ces dernieres paroles: & moy tout rauy de cette vision ie n'en peus souffrir la perte sans en estre bien fort touché, Si bien que j'ouris les yeux, & me leuay tout d'un mesme temps, pour voir ce qu'elle deuiendroit: Mais ne la voyant plus, & oubliant routes choses pour l'amour d'elle: Je me tour-

may vers l'arbre, qui estoit si haut pour vn Myrthe, que ie ne pouuois toucher pas vne de ses brâches de la pointe de l'espée seulement; hors-mis vne petite qui estoit vn peu plus bas que les autres, & pour tascher de l'auoir, ie frappay trois fois le tronc, dont l'escorce dure rejeta trois fois le fer au loin; la forest en retenrit, & l'Echo l'alla redire de toutes parts. En fin ie coupay la branche fatale, & la fis tomber à mes pieds, en disant ces mots à la beauté que ie venois de voir. Soit que tu sois Deesse, ou mortelle, voyla ce que ie dois à ta demande: en quoy ie te supplie de considerer plustost la soudaine obeyssance que ie t'ay renduë, que la chose mesme que tu as desirée.

A peine auois-ie acheué de parler,

que ie vis accourir vers moy trois ou quatre hōmes, qui estoient armez de longs dards, & de haches à la façon du pays; & quoy que la partie fut mal faicte, si est-ce qu'au lieu de me laisser prendre, ie me resolus de leur faire acheter bien cher, ou ma vie, ou ma seruitude. Je me mis donc en deuoir de les charger avec tant de resolution, & de diligence, qu'ils commencerent à me craindre: & desja ie les auois escartez de-çà, & de-là; quand en voicy d'autres à leur secours, qui pour mon mal-heur venoient de tous les costez de la forest: Si bien que le moyen m'estant osté de me sauuer par le dedans, ie fus contraint de l'aller chercher au dehors. Mais ie ne fus gueres loin que ie vis paroistre des

chasseurs qui me voyant seul pour-
suiuy de tant de gens, accoururent
à toute bride, crians à haute voix.
Qu'est-ce qu'il a faict? dequoy est
il coupable? C'est vn barbare, leur
respondirent les autres tous hors
d'haleine, qui nous a tous offensez,
& qui a violé les Loix, & le respect
de ces lieux, au grand mespris de
nos Dieux, & de nos Autels. A ces
paroles, ils pousserent incontinent
à moy pour m'arrester; mais la for-
tune du commencement, fauorisa
si fort ma resolution & mon cou-
rage, que le premier qui m'appro-
cha se repentit bien tost de sa dili-
gence. Car ie donnay d'abord vn
si rude coup sur la teste de son che-
ual, avec vne hache que j'auois o-
stée aux autres, qu'elle y demeura
mesme engagée au dessus de l'o-

reille, sans qu'il me fut possible de la retirer. Et puis il se cabra de telle sorte qu'en se renuersant sur les hanches, & son homme sous luy; il fit broncher celuy qui le suiuiot de plus pres, & qui s'abbatit si lourdement, qu'il jetta son Escuyer jusques à mes pieds, à la mercy de mes armes. Mais me tournant l'espée à la main pour regarder ce qui me pressoit d'auantage: & me voyant également environné de cheuaux, & d'hommes: ie resolus de faire vn dernier effort, si bien que frappant à droit & à gauche, avec plus d'ardeur & de promptitude, que ces paroles ne sont encore promptes pour te le représenter. De quelque costé que ie me tournasse j'estonnois tellement mes ennemis, que ie commençois

à ne trouuer presque plus de resistance. Et sans doute ie me pouuois faire quitter la place, & me deliurer à la fin des vns & des autres; si parmy la violence, avec laquelle ie faisois sauter les esclats de leurs armes, mon espée aussi ne se fut rompuë jusqu'aux gardes. Ce qui donna la hardiesse à vn jeune homme qui s'en apperceut le premier, de pousser son cheual contre moy si rudement, que la colere de me voir choqué de la sorte, m'osta la consideration de son extrême beauté, & de sa grande jeunesse, qui pouuoient obliger mesme les plus barbares à le traicter plus doucement: & ie ne peus m'empescher à l'instant de luy jeter ce qui me restoit en la main de mon espée, dont le pommeau l'at-

reignit plus fort, que ie n'eusse
mesme voulu, pres de la fosse de
l'estomach. La douleur qu'il en
ressentit luy fit soudain ouvrir les
genoux, & le fit tomber à terre
comme s'il eust esté mort. Je vou-
lus courir à luy pour me saisir de
ses armes : mais les autres qui ne
perdirent point de temps ne man-
querent pas de se saisir de moy :
Toutesfois de telle sorte qu'ils ne
m'osoient faire aucun outrage : &
m'ayant pris, ils me craignoient
encore si fort, qu'il sembloit veri-
tablement qu'ils fussent mes pri-
sonniers, & non pas que ie fusse le
leur. Les vns se plaignoient d'un
bras, ou d'une cuisse, & les autres
monstroient leurs blesseures : Mais
quand ils veirent ce beau jeune
homme tremblant, & pallissant

comme s'il eut voulu rendre l'ame: ils oublierent tous leur douleur pour estre sensibles à la sienne, ce fut lors que le desespoir & la rage commencerent de les prendre, & ie n'attendois que l'heure qu'ils vengeassent sur moy sa mort, deuant qu'elle fut arriuée. l'estois moy mesme touché d'une extrême desplaisir d'auoir employé mes mains à destruire vn tel chef d'œuvre de Nature, & n'en auois pas moins de regret qu'auparauant j'auois eu de colere. Aussi sembloit il que les traicts de son visage n'auoient plus de mouuement que pour exciter à pitié les ames les plus dures. Les roses seulement se cachèrent sous les lys qu'une jeune honte, aux moindres occasions auoit accoustumé de faire cacher.

sous les roses. Et ses cheveux blōds, espais, & naturellement frisez auoient vn si beau lustre qu'ils pouuoient le disputer avec le Soleil mesme : de sorte qu'on eust dit que la mort ne faisoit difficulté de le prendre, que pour ne pouuoir accorder tant d'éclat & de lumiere avec l'horreur de ses tenebres. En fin il commença peu à peu de reuenir à soy, & d'ouurir ses beaux yeux, dont toute la compagnie, & ceux-là mesmes que j'auois les plus mal traictez, ne furent pas moins resiouys, que s'il eut apporté la guerison à leurs maux & à leurs blessures.



Après ces choses le plus grand
soin qu'ils eurent, ce fut de s'en-
querir de moy, de prendre co-
gnoissance de mon crime, & de
me remener sur les lieux : où en
effect je ne vis plus la branche que
j'auois coupée; mais bien y auoit
il du sang à terre qui degoutoit du
Myrthe en abondance. O Sacrile-
ge, me dirēt-ils alors, qui t'ameine
en cette contrée, & quelle affaire
auois-tu parmy nous, pour y atti-
rer avec toy le courroux, & la ven-
geance des Dieux : & principale-
ment de nostre Déesse tutelaire ?
Quel Euphrate, ou quelle Thetis
te pourra jamais lauer de ton cri-
me ? En ce mesme instant nous
vismes trembler les branches de
l'arbre, qui commença de s'es-
mouuoir, & tost après nous enten-

dismes vers la cime touffuë, vne voix lamentable, & interrompuë de souspirs, & de sanglots, qui donnoient de la compassion, & de la tristesse, & qui d'une parole mal distincte, & mal prononcée cōmen'aient pas ses organes libres se plaignoit ainsi sous l'escorce.

Mal-heureux qui troubles le repos des ames, qu'un nouuel estre deuoit rendre pour jamais exemptes des passions humaines, & des iniures de la fortune? Me restoit il encore quelque mal que ie n'eusse point souffert en ma vie, & qu'il me fust ordonné de recevoir par tes mains? Or sçache que ton travail, & tes erreurs sont vaines, & qu'en cela tu ne fais autre chose qu'abuser de l'Esperance, & résister à l'ordonnance du Ciel.

Qui a veu quelquesfois vn criminel tout passe, & tout interdit, à qui l'on prononce l'arrest de sa mort, pourra s'imaginer l'estat auquel ie fus reduit, par vn si prodigieux spectacle: tant pour ce que ces paroles m'ostoiert l'esperance du bien que j'auois recherché avec tant de passions, & de peines, que pour me voir entre les mains, & à la mercy des barbares. Cela, dit Pyzadre, me fait souuenir de la forest de Dodone, où les arbres rendent les resposnes, & où se tient l'Oracle tant renommé de Iupiter Caonien. Veritablement, dit Endymion, i'en eus aussi quelque pensée, & creus estre parmy les chesnes fatidiques, n'estimant pas mon malheur moins certain que si les colombes de Caonie me l'eussent

annoncé. Mais ce n'est pas tout, Pyzandre, car comme ils murmuroient entre eux, disans tantost que c'estoit la voix & l'ame du Sacrificateur dernier mort; & tantost que c'estoit quelqu'une des Nymphes de Diane: Il sembla que pour esclaircir leurs doutes, & pour les tirer de peine, le Ciel nous permist d'ouïr encores ces paroles. Quels Dieux, & quels hommes a tant offensez Diophanie, que sous cette escorce dure, & sous la protection d'une si grande Deesse, elle soit encore exposée à leur violence, & à leurs outrages? Voila ce que nous peusmes comprendre de sa plainte; car sa voix peu à peu defaillante, se conuertit en ie ne sçay quel murmure, & en fin se perdit insensiblement. A ce nom

de Diophanie, ils demurerent tous esbahis, & se regardans les vns les autres, ils disoient entre eux. Helas! feroit-ce bien Diophanie, que nous auons n'agueres perduë, & que son pere fait chercher par tout le monde? Quand vn ieune homme qui se tesmoigna seul plus sensible à ce beau nom, que tous les autres ensemble, se jettant au pied de l'arbre, & l'embrassant fit esclatter son ressentiment, & sa douleur en ces paroles. C'est moy, Diophanie, c'est moy qui t'ay veritablement perduë, & que rien ne scauroit iamais consoler de ta perte. C'est moy, qui t'ay cherchée de toutes parts, & qui perdant l'esperance de te trouuer, ne cherchois plus desormais que la mort, pour finir mon desespoir &

ma misere: & sans auoir pitié de mes erreurs, ny de mes peines, Tu te caches de moy sous cette nouvelle forme, & sous cette escorce, me laissant à la mercy des frayeurs, & des craintes, que m'ont donné continuellement pour toy mes songes, & mes pensées. Tantost ie m'imaginois que ta beauté nonpareille eust obligé quelqu'un des Dieux, ou des hommes à te raurir: Et tantost que quelque monstre t'eust deuorée. On ne peut courir de dangers sur la mer, ny sur la terre, que ie n'aye mille fois apprehendez pour toy. O Diophanie? à quoy t'a reduite mon amour, & la rigueur de ton pere: & que puis- ie esperer de cette auanture, puisqu'en l'estat que ie te trouue à cette heure, tu es beaucoup plus per-

due pour moy, que si mesme la mort t'auoit rauie. Car moy qui n'attends que l'heure que mon desespoir & mes douleurs me facent mourir; au moins aurois je cette esperance de te reuoir parmy les ombres; Mais aujourd'huy mon affliction est telle, que ny les morts, ny les viuans n'ont rien qui la puisse iamais soulager. Il eust eternellement continué sa plainte, Pyzandre, si l'excez de sa passion ne luy eust quelque peu de temps faict perdre la parole. Le Myrthe, ou si tu l'aymes mieux, Diophanie en fut touchée, & ses branches esmeuës, dōnerent quelque signe de son ressentiment: Mais comme les autres faisoient quelque effort pour le retirer de là, & pour le destacher du pied de

l'arbre qu'il embrassoit , & qu'il serroit de telle sorte , que pour moy ie n'esperois pas moins que d'en voir bié tost reüssir vne autte metamorphose. Laissez moy, dit-il, finir icy mes douleurs avec ma vie. Allez dire à Myrtamise que sa fille est trouuée ; mais de telle sorte qu'elle n'est pas moins perdue pour elle qu'elle l'estoit auparavant. Et comme ils le prioient instamment de leur raconter le sujet qu'il auoit plus qu'eux de regretter si particulièrement Diophanie. Vous auez là present, dit-il, l'vn des principaux esclaves de son Pere, qui sçait toute l'histoire que ie ne luy pouuois celer, apres ce qu'elle luy en auoit dit la premiere. Dispensez moy , dit lors l'esclau, ie vous prie, de ramen-

tevoir icy deuant elle la pitoyable
histoire, dont le souuenir n'offen-
feroit pas moins son ame, que l'ei-
pée de cet estranger a n'aguères
offensé son corps; si le tronç d'un
arbre peut estre auiourd'huy
nommé le corps de Diophanie,
dont la beauté rauissoit egale-
ment les Dieux & les hommes.
Vien t'en donc, dit l'un des prin-
cipaux avec nous, & retournons
à la ville; aussi bien c'est assez chas-
sé pour auiourd'huy, puis que
nous auons pris cet estranger, &
que nous auons trouué Diopha-
nie. Ainsi voyans que le Myrthe
demeuroit deormais immobile,
& qu'il n'en sortoit plus de voix:
Après auoir employé de nouuel-
les persuasions, & de nouveaux
efforts, pour tirer de là ce ieune

homme, qui pour les contenter leur promit seulement de les suivre: L'un d'eux m'ayant fait monter en croupe comme ils m'emmenaient à la ville, l'esclave commença de leur faire le discours de ceste auanture.



Pas vn de vous, dit-il, n'ignore quelle estoit la beauté de Diophanie, la seule jalousie de Sthenobée, la niepce du Sacrificatur, ny quelle estoit sa naissance, sa fortune, la rigueur, & la brutalité de son pere, & la recherche opiniastre, & violente d'Amphidamas: mais à ce que ie voy, vous ne sçauiez point l'amour d'Hermodan. C'estoit le nom, Pyzandre, de ce pauvre amant, qui comme on me fit entendre, estoit né d'une Amazone, ayant esté dès son enfance adopté d'un certain homme dont la condition estoit mediocre, & la maison proche de celle de Lycaspis, le pere de Diophanie. Toutes ces choses, dit l'esclaue, ont produit les effects estranges que ie vay vous raconter.

Vous n'ignorez point encores, dit il, que Diophanie dès sa premiere jeunesse, se tenoit ordinairement aux champs parmy les troupeaux de son pere: & que par quelque droit de voisinage, Hermodan y menoit aussi les siens: Si bien que passans leurs premieres années parmy les jeux, & les exercices qui estoient conformes à leur enfance; ils s'accoustumerent tellement ensemble, qu'ils ne pouvoient plus viure l'un sans l'autre. Mais en fin ils commencerent peu à peu de croistre, & la beauté de Diophanie s'augmentoit de plus en plus avec son aage: Toutesfois de telle sorte qu'estant des ja capable d'adoucir les courages les plus farouches, & de domter les plus rebelles, elle ne s'apperceuoit

nullement de ses forces , ny de la puissance de ses charmes. Ce qu'Hermodan d'autre costé regardoit avec tant d'innocence; que ny les Dieux, ny les hommes, ny sa conscience mesme ne luy pouuoit imputer à crime vne seule de ses pensées. Et soit que ce qu'il auoit accoustumé de voir, ne luy semblast point si rare, & ne luy peüst tenir lieu de merueille: soit que l'innocence mesme ayt quelque chose d'insensible; il ne se fust point si tost apperceu qu'elle eust esté si belle, s'il ne l'eust si souuent oüy dire. Mais l'Amour, sans l'aide duquel nos sens demeureroient comme inutiles, & ne seroient pas mesme sensibles, luy tendit tant d'appas, que tout aveugle qu'il est, il luy fit bien apprendre quel vsa-

ge il deuoit tirer des ses yeux: non toutesfois si parfaictement qu'il sceust encores que c'est que d'un regard qui penetre jusques dedans l'ame, ny qu'il eust la science de rendre avec dessein à Diophanie la moindre partie du mal qu'elle luy faisoit innocemment. Il se contente seulement de la contempler, & de receuoir par ses yeux la flâme qui se glisse insensiblement en son cœur. Tant s'en faut qu'il face quelque effort pour s'opposer à la violence d'un ennemy qu'il ne cognoist point, ny qu'il veuille donter celuy qui du commencement peut estre n'estoit point indontable: Il ne le combat pas seulement: Au contraire il semble qu'il face tout ce qui le peut rendre plus fort. Il se laisse inconti-

nent

nent mener en triomphe, & comme s'il prenoit plaisir à se trahir foy-mesme, il n'aspire pas seulement à la gloire d'avoir fait quelque resistance. Ce pendant il ne trouve plus de plaisir qu'en sa peine : il perd le goust de toute autre chose : & ce qui avoit accoustumé de le divertir, l'afflige & l'importune. La nuit il desire impatientement le jour, dont toutesfois la clarté ne luy est pas moins facheuse que les tenebres ; si d'avanture elle ne luy fait voir ce qu'il aime, & le voyant encores, il n'a pas moins d'inquietudes qu'auparavant. Il ne sçait à quoy se résoudre, & devient si different de foy mesme, qu'à la fin Diophanie s'en estant apperceuë, croit que son amitié l'oblige de luy demander la

cause d'un si soudain changement. Ce qu'elle fit plus d'une fois sans en pouvoir rien apprendre; pour ce qu'Hermodan, qui sentoît ce qu'il ne pouvoit exprimer, & qui d'ailleurs ne trouvoit pas moins de peine à dissimuler sa passion, qu'à la faire cognoître, eust bien desiré qu'elle l'eust entenduë par ses yeux, ou bien qu'elle se fust contentée du meilleur langage que pour cet effect sa bouche luy pouvoit tenir, qui estoit celuy de ses souspirs. En fin, comme elle l'en pressoit davantage, la nécessité de respondre luy fit surmonter la crainte, & la honte, qui luy vouloient eternellement imposer silence. Tu veux, dit-il, absolument Diophanie, que ie te declare ma peine; mais s'il arriue que tu sois

faschée de l'avoir apprise, souvien
toy d'en accuser ta curiosité, &
non pas mon obéissance. C'est ta
beauté, Diophanie, qui blesse tout
le monde, & qui sans doute me
fera mourir, puis que la considéra-
tion de ta fortune, & de la mienne,
qui sont si fort esloignées l'une de
l'autre, fait que pour moy le de-
sespoir en doit tousiours accom-
pagner l'amour. Il sembloit qu'en
ces paroles Hermodan n'eust per-
du la honte que pour accroistre
celle de Diophanie, qui rougit de
telle sorte, qu'il eust esté trop heu-
reux, s'il eust autant allumé de feu
dans son cœur, qu'il en fit pa-
roistre en son visage. Elle se re-
pentit trop tard de sa curiosité, &
ne sçachant ce qu'elle deuoit faire,
elle se trouua tellement interdite,

quelle se fust perduë en cette confusion de pensées, & d'actions, où elle se voyoit reduite, si elle n'eust pris quelque pretexte, & quelque legere occasion de se destourner de luy. O Amour ! que ta puissance produit tous les iours d'estranges merueilles ! & qu'en vn moment tu changes comme il te te plaist l'estat de toutes choses ! Mais comment portes-tu le nom d'Amour, puisque tu fais l'office de la Discorde ? Tu mets de la diuision entre deux personnes, de qui l'amitié ne deuoit point auoir d'autres bornes que celles de leur vie ; & qui comme elle estoit née entr'eux dès leur enfance, s'estoit aussi parfaictement accreuë avec eux mesmes. Tu interrõps le cours des plus libres actions du monde,

pour exposer vn berger innocent à mille contraintes, & à mille gesses. Celle qui n'aguères luy communiquoit à cœur ouuert ses plus secretes pées, & qui receuoit les siennes d'une pareille franchise, à ceste heure a de la peine à le regarder seulemēt. Elle se deffie de toutes ses actions & de luy mesme; & (tant le nom d'Amour luy est odieux) elle tient pour suspect en sa bouche le discours des choses mesmes les plus indifferentes. Dieux! qu'en ces occasions, la rigueur, la dissimulation, & la fuite sont naturelles aux femmes! Diophanie est des-jà sçauante aux choses qu'elle n'a jamais apprises; & sans consulter d'autre Oracle que soy mesme, elle est ingenieuse à trouuer des artifices, pour donner mille peines

à celuy dont elle n'a jamais receu que de bons offices. Pour vne seule faute qu'encores vn excez d'affection l'a forcé de faire, elle oublie en vn moment tous les seruices qu'il luy a jamais rendus, & les plus iustes ressentimens qu'elle doit à sa premiere bienueillance. Elle commence de se cognoistre, & semble que l'estat que l'on faict d'elle l'oblige d'en faire peu d'autrui. Quoy qu'elle dissimule, elle n'est pas moins glorieuse de sa beauté, que de sa condition, & de sa naissance; & toutes les fois qu'elle se represente la fortune du pauvre Hermodan, en comparaison de la sienne, elle se rit de son audace, & s'estonne de son entreprise. Cependant il adore tous les jours ses pas, il pleure, & soupire apres elle:

mais plus il implore sa faueur, & sa grace; plus il semble qu'il irrite son mespris & sa colere: & quelque instance & quelque supplication qu'il luy face, elle ne luy respond du tout rien; ou si quelques-fois elle daigne luy respondre, ce sont autant d'arrests de mort qu'elle luy prononce. Il ne sçait par quelle action il se doit rendre agreable, ny quel conseil il doit tirer de sa raison offensée. Il ne consulte plus que sa passion, qui luy fait faire mille deliberations, dont puis apres il a honte. Ses desseins se destruisent l'un l'autre, & dependent desormais du hazard plus que de sa prudence. Tantost il se presente deuant elle, & se contente de l'esprouuer par le silence. Et tantost feignant de se recognoi-

stre , il luy demande pardon de la
faute qu'il veut tousiours faire; &
luy promet ce qu'il n'est pas resolu
de luy tenir. Sous ce faux pretexte
il veut voir s'il pourra tirer d'elle
quelque plus douce parole. Et
quoy, dit il, Diophanie, pour ce
que ie tay voulu tout donner; ou
plustost pour ce que i'ay voulu
tout acquerir, il semble que tu me
veuilles faire tout perdre; & qu'il
ne te reste plus rien de ta premiere
bienveillance. Si fait, dit elle, mais
l'abus, & l'erreur qu'elle t'a faict
commettre, m'oblige de t'en oster
les apparences; & si tu m'en im-
portunes d'avantage tu me force-
ras mesme de t'en oster la verité.
Il y auoit si long temps qu'Her-
modan n'auoit receu de parole de
Diophanie qui fust accōpagnée,

ie ne diray pas de quelque faueur, mais seulement de quelque franchise, qu'il sembloit qu'il en d'eust perdre pour jamais l'esperoir, comme elle en auoit perdu la coustume. Si bien que pour quelque moment, essayant de tromper sa passion, il ne laisse pas de gouter ce peu qu'il y auoit de douceur parmi tant d'amertume. Mais il est si malaisé qu'un esprit à qui l'amour propose tant de delices, & de gloire, où continuellement il aspire, puisse trouuer beaucoup de satisfaction aux plaisirs mediocres d'une commune bienueillance, que dans peu de temps il ne manqua pas de se desmentir soy-mesme, & de soupirer aupres d'elle encores plus qu'auparauant. C'est vn vain effort pour luy, que de vou-

loir resister à tant d'appas , & de charmes. En quelque estat qu'il la trouue, & qu'il la considere, il ne la peut plus supporter, & quelque action qu'elle face, elle le fait tousiours mourir. De sorte qu'un jour que pressé de sa douleur , il voulut implorer sa pitié, sans laquelle il ne pouuoit plus viure , ou à tout le moins luy demander la permission de se plaindre: Elle ne se contenta pas d'interrompre sa plainte qu'elle ne vouloit point entendre, mais encore , sous ombre de luy faire chercher en l'esloignement le remede d'un mal qui ne faisoit que s'augmenter en la presence; elle luy defendit absolument de la plus voir. Ce qu'elle ne peût faire sans quelque peu d'esmotion, & de colere qui rendirent ses yeux enco-

re plus ardens que de coustume, & qui la firent paroistre encore plus belle. Il sembloit qu'en ce momēt l'Amour ne se voulust point servir de ses traicts ordinaires, & qu'il eust pris la foudre dans la main, non pour en menacer seulement Hermodan; mais pour l'accabler, & le reduire tout d'un coup en cendre. Ah! dit il, Diophanie, vn commandement si exprés, demande vne prompte obeïssance. De peur donc qu'à l'aduenir ma vie ne te soit importune, ne reçoÿ pas seulement de moy l'Adieu de la separation que tu m'ordonnes; mais aussi de la mort que ie vay souffrir. Apres cela sa bouche ne fut de long temps capable de prononcer vne seule parole, ny ses yeux mesmes de jetter des larmes :

& Diophanie eut encore le courage de se retirer la premiere, & d'abandonner au desespoir & à la rage qui le faisoient. Il reclame incessamment la mort, & se voyant separé de ce qu'il aime, il voudroit bien aussi l'estre de sa vie. Mais la destinée ne se reigle point à ses volontez, & ne parle nullemēt par sa bouche, A qui doit il dōc auoir recours? C'est en vain qu'il soupire parmy les deserts, & les solitudes. Car pour escouter les plaintes d'un amant, les bois, les rochers, & Diophanie, n'ont pas plus d'oreilles les uns que les autres, & ne sont tous qu'une mesme chose.

Ce pauvre berger qui s'est tousjours ressenti de son origine, & en qui les Dieux ont recompensé par la generosité, & le courage, ce qu'il

manquoit à sa fortune, ne fut jamais negligent à servir leurs Autels : sçachant bien que de leur conduite, & de leur prouidence dépend l'heur, & le malheur des hommes. Mais comme dans le monde, il auoit vn amour extrême pour Diophanie, aussi dans le Ciel, auoit-il vne particuliere deuotion pour le Soleil. C'est à luy qu'il adresse ses vœux, & ses prieres, & passant d'une extremité à l'autre, celuy qui n'aguere inuquoit la plus effroyable des Deesses, inuoque à ceste heure le plus beau des Dieux. Grand Soleil, dit-il, source de vie, & de lumiere, qui donnes l'estre à toutes choses, & qui les renouuelles: si les offrandes que ie t'ay présentées d'une ame innocente, & d'une main pure,

te furent jamais agreables; escoute
aujourd'huy mes supplications; &
s'il y a de l'erreur en mes voyes, &
en mes pensées; que la volontaire
confession que i'en fais, & la peine
que i'en souffre, en expiét l'offense.
Mais regarde premierement si le
traict qui me blesse n'est pas inéui-
table; & si mesmes ie n'ay pas eu
tout sujet de douter que tu fusses
vniue. O grand Autheur des sie-
cles! dōne moy d'estre aymé de ce
que j'ayme, & de ce que j'adore, c'est
à dire du Soleil, & de Diophanie.
Ces prieres poussées d'un cœur ou-
tré de passion toucherent le Soleil;
mais la beauté de Diophanie l'a-
uoit des-jà touché la premiere: &
luy qui voit toutes choses, ne
voyoit rien qui meritaist mieux d'e-
stre veu qu'elle. Aussi n'y auoit-il

rien ny qui luy fust plus séblable, ny qui fust plus digne de son amour. J'auois mille fois ouy dire ce que ie ne pouuois croire ; que l'Amour auoit souuent obligé les Dieux, & Jupiter mesme de quitter le Ciel pour la terre. Ceste histoire en confirme tellement la verité qu'elle doit estre pour jamais indubitable. Et ie ne sçay pas si les charmes des Magiciennes peuuent tirer la Lune du Ciel ; mais bien sçay-je que ceux de Diophanie en tirent le Soleil : & que veritablemēt on peut dire de sa beauté qu'elle tenoit lieu de Soleil au Soleil mesme. Vn jour donc que ceste belle, mais trop cruelle bergere fuyant peut estre l'Amour, & la presence de son berger : auoit mené son troupeau dans vn lieu plus escarté

que de coustume, non loin de ceste forest sacrée du costé le plus proche de la ville : comme elle croyoit estre moins exposée à la rencontre de tout ce qui la pouvoit importuner. Ce Dieu de qui l'œil penetre les choses les plus cachées, & de qui mesme les Enfers malaisément peuvent euit la lumiere, se presenta deuant elle avec cette beauté qui luy donne de l'auantage sur tous les autres Dieux, & avec vne partie de ce grand esclat qui le fait partout recognoistre ; dont elle fut tellement surprise, que de la peur qu'elle en eut, ayant recours à la fuite, elle eust bien voulu que quelqu'un luy eust presté des aisles pour la rendre plus prompte ; & quand c'eust esté celles de l'Amour mesme, elle ne les eust

eust point refusées. Elle entre bien
auant dans la forest, où bien que
dés l'entrée mesme elle peust estre
en assurance, elle ne laisse pas
pourtant de courir tousiours.
Toutes les ombres luy semblent
trop claires, & de quelque costé
que le jour paroisse, elle croit estre
poursuiuie. En fin comme si la
peur mesme la rendoit plus har-
die, elle ne trouue point de seureté
pour elle, que parmy les horreurs
les plus noires qui auparauant
l'eussent espouuentée. Pren coura-
ge Hermodan, & tire vn bon au-
gure de cet éuenement. Elle croit
que si tu n'eusses point esté separé
d'elle, ceste peur ne luy fust point
arriuée. Elle se repent de sa faure,
& commence à te desirer. Et toy
Diophanie, fors hardiment de ces

ombres; aussi bien ton appréhension est la plus vaine du monde. De tous les Dieux celuy que tu viens de voir est le moins espouventable. Et ie ne sçay par quel accident celuy qui chasse par tout la crainte, aujourd'huy te l'a donnée. Le Soleil cependant, bien qu'il soit des plus legers à la course, & qu'il la peust aisément arrester, la voyant fuir de la sorte, ne la voulut point fuiure. L'exemple de Daphné pour jamais l'auoit rendu sage, & l'auoit fait jurer qu'en pareille occasion il n'vsferoit plus de poursuite violente. Il ayme donc beaucoup mieux la persuader que la contraindre. Mais puis que tant de belles qualitez qui l'environnent le font plus redouter, qu'elles ne le rendent agreable; & que pour

obtenir quelque faueur d'elle , il semble qu'il faille auoir moins de merite, & qu'il luy nuise d'estre vn Dieu , il se resoult de prendre la forme d'un homme. Or bien que les Dieux facent diuinement toutes choses ; si est ce qu'ils ne font pas mouuoir à leur volonté tous les ressorts de la Destinée : & qu'elle se reserue des secrets dont ils ne sçauent point l'ordonnance. Voyāt donc que la rigueur de Diophanie n'estoit pas moindre que sa beauté ; & qu'elle pouuoit n'estre pas persuadée , ou l'estre seulement pour vne fin vertueuse : Il dispose tellement de ce qu'il doit faire, que par vne mesme action, il tasche de se contenter, ou à tout le moins d'exaucer les vœux de celuy qui continuellement implore son assi-

stance. Il prend la figure d'Hermodan , ne doutant point qu'en son ame elle n'ayt des-ja quelque regret de le voir esloigné d'elle. Peut estre que mesme il luy desplaist de le trouuer si obeyssant : & qu'elle ne croit point que celuy qui s'en peut si facilement separer, l'ayt jamais si parfaictement aimée. Elle le regarde venir, elle le considere, & tant s'en faut qu'elle s'en destourne, qu'outre la peur qu'elle auoit eüe , qui luy faisoit desirer sa presence, elle trouue en luy quelque chose qui le rend plus agreable qu'auparauant. O Diophanie ! comment pourras-tu resister à la violence qu'en vn seul Hermodan te font aujourd'huy les Dieux & les hommes ? Toutes les puissances, & les vertus

du monde sont assemblées en vn corps pour combattre seulement la tienne : & sont d'autant plus redoutables, qu'en te confessant victorieuse, elles te veulent rendre vaincuë. Ce sont bien les mesmes yeux que tu auois accoustumé de voir, mais ie ne sçay quels rayons, & quels feux les rendēt plus clairs, & plus penetrans que de coustume. Ce sont bien les mesmes traits de visage : mais ils ont des appas, & des graces qu'ils n'auoiēt point auparauant. C'est bien la mesme voix, & la mesme parole ; mais qu'est-ce qu'elle ne dit pas ? Et de combien de charmes ne tient elle point tes oreilles enchantées ? En fin c'est la mesme taille, & le mesme corps ; mais il est animé d'une diuinité, que pour n'estre point

persuadée , il ne falloit point escouter. Il falloit fuir à l'ordinaire : mais la pauvre Diophanie ne sçait point qu'en vn mesme temps il y a deux Hermodans au monde, dont le faux est bien plus puissant que le veritable. Ce pendant elle en reçoit des impressions tout ensemble si douces, & si fortes, que rien ne les sçauroit effacer à l'aduenir : & son image esgalement assistée de l'Amour, & du Dieu qui la representoit, entre si puissamment dans son ame, que pour jamais elle en fera possedée. Toutesfois en apparence elle n'en donne point d'autre tesmoignage que la patience qu'elle a de l'escouter : vsant en cela mesme de tant de discretion, & de retenuë, qu'un mortel ne s'en pouuoit apperceuoir, &

qu'il falloit estre vn Dieu pour le cognoistre. Mais le Soleil quilisoit dans sa pensée, voyant bien, quelque persuasion qu'il y peust adjoûter, qu'elle ne pouuoit auoir d'affection qui ne fust legitime ; & que tous ses efforts, mal employez pour luy mesme, n'auoient point d'autre effect que de rendre aymable celuy dont il portoit la figure, se contenta d'admirer la vertu de Diophanie, & d'accorder aux prieres d'Hermodan, ce qu'il auoit desiré de son assistance. Il ne reste plus rien à cette heure que de luy faire apprendre qu'il n'est pas moins heureux qu'il se croit estre miserable. Ce qu'il fit au mesme temps sans quitter la forme qu'il en auoit prise ; pour luy mieux prouuer que quelque esloigne-

ment qui le priuast de voir Diophanie, il n'auoit pas laissé d'estre veu d'elle, ny d'en estre entendu.

Hermodan de fortune lassé de soupirer, & de se plaindre, s'estoit leué du pied d'un arbre, & se disposant à se retirer, consideroit son troupeau qui sembloit se ressentir de sa peine, & de sa tristesse. Quand il vit de loin vn autre luy mesme qui venoit à luy, & qui le representoit si parfaictement, que pour ne le cognoistre pas, il falloit qu'il eust perdu la cognoissance de soy mesme. Ce qui troubla tellement sa pensée que pour se tirer de la confusion en laquelle il estoit, il eust bien voulu se regarder dans quelque fontaine, pour voir s'il n'estoit point changé par quelque miracle en vn autre, comme il

voyoit vn autre changé veritablement en luy. Il ne comprenoit point comment il pouuoit estre en deux lieux à la fois; marcher en vn mesme temps, & demeurer immobile; ny en fin comment il pouuoit estre tout entier separé de soy mesme. Et bien qu'en vn tel objet il ne vist rien qu'il n'eust veu tous les jours de sa vie; si est-ce que qui luy en eust demandé le nom, il eust esté bien empesché de le dire; quand il ouit ces paroles. Hermo-
dan, ie suis le Dieu que tu reclames, qui n'ay pris ta figure que pour te faire valoir d'auantage, & te rendre agreable à celle qui faisoit gloire de te mespriser. Vne peur qu'elle eut n'aguères luy fit souhaiter ta presence qu'aujourd'huy ie luy ay renduë en ton absence mesme,

afin de la rédre par meſme moyen ſenſible aux plus fortes perſuaſions, & aux plus puiſſans charmes, qui ſous vne apparence humaine, pouuoient ſortir d'vne diuinité. Ayant dit ces paroles, le Soleil ſe retire, & la Nuit arriue. Hermo-
dan n'eut pas le loifir ſeulement de luy rendre graces, ny de l'adorer. En quoy meſme, il n'eſtoit point aſſeuré de ce qu'il deuoit faire, tant il auoit peur d'offenſer les Dieux, en adorant ſa propre image. Il ne ſ'eſtoit jamais trouué ſi beau, ny ſi parfait, pour croire aiſément, qu'il deuſt prendre ſa reſſemblance pour le Soleil. Là deſſus mille doutes combattoient ſa creance, quand il vint à ſe reſſouuenir, de ce que luy auoit dit quelques iours auparauant vn

vieux berger, qui avoit la reputation d'estre Magicien, & devin. Que pour se faire aymer de la beauté qu'il aymoît, il faudroit qu'il eust les qualitez d'un Dieu sous les apparences d'un homme: Ce qu'il avoit pris en ce temps là pour un tesmoignage de l'orgueil de Diophanie, & du peu d'esperance qu'il en devoit avoir. Mais faisant comparaison de ces paroles, avec celles qu'il venoit d'entendre; ce qui l'avoit auparavant desesperé, fut ce qui l'assura davantage. Toutesfois comme les Dieux quand ils se veulent presenter à nous, s'accommodent à la foiblesse de nos sens, & prennent des formes qui nous soient plus supportables; de peur qu'en se faisant voir tels qu'ils sont véritable-

ment, le seul esclat de leur presence ne nous destruisse, & ne nous consume. Aussi pour trop s'accommoder à nous, ils nous laissent le plus souvent des scrupules, & & des doutes qu'ils ne soient pas eux mesmes; & par ce moyen offrent à nostre aveuglement mille matieres, & mille causes d'incrédulité. Ainsi ce pauvre berger ne sçachant ce qu'il doit croire, ingenieux seulement à se traavailler, voit son esprit abyssmé dans la confusion de ses pensées; & passant la nuit avec mille inquietudes, ne s'endort qu'à force qu'il estoit las de veiller.





L'ENDYMION

DE GOMBAULD.



LIVRE QUATRIESME.



IOPHANIE de son costé ne trouue plus le Sommeil si doux, ny si fauorable, que de coustume: Et desja son inquietude luy fait ouurir les yeux deuant l'Aurore. Elle ne se lasse point d'entretenir son esprit de ces douceurs que l'Amour

du commencement represente à ceux qu'il veut engager à son obéissance ; & ne s'apperçoit nullement des espines qu'il cache dessous les roses. Elle admire en elle mesme la constance & la fidelité de son berger , & repasse cōtinuellement en sa pensée les paroles , & les actions qui le rendoient de tout point aymable. Mais comme sa beauté ne luy acqueroit pas moins d'Amans qu'il y auoit de jeunes hommes qui l'osoient regarder ; Amphidamas entre autres ne l'auoit des-ja que trop veuë, pour en ressentir des atteintes qui ne luy permettoient plus d'auoir de patience , & qui l'obligerent d'aller avec le jour interrompre le repos d'Hermodan, & luy tenir ce langage. C'est à ce coup dit-il,

Her-

Hermodan, qu'avec la gloire d'estre le meilleur amy du monde, tu peus tout d'un coup t'acquérir Amphidamas, sa fortune; & toute sa puissance; si tu luy veux accorder vn office que nulle consideration ne te permet de luy refuser. Tu sçais bien que l'extrême beauté de Diophanie accompagnée d'une rigueur qui n'est pas moindre, la rend inaccessible à tout le monde, hors-mis à roy seulement, qu'une longue habitude a rendu familiere avec elle. C'est pourquoy ie te prie de luy porter la parole de la recherche que j'en desire faire, & d'adjouster en ma faueur tout ce que ta bienueillance t'inspirera pour m'obliger. Je ne pense pas que ce discours luy soit desagrea-ble en la bouche d'Hermodan, &

de la part d'Amphidamas, si d'avanture il ne faut estre vn Dieu pour meriter, & pour obtenir d'elle la faueur, & la permission que ie luy demande. Hermodan de qui le malheur combat incessamment le merite, & s'oppose de telle sorte à son contentement que les Dieux mesmes ont bien de la peine à luy tesmoigner par effect le bien qu'ils luy veulent, eust bien voulu s'excuser d'une commission si ruineuse. Mais quand nous auons affaire à des gens dont la condition est si fort au dessus de la nostre, il faut qu'une excuse soit bien fondée, & soustenuë de beaucoup de raisons ; autrement elle ne tient lieu que de refus & d'offense. D'ailleurs, il se va tout à coup imaginer, que cela luy seruiroit de pretexte

pour aborder plus hardiment Diophanie, & de moyen mesme pour tirer quelque preuue de ce favorable changement que pour trop le desirer, il ne pouuoit encore esperer d'elle. Si bien qu'il se resolut de contéter ce fascheux riuail de ceste douce response. Qu'il porteroit tres volontiers à Diophanie la parole qu'il luy auoit donnée, & qu'avec la mesme fidelité il ne manqueroit pas de luy rendre la response qu'il en auroit receuë: qu'il les honoroit si parfaitement l'un & l'autre, qu'il desiroit les rendre esgalement satisfaits de son obeyssance: & mesme qu'il s'exposeroit encore plustost au hazard d'encourir la disgrace de Diophanie, que de perdre l'occasion de le seruir. Amphi-

damas ne le retint pas d'auantage , pource qu'ils estoient tous deux trauaillez d'une mesme impatience; l'un d'aller trouuer Diophanie, & l'autre de le voir partir.

En fin voicy le jour bien heureux qu'Hermodan commence à reprendre la trace qu'il auoit si long-temps perduë. Mais bien qu'il fust obligé de se fier aux Dieux plus qu'à luy mesme; si est-ce que son incredulité luy donna tousiours de nouvelles craintes, & le tint en incertitude jusqu'à tant qu'il se fust approché de Diophanie. A l'abord il ne la trouua nullement estonnée, ny surprise de le voir comme d'une chose nouvelle; ce qui fortifia quelque peu sa croyance : mais il chercha par ces paroles le moyen de s'en assurer

d'avantage. Aujourd'huy dit-il, Diophanie, vn nouveau sujet m'oblige à te faire vn discours qui te fera peut estre moins importun que ceux qui mont fait acquerir ta disgrâce, & m'ont bany de ta presence. Tu n'as plus besoin de consulter ta rigueur pour me respondre, ny de l'employer à me faire mourir: le dessein d'Amphidamas n'est que trop suffisant pour me ruiner, & pour me perdre. Il se resoult entierement à ta recherche, & m'a fait promettre de t'en porter la parole. Mais Diophanie l'interrompant; Ne m'en dis pas d'avantage, dit elle, & que ie n'oye plus parler ny de toy, ny d'Amphidamas. Ces premieres paroles estonnerent si fort Hermodan qu'il ne creut pas estre moins

malheureux que de coustume. Il accuse en son ame les Dieux, & les hommes ; & s'imagine que son mauuais Genie, ou quelque Demon encore pire, n'auoit pris sa figure que pour le tromper, & se jouër de son esperance. Quand Diophanie poursuiuit en cette sorte. Eus-je donc hier la patience de t'ouïr dire tout ce qu'il te pleut de ton affection, pour souffrir encores aujourd'huy que tu me parles de celle d'Amphidamas? As-tu bien eu la moitié d'un iour de constance? & n'as-tu plus rien à demander pour toy, qu'il faille de necessité, ou que tu te taises, ou que tu parles pour vn autre. Va perfide, il ne te souuient non plus des paroles que tu dis, ny des protestations que tu fais, que si quel-

qu'autre les auoit prononcées pour toy, & que tu ne les eusses iamais pensées. Lors Hermodan reconnut manifestement la verité qu'il auoit apprise, & se repentit trop tard de son incredulité. Vne secrette ioye luy saisit le cœur, & le rait tellement hors de soy mesme, qu'il oublie toutes ses douleurs passées, & ne souffre plus de peine que de trop de contentement. Il se jette aux pieds de Diophanie, & luy demande le pardon qu'il est tout assésuré d'obtenir. Toutes ses rigueurs ne sont plus desormais que des feintes, & sa bouche ne dit point d'injure, qui ne soit incontinent desmentie par ses yeux. Ce fut lors que ces deux Amans commencerent à soupirer également l'un pour l'autre, &

à s'entretenir avec tant de douceur, & de felicité, qu'il n'y a point de iours si longs, qui pour cet effect ne leur semblaissent trop courts. Leurs plaisirs pourtant, & leurs desirs mesmes estoient tousiours accompagnez de beaucoup d'innocence: & quelque attainte violente qu'ils receussent de l'Amour, leur vertu n'en estoit point offensée. Mais comme ils ne iugeoient des choses qu'en faueur de leur passion; ils oublierent bien tost l'inegalité de leur fortune; & sans se mettre en peine de tout ce qui se pouuoit opposer à leurs desseins, ils se promettoient que le temps accōmoderoit toutes choses; & ne vouloient iamais penser à l'aduenir que pour en biē esperer.

Cependant, Amphidamas qui

sentit croistre son amour par la difficulté que Diophanie auoit faicte d'en receuoir la parole, trouua bien tost l'expedient de se faire entendre, & s'adressant à Lycaspis son pere, ne manqua point d'en obtenir tout ce qu'il en pouuoit desirer. La seule consideration de son pouuoir, & de sa naissance, qui ne le mettoient pas moins au dessus de Diophanie, que Diophanie le pouuoit estre au dessus d'Hermodan, ne luy permet point de consulter dauantage. Il croit que sa fille en doit receuoir autant de satisfaction que luy mesme: & quand il luy en parle, il impute le changement qui paroist en son visage, à la modestie, & à la honte naturelle qui en cette occasion accompagnent ordinai-

rement celles de son sexe , & de son aage ; & prend son silence pour vn consentement. Toutes-fois comme Amphidamas presse de plus en plus ; il faut que Diophanie parle ; & son pere , qui du commencement n'est pas resolu de la contraindre , est bien ayse d'apprendre d'elle , ce qu'elle en pense : Mais la crainte qu'elle a de luy desplaire , fait qu'elle n'ose luy dire ce qu'elle a des-ja declaré suffisamment à sa mere. Myrtamise donc prend la parole pour elle , & fait sçauoir à Lycaspis ce qu'il ne voudroit point entendre. Que l'inclination de sa fille luy feroit preferer la condition du plus pauvre berger du monde à toutes les richesses de celuy dont elle ne sçauroit iamais aymer la personne.

Ce que Lycaspis ayant ouy, sa brutalité ne luy permit point de répondre autrement qu'avec des injures. Et comme il ne sceut jamais ny retenir sa colere; ny dissimuler sa croyance; il ne manqua pas de dire à Amphidamas les mesmes paroles que Myrtamife luy auoit rapportées de Diophanie, & de prendre conseil avec luy des moyens qu'il y auroit de la gagner. Amphidamas qui se porte violemment contre tout ce qui luy resiste, & qui croit que toutes choses luy sont deuës, si tost qu'il tesmoigne de les desirer; ne peut supporter patiemment d'une personne qu'il ayme si fort, des paroles si pleines de mespris, & de haine. Tous ceux qui la regardent à cette heure luy donnent de l'om-

brage & de la jalouſie: Mais plus que nul autre Hermodan qui iamaïs ne l'abandonne. Si bien que la premiere choſe qu'il conſeille à Lycaspis, c'eſt qu'il deſende à Diophanie de le voir; & puis qu'il luy commande de ſe reſoudre, & d'adjouſter la volontaire obeyſſance à la neceſſité d'obeyr: qu'aussi bien ſa promeſſe y eſt engagée; & qu'il ne croyoit pas qu'elle fuſt ſi peu ſoigneuſe d'elle meſme, ny ſi peu judicieuſe, que de reſuſer le plus grand bien, & le plus grand aduantage qu'il luy pouuoit jamais acquerir. Lycaspis beaucoup plus indulgent aux volontez d'Amphidamas, qu'à celles de ſa fille, n'oublia point de luy faire dès le jour meſme cette faſcheuſe harangue, ny de luy offrir

le choix de deux choses, où de demeurer pour jamais en sa disgrâce, où de luy donner le contentement qu'il desiroit d'elle. Diophanie se voyant ainsi pressée, encores qu'elle ne peust aisément se persuader que son inclination deust en toutes choses dependre de celle de son pere, ny qu'il luy fust plus expedient d'estre malheureuse toute sa vie, que de luy desobeyr vne fois; se resolut pourtant de luy dire que sa volonté dependoit entierement de la sienne; & qu'elle choisiroit plustost la mort, que la desobeyssance. Mais il luy fut bien plus aisé de pleurer que de respondre; & de ces deux ou trois paroles qu'elle ne pouuoit encore prononcer, elle passa bien tost à l'abondance des larmes. C'est tout l'exercice qu'elle

ſçait faire, la nuit principalement elle s'afflige, elle ſe trauaille ; & cependant Hermodan ſe reſoſe ; où peut eſtre il contente ſon eſprit de quelque douce eſperance, encore qu'il fuſt des-ja temps pour luy de ſe deſeſperer. Il n'a point d'autre impatience que d'attendre le jour, pour ſ'aller rendre en ces beaux lieux ſeuls teſmoins de ſa felicité, & de ſes delices. Mais le jour n'arriue que trop toſt pour luy faire voir Diophanie qui ſ'en viét triſte, & deſolée, luy porter cette faſcheuſe nouuelle. Hermodan, dit elle, c'eſt à ce coup que mon pere eſt au comble de ſa rigueur ; il ne me commande pas ſeulement d'aymer Amphidamas, mais il me deffend auſſi de te voir. Adieu donc Hermodan, le peu de pou-

voir que j'ay maintenant sur mes actions, & sur moy mesme, ne me permet pas de t'en dire d'avantage. Sçache seulement que ma vie ne peut continuer, que par la continuation de ton amour, & que rien ne me peut consoler que ta fidélité. Comment exprimerois-je à cette heure, l'estat auquel fut réduit ce miserable Amant, à qui ce coup fut si rude, & si sensible, qu'il n'en pouvoit luy mesme exprimer autrement la douleur que par l'estonnement & le silence? Il ne sçait de quel costé se tourner, & voyant en celle qu'il ayme, tout ce qui luy fait aymer la vie, se separer de luy; s'il pouvoit juger par qu'elle voye, il trouueroit plus facilement la mort, il ne manqueroit pas de la suiure. Diophanie dés

lors fut faisie d'une si grande tristesse, qu'on la vit changer d'heure en heure, & deuenir dans peu de temps toute dissemblable à soy mesme. Elle estoit pourtant toujours belle, & toutes ses larmes, & ses douleurs eurent bien de la peine à ruiner sa beauté, tant elle estoit grande. Moy qui voyois toutes ces choses, & qui des-jà m'estois apperceu de l'amour qu'elle auoit pour Hermodan; encore que ie ne fusse pas resolu de flatter beaucoup sa passion; n'estimant pas qu'il en peust reüssir autre chose qu'un necessaire changement de l'un, ou de l'autre; ou bien un commun desespoir, Si est-ce qu'il y auoit assez de la rigueur de son pere pour l'affliger, sans qu'il fust besoin d'y joindre encore la mienne. Au

contraire,

contraire ie cherchois tous les moyens de la diuertir, & de la consoler: & voyant bien que le seul nom d'Hermodan estoit plus puissant que tous les discours que ie luy pouuois faire; affin d'apporter quelque soulagement à sa peine, il me fut bien force de m'accommoder autant qu'il m'estoit possible à son humeur; & ce fut lors que i'en appris toute l'histoire. Si ie pensois quelquesfois la remettre sur les considerations de ce qu'elle deuoit faire, pour la ramener doucement à la recognoissance de son deuoir, j'auois à combattre deux passions si fortes, l'amour qu'elle portoit à Hermodan, & la haine qu'elle auoit pour Amphidamas, que toutes mes remonstrances n'auoient point d'autre

effect, sinon de renouveler ses larmes, ou de tirer ces plaintes de sa bouche.

Que nos desirs, disoit elle, & que nos affections sont aveugles; ou que les Loix du Ciel sont rigoureuses! qu'il nous faille aymer si naturellement, ce que nous ne pouvons jamais posseder; & qu'il nous faille estre possedez de ce que nous ne pouvons aymer. Quelle apparence! que ie me puisse jamais persuader qu'Amphidamas, que ie hay le plus au monde, doiue estre la meilleure partie de moy, & s'il faut ainsi parler, vn autre moy mesme. Si les Dieux ont donné beaucoup de choses à sa fortune, ce n'est que pour accuser son defaut, & pour faire voir que beaucoup de choses manquoient à sa

personne. O que mon pere est es-
 loigné de la Nature des autres pe-
 res qui trouuent leurs enfãs beaux,
 quelques difformes qu'ils puissent
 estre! Ou qu'à son opinion ie suis
 biẽ defectueuse, & bien mal faiçte,
 puis qu'il me veut faire trouuer
 mon semblable au plus imparfait
 de tous les hommes: Et comme si
 ie n'estois obligée de voir que par
 ses yeux, & n'aymer que par son
 inclination; il me veut acquerir
 vn bien que ie ne suis point capa-
 ble de sentir, & que ie tiens pour
 vn grand mal. En quoy l'ay-je tant
 offensé, qu'il m'ordonne d'en
 porter toute ma vie la penitence?
 & qu'au lieu que les autres procu-
 rent du repos & du soulagement à
 leurs enfans; il me veuille indi-
 gnement condamner à souffrir v-

ne affliction eternelle ? Seray-je donc seule , en la Nature vnice à mon contraire ? Si c'est vne loy du Ciel pourquoy m'est elle particuliere ? Que les tenebres donc soient vnies à la lumiere , & que toutes choses soient confuses. C'est en vain qu'on me propose que les personnes mesmes qui du commencement nous sont les plus odieuses , quand vne fois la Loy les a rendu nostres , deuiennent à la fin aymables par la coustume , & par la necessité qui nous est imposée de les aimer. N'est-ce pas tousiours vne erreur qui nous possede ? Ainsi le Forçat aime la chaîne qu'il a de long-temps accoustumée. Ainsi le poison mesme, sans perdre sa qualité, sert a plusieurs de viande , & de nourriture :

Et nous sommes sans doute bien malades quand nous ne trouuons de gouſt qu'aux choſes mauuaiſes: & qu'en fin nous mettons le vice en la place de la vertu.

Il me ſouuient touſiours qu'au meſme temps qu'elle me faiſoit ces plaintes. Lycaspis luy vint dire, qu'Amphidamas, ny luy meſme, ne vouloient plus attendre, & qu'elle ſe reſoluſt de ſe tenir preſte dans deux jours pour la conſommation du mariage; Mais elle qui ne vouloit que gagner temps, pour voir ſi elle n'obtiendrait point des Dieux la faueur qu'elle ne pouuoit obtenir des hommes, luy reſpondit qu'en cela ſa reſolution ſ'accorderoit touſiours à ſon deuoir. Mais puis qu'elle eſtoit obligée de quitter bien toſt la con-

dition en laquelle elle estoit, pour entrer en celle que par son commandement, la destinée luy sembloit ordonner : & qu'il falloit qu'elle se guerist tout à coup de la jalousie qu'elle auoit portée aux filles, qui s'estoiēt consacrées pour jamais au seruice de Diane : qu'à tout le moins elle en desiroit sortir avec la bienueillance & la grace de la Deesse ; & qu'elle le supplioit de luy donner quelques jours pour luy rendre les vœux, qu'en cet estat elle ne luy pouuoit continuer toute sa vie. A quoy pour le mieux persuader, elle ajouta, qu'elle ne prefereroit jamais que la volonté des Dieux, à celle de son pere ; qui bien qu'à regret, ne laissa pas d'accorder à sa priere ce qu'il ne luy pouuoit refuser.

Dés ce jour là mesme elle prepara pour le lendemain vne lampe, vn vase d'eau sacrée, vn panier de fleurs, des guirlandes, vne robe blanche, & des odeurs aromatiques. Et pour moy ie l'assistay le premier jour au sacrifice, qu'elle fit d'une genisse blanche, qu'elle me commanda de conduire, & d'immoler en sa presence sur le grand Autel de Diane : où ie remarquay veritablement vn signe dont ie n'auois point encores eu l'intelligéce qu'à ceste heure. C'est que la flamme de tous costez se rassembla toute sur la victime, en la mesme façon qu'on voit les racines contribuer toutes à former le tronc d'un arbre. Et puis au lieu qu'ordinairement elle s'esleue en pointe, elle s'espandoit au contrai-

re comme vne cime large, touffuë,
& toute pareille à celle du Myrthe
que nous venons de voir. Le jour
suiuant qu'elle voulut estre seule,
ie ne sçay pas ce qu'elle fit, ny de
quels presens sa deuotion fut ac-
compagnée. Bien vous diray-je
que sur le soir, ie la vis retourner si
pale, & si desfigurée, que ce n'e-
stoit plus qu'une ombre de cette
premiere Diophanie; & ie ne ju-
geay pas que si ses voyages & ses
vœux continuoient d'auantage,
elle d'eust faire desormais d'autre
offrade à la Deesse que celle de son
ame, qu'elle estoit toute preste à
rendre. On eust dit qu'elle auoit
pris à tasche de ruiner ce beau
corps, de peur qu'il ne fust possédé
d'Amphidamas, ou à tout le moins
d'effacer & de perdre cette beauté

qui l'auoit renduë trop aymable à celuy qu'elle ne pouuoit jamais aymer. Ainsi persistât tousiours en son humeur deuote & religieuse, elle partit le troisieme jour encore plus matin que de coustume; & c'est tout ce que ie vous en sçaurois dire. Car la nuit venuë nous fumes bien estonnez de voir que Diophanie ne reuint plus. Vous sçauiez la dessus quelle fut la desolation de Myrtamise; l'estonnement, le courroux, & la rage de Lycaspis; & comme on nous enuoya le soir mesme, & tous ces jours passez la chercher de toutes parts, sans que nous en ayons sçeu jamais apprendre de nouuelles. Et sans l'adventure de cet estrangier nous eussions en vain cõtinué de chercher bien loin par tout le monde, celle

qui estoit bien pres de nous, & que nous auions mesme deuât nos yeux, sans la voir, & sans la recognoistre. Du mal qu'il a fait, nous auons tiré ce bien de sçauoir ce qu'elle est deuenüe; & en quelque forte il a arresté le cours de nos peines.

L'Esclaue acheuoit ainsi de raconter son histoire, quand nous commenceasmes d'entrer dans la ville. Ils me conduisirēt tous chez le chef de la troupe, où ils m'enfermerēt seul dās vne chābre quelque peu de temps, que i'employay tout à m'affliger: n'esperant pas moins au sortir de là qu'une estroite prison, ou vne eternelle, & cruelle seruitude. Au moins, disois-je, ne seray-je pas du tout captif, si ie puis quelquesfois ainsi soupirer en liberté. Sera-t'il donc dit que ie me

sois voué du tout au service d'une Deesse, & que sans qu'elle s'en soucie, ie sois contraint de souffrir une autre servitude, & que les hommes exercent encore sur moy leur injustice? Faut-il que ie sois puny d'une faute que quelque Deité m'a forcé de faire, trompant mes yeux, & mon jugement, pour se servir seulement de mes mains? Et quoy, le Ciel ne pardonne pas mesme les accidens auxquels nulle prudence ne pouvoit apporter de remede? C'est vostre coustume, ô Dieux! de nous rendre vous-mesmes coupables, & de porter nos erreurs iusques aux crimes, quand vous avez resolu de nous perdre. Et qui est-ce d'entre vous, si i'ose ainsi parler, qui eust peu refuser une branche de Myrthe à

tant de beautez, quand bien mesmes tant de persuasiōs n'y eussent point esté adjoustées? Ce n'estoit qu'un songe, peut-estre, & qu'une vaine image; mais vous-mesmes l'auiez formée: Si d'avanture ce n'estoit point quelque vne d'entre vos Deesses. Quelle gloire en aurez vous, d'avoir employé pour tromper un homme, tant d'appas, & de charmes, auxquels vous mesmes n'eussiez peu résister?



Comme ie m'entretenois de ces plaintes avec plus d'apprehension, que d'esperance, j'entendis ouvrir la porte: & vis entrer vn grand nombre de gens, des plus notables, & des plus vieux de la ville, qui me regarderent fixement le visage, la taille, & la proportion de tout le corps: Et puis m'ayans interrogé sur mon país, sur mon voyage, & sur l'accident qui m'estoit arriué; jls se retirèrent à part, & parlerent long temps ensemble; & à leurs gestes il me sembloit qu'ils consentoient tous à vne mesme chose. Cependant, ie ne scauois ce que i'en deuois croire, & ne pouuois conclurre autre chose en ma pensée; sinon, C'est fait de moy! me voyla vendu; Ie seray bien tost liuré au plus offrant; l'at-

tendois avec impatience de voir ce qu'ils en auoient ordonné: Et n'osant esperer que toute sorte de disgrâce de ma mauuaise fortune; ie me resoluois de souffrir constamment plus de mal, qu'il ne m'en pouuoient faire: Quand au lieu de cela, ie fust tout estonné de voir que ceux que j'auois n'aguères si fort offensez, me traittoient comme s'ils m'eussent eu beaucoup d'obligation; & que le chef mesme de ceux qui m'auoient pris, conuertissant tout à coup sa colere en courtoisie; & ses injures en bienfaits, apportoit vn extrême soin, pour faire que dans sa maison, ie reçusse toute sorte de contentement, & que ie fusse mieux seruy que luy mesme. Ces gens icy, disois-je, ne sont gueres sensibles

sibles aux offenses: Ils punissent doucement les sacrileges; & defendent bien mal la cause de leurs Dieux. Mais ie ne sçauois point qu'ils eussent ceste coustume d'observer les actions, & les paroles de leurs captifs, & de leurs esclaves, pour voir lesquels feroient les mieux inspirez à discourir des temps, & des euenemens, & à deuiner & predire les choses futures, afin de les prendre pour les sacrifier. Si bien qu'en me pourmenant vn soir entr'autres avec quelques vns des principaux, & m'estant apperceu le premier du Croissant de la Lune, comme elle ne commençoit qu'à paroistre au Ciel; ie pris l'occasion d'en parler; & leur dis que i'estimois ceste contrée heureuse, d'estre en la garde d'une

si grande Deesse. Et en suite de cela, ie me mis à leur représenter son cours, ses mouuemens, les causes de ses diuerses formes, tous ses changemens, & ses effects. Ainsi (me portant moy mesme à ma destinée) ces gens m'escoutoient avec vne grande attention: & comme ils admiroient ce qu'ils n'entendoient point; ils prenoient toutes mes paroles pour des Oracles: principalement, m'oyans dire avec tant de passion, les loüanges de la Deesse, & leur reciter des hymnes à son honneur qu'ils n'auoient point accoustumé d'ouir. Ils croyoient que j'eusse esté quelquesfois transporté jusques au Ciel: & que pour en parler de la sorte, il falloit estre inspiré fort extraordinairement, ou bien auoir

esté tefmoin oculaire de tout son cours. Tellement qu'ils disoient tous d'une voix. Sans doute, ce jeune hōme nous est arriué par beaucoup de bon-heur: Et nous n'en auons point vn plus digne de la chaisne sacrée que luy. (Car ils auoient accoustumé d'honorer, & de marquer de ceste chaisne celuy qu'ils auoient destiné pour estre sacrifié.) Ce que ie n'entendois point.

Dés le lendemain, auant que le Soleil fust leué, ils me menerent au fleuve: Là s'estans despoüillez, & m'ayans obligé d'en faire autant; apres s'estre jettez dedans l'eau, ils me vindrent prendre avec la ceremonie accoustumée dont ils vsent en leurs purgations; & me plongerent bien auant jusques à

trois fois , me tenant tousiours la teste tournée du costé de l'Orient. Puis voyans que j'estois net, & sans aucune tasche , ils me reuestirent d'habits neufs , blancs , & noirs, qu'ils auoient fait apporter ; à quoy ils adjousterent la chaisne sacrée qui estoit à trois rangs; le premier d'or, le second d'argent, & l'autre de fer; dont ils me lierent à leur mode, & de telle sorte que j'en auois les bras moins libres. Toutesfois ils me dirent que c'estoit plustost vne marque de franchise, que de captiuité, afin que quiconque me rencontreroit me respectast; & me voyant estrangier ne me prist pas pour esclau. Que tous passe-temps m'estoient permis, & que ie les pouuois aller prendre par les forests, & par les mon-

tagues, où mon plaisir me conduiroit. De là, ils me remenerent à la ville, non au logis accoustumé, mais à celuy du sacrificateur; ou de plus en plus ils continuerent à me faire tant d'honneur, & de bon traictement, que ie ne sçauois si j'en deuois imputer la cause aux preuues que ie leur auois données de mon courage; ou à l'instruction, & à la cognoissance que j'auois de beaucoup de choses; ou bien à la Noblesse de ma Nation; estimant qu'un Grec pouuoit aisément passer pour un demy-dieu parmy les Barbares.

Mais Endymion, dit Pyzandre, pardonne à ma iuste curiosité, si elle m'oblige de t'interrompre pour te demander ce que deuient Hermodan, depuis que vous le lais-

fastes au pied du Myrthe. Hermo-
dan, dit Endymion, demoura tout
le jour à contempler Diophanie
en ce nouuel estre, à l'adorer, & à
luy faire ses plaintes: Mais il y a de
l'apparence qu'elle n'eut plus de
voix, ny de paroles, & que le sort
peut estre auoit borné tout ce
qu'elle deuoit jamais dire, à celles
qu'elle nous fit entendre. Et ie
croy qu'il n'en receut plus de res-
ponse, ou que tout ce qu'il en peût
recevoir, ne seruit qu'à l'affliger
d'auantage, & à le desesperer.
Voyant donc qu'il n'y auoit plus
pour luy de Diophanie, & que
c'estoit vne mesme chose, que de
la voir en l'estat qu'elle estoit, & de
la voir morte. Qu'apres auoir ac-
quis l'affection de la plus grande
beauté du monde, & s'estre veu

preferer en cela, non seulement aux plus puissants des hommes, mais aux Dieux mesmes, il ne luy restoit plus rien à desirer. Et d'ailleurs, qu'ayant esté la principale cause de tout ce qu'il y auoit de plus tragique, & de plus lamentable en cette malheureuse auanture, c'eust esté manquer de ressentiment, & de courage, de vouloir encore vivre, pour n'en acquerir que du mespris, & de la honte. En fin voyant que l'amour, le desespoir, & sa conscience mesme, luy reprochoient tous les momens qu'il adjoystoit à sa vie : il se soucia bien peu d'estre désormais du nombre des morts, pourueu qu'en se sacrifiant deuant elle, il la mist, autant qu'il luy estoit possible, au rang des Deitez. De telle sorte qu'ayant ar-

rosé tout le iour le pied du Myrthe de ses larmes, il se resolut sur le soir de l'arroser encore de son sang: mais de bonne fortune, comme il estoit pres de se donner la mort, quelqu'un se trouua sur les lieux, qui s'en estant apperceu, luy osta de la main le dard qu'il vouloit employer à ce pitoyable office. Lors pour venir à bout de son dessein, il eust volontiers cherché les precipices, & les gouffres; s'il n'eust point mis au rang des crimes, d'abandonner desormais vn seul moment de sa vie, celle pour qui seulement, en quelque estat qu'elle fust, il vouloit ou mourir, ou viure. Il implore donc la pitié des Dieux, & particulièrement du Soleil; & les conjure tous avec tant d'affection de mettre quel-

que fin à ses peines , que la nuit estant venuë , comme toutes choses estoient des-ja paisibles & muettes , ils arresterent aussi le cours de ses plaintes : & par vn changement presque pareil à celuy de Diophanie , luy donnerent le repos qu'il auoit desiré de leur faueur & de leur assistance. Si bien que le lendemain ceux qui accouroient de toutes parts , pour voir cette nouuelle Nymphé sous la forme d'vn Myrthe ; furent tous estonnez de voir deuant elle vn autre spectacle ; dont la representation n'estoit pas moins encore d'Hermodan , que d'vn Oliuier sauuage. Et l'Oliuier & le Myrthe , estoient si pres l'vn de l'autre , que des-ja leurs branches commençoient à se toucher , en signe de

sympathie , & de bienveillance. Depuis ce temps-la , les Nymphes de ces lieux , ne firent plus retentir autre chose que les noms d'Hermodan , & de Diophanie ; & chanterent continuellement leurs loüanges, comme de deux incomparables exemples d'amour , & de fidelité , qu'on recommandoit pour iamais à la Memoire , & à la Renommée.

J'ay encore , dit Pyzandre , à m'esclaircir d'un autre doute , c'est que tu m'as parlé d'une ville , d'un fleuve , & d'un pais iusques icy , sans me nommer , ny les uns ny les autres. Vrayment, respondit Endymion , il est fort aisé de te satisfaire la dessus: Car ces trois choses n'ont presque qu'un mesme nom: La ville s'appelle Albe , le fleuve

Alban, & le pais Albanie. Et cela, comme ie pense ; à cause de la nature du lieu, qui faiet que ces peuples ont presque tous les cheueux blancs en leur ieunesse. Peuples excellens en beauté, grands de stature, nouueaux Cyclopes qui habitent aupres de la mer Caspienne, & du mont Caucase ; la plupart pasteurs Galactophages, & de vie, & de mœurs, simples, innocens, & iustes, & veritablement tels que les Abiens, & les Nomades. Quand au reste, c'est vn pais de pasturages, où la terre est tellement fertile, que mesme sans estre cultiuée, elle produit vne infinité de bons fruits, ce qui rend à mon aduis ces gens là plus negligens, & moins addonnez à l'agriculture : Car en effect, ils n'ayment aucun

labeur, s'il n'est incontinent fuiuy de la recompense, ou accompagné du plaisir, comme celuy de la chasse: A quoy mesme ils apportent plus d'ardeur, & d'affection, que d'industrie. Mais au defaut de l'art, la Nature leur a dōné les meilleurs chiens, & les plus forts du monde, qui combattent, & tuent les Lions; & qui ne craignent point d'attaquer les plus grands d'entre tous les animaux. Autre chose ne t'en sçaurois-je dire, sinon, que comme l'Egypte a son Crocodile, avec sa fertilité; Aussi ceste terre a ses serpens, dont les morsures sont mortelles, & le venim si chatouilleux, qu'on en meurt en riant.

C'est en ces lieux là, Pyzandre, qu'insensible au mal qui ne mena-

çoit pas seulement ma vie, mais qui des-jà la pressoit, i'ay demeuré tout le temps que tu ne m'as point veu; que i'ay passé la plus grande part en oyfiueté, sous les frais ombrages, le long des ruisseaux, parmi les fleurs, & les herbes odorantes, entre les Nymphes, & les Se-reines, au comble de mille voluptez; Si mon esprit eust esté capable de les ressentir, estant d'ailleurs comme il estoit également réduit au comble de mille peines. Ce n'estoient que festins, où j'estois traitté de viandes les plus exquises: Ce n'estoit que Musique de voix, & d'instrumens; que danses de ieunes hommes, & de belles filles. En fin ce n'estoient que jeux, & que delices. Si j'estois accompagné, aussi estois-je seul quand ie

voulois ; & choiffant tousiours les exercices qui m'estoient les plus agreables , j'allois d'ordinaire m'escarter par la forest, où plusieurs fois ie rencontray Diane, dont la seule presence me faisoit viure , au mesme temps que son changement , & le souuenir du passé me faisoient mourir. Tantost ie la voyois passer accompagnée des soixante filles de l'Ocean, & des vingt autres qui ont le soin de ses arcs , de ses flesches, de ses brodequins, & de ses chiens. Tantost ie la voyois retourner de la chasse toute fiere, & glorieuse, des Lions, des Ours, & des monstres qu'elle auoit terrassez. Par fois aussi ie la trouuois qu'elle estoit presque seule, où ie pouuois tout à loisir la considerer, & me faire

voir. Mais le croiras-tu bien ? Pyzandre, si est-il bien vray, encore qu'il ne soit pas croyable ; Quoy qu'elle me vist en l'estat où i'estois, portât la chaisne qu'elle cognoissoit bien, & que ie ne cognoissois pas moy-mesme ; marque non seulement de ma captiuité ; mais aussi de la fin à laquelle j'estois destiné : Quoy qu'elle sceut bien que ie m'en allois mourir pour elle ; cependant elle eut le courage de me regarder sans pitié, comme si elle eust esté changée en vne autre, ou qu'elle eust perdu tout d'un coup pour moy le ressentiment, le souuenir, la cognoissance & la parole. I'eusse autant gagné de m'aller presenter aux rochers, où se vont rompre les flots de la mer, & où se font les naufrages. Et puis

il ne me sera pas permis de l'appeler vn peu cruelle ; puis qu'il ne me reste deormais d'autre contentement que de reprocher mon affection à celle qui ne la reconnoist point. La Nymphe mesme qui m'auoit tant promis de faueur, & d'assistance ; & à qui i'auois tant voüé de seruice, auoit également oublié mes vœux, & ses promesses ; & ne me daignoit plus regarder, ou me regardoit seulement comme indifferent, ou cōme coupable. Faut-il qu'il me couste si cher d'auoir outrepassé les loix qu'Ismene m'auoit prescrites ? & d'auoir esté forcé de violer les choses tenües pour sacrées ? Heureux Endymion, si tu n'eusses point trouué de Myrthe dans la forest de Diane. A tout le moins ie deuois

adjouster

adiouster foy des le commencement à l'Oracle qui en sortit, & qu'à la fin ie ne trouuay que trop veritable. Ie deuois perdre le soin de me presenter deuant elle; puis que son humeur insensible, frustroit continuellement ma peine & mon attente. Mais l'Esperance qui nous entretient d'erreur, & de vanité, & nous veut obliger à forcer nostre destinée; me persuadoit de tenter encore vne autre fois la fortune; & puis encore vne autre fois. J'allay mesme si souuent jusqu'aux lieux où ie l'auois premierement veuë, & où ie receus de sa main milles morts sans mourir, qu'à la fin il m'arriua de l'y trouver, & de participer à vn spectacle bien plus digne des Dieux, que des hommes.



Le bruit que faisoient ces Nymphes, à qui son affection, & sa bonté permettent toutes choses en ces lieux escartez jusqu'à se jouer familièrement avec elle, me donna le moyen de me mettre à couuert, en vne place que i'auois auparauāt remarquée, où ie pouuois tout voir, sans estre veu de personne. Elles se tenoient donc la plus part debout deuant la Decesse, & consideroient attentiuement l'effort que trois ou quatre des principales faisoient contre elle, qui ne s'en defendoit qu'en se riant, & comme celle qui se soucioit bien peu d'estre vaincüe. Il sembloit à les voir vser imperieusement du pouuoir qu'elle leur donnoit, qu'elles eussent faict eschange de leur condition, avec la sienne; & qu'estant veritable-

ment foubſ-miſe à leur Empire, elle euſt merit   d'elles vn trait  ment de criminelle, ou de deſobeiſſante. Car l'vne luy lioit les pieds, & l'autre les mains, avec des liens d'or, & de ſoye, qu'elles faiſoient tenir    des Dryades, qui eſtoient    l'entour d'elle. Dieux ! penſay-je en moy meſme, eſtonn   de voir t  t de beautez, & de vertus captiues ; en quelque eſtat que ſoit Diane, elle eſt touſiours charman- te, elle eſt touſiours rauiffante ; & les moindres trait  s qu'on voit en elle, teſmoignent manifeſtement qu'elle eſt Deeſſe. La voyla priſe ; elle a les mains li  es ; elle ne ſ  au- roit plus tirer de fleſches ; elle ne ſ  au- roit plus faire de bien, ny de mal. Apres cela, l'vne luy oſtoit ſon arc, & l'autre ſon carquois :

j'attendois l'heure qu'elles luy ostassent aussi le Croissant de dessus la teste; ou qu'elles la despoüillassent, comme si elle eust eu quelque dessein de se baigner. Il faut aduoüer qu'alors mon esprit également combattu de crainte, & de curiosité, ne sçauoit à quoy se resouldre. Pour ce que s'il m'arriuoit de la voir en cet estat, & d'estre decouvert, indubitablement ie courrois hazard d'estre puny de mort, ou d'aueuglement; ou de quelque autre affliction mille fois pire que la mort mesme. Mais de fortune Iupiter se pourmenoit lors entre le Ciel, & la Terre, caché dans vne nuée obscure; & les ayant apperceuës (comme il se donne souuent du plaisir aux despens des Nymphes & des Deesses) apres les auoir

long-temps considérées; il les surprit en vn instant, d'vn coup d'esclair & de tonnerre, & leur versa tant d'eau sur la teste, que leur soudaine fuite ne les en peut garantir. Les Dryades en murmurerent, & ne s'en pouuoient taire; Mais les Nayades n'en firent que rire: & moy ie pris l'occasion de me retirer.

Ainsi beaucoup de temps se passoit insensiblement, & la feste des sacrifices estoit proche. C'est lors que Diane cessât de m'estre fauorable, Ismene me pouuoit tenir lieu de Deesse: si la cognoissance qu'elle auoit de ce qui me deuoit arriuer, & le souuenir des promesses qu'elle m'auoit faictes, l'eust obligée d'auoir plus de soin de mon retour, que ie n'en auois pas moy-

mesme. Est-il possible, dit Pyzandre, que tu ne fusses point quelquesfois en peine du temps & des moyens qu'elle prendroit pour te retirer de-là ? Tant s'en faut, dit Endymion, qu'il me prist quelque enuie de l'appeller à mon ayde, & que j'eusse mesme son nom dans la bouche, que ie m'empeschois d'y penser ; de peur que ma seule pensée ne paruint à sa cognoissance, & faisant quelque effort à sa vertu, la sollicitast de m'estre fauorable. Comme si ie ne craignois rien tant que d'estre tiré de la peine en laquelle j'estois. Vn desir aueugle me portoit obstinément à suiure ce que ie deuois fuyr. Ou contraire, ou fauorable, il falloit que j'alasse continuellement chercher Diane. D'ailleurs la grande innocence

de ces peuples, l'honneur, & le bon traictement que j'en receuois, la beauté des lieux, & des personnes, & principalement des femmes qui presque toutes ont les cheveux extrêmement blonds, le teint frais, blanc, & vermeil, & la taille si belle, & si auantageuse, que si elles adjoustoient à leurs perfections naturelles l'art de les faire valoir, avec la grace, & les ornemens qu'ont les femmes Grecques, on les prendroit veritablement pour des Deesses. Toutes ces choses qui semblent obliger Diane mesme à les visiter si souuent, me pouuoient bien faire oublier pour quelque temps les charmes de ma patrie.

Le Sacrificateur entr'autres nommé Timétes, auoit vne niepce de l'aage de dix sept, ou dix-huict

ans, qui prenoit avec luy le soin des choses sacrées, & sembloit se vouër toute au service de Diane. Mais son extrême beauté s'opposoit fort à ses vœux; estant telle, avec la grace naturelle dont elle estoit accompagnée, qu'en quelque part du monde que soient les autres, il y en a bien peu qui l'égalent, & point qui la surpassent. Dès le premier instant que ie la vis, j'eus quelque opinion de l'avoir autresfois veüe, ou à tout le moins quelque ombre, ou quelque ressemblance de sa beauté. Car ayant esté de tout temps separé par tant de fleuves, de montagnes, & de païs si loingtains: il n'y avoit pas d'apparence que ce fust elle mesme. Il me sembloit d'autre costé, qu'elle estoit en pareille peine que moy;

pour ce qu'elle me regardoit comme si elle eust pensé me recognoistre : Ce qui me fit soudain imaginer, que nous nous estions veus au Ciel, deuant que de naistre sur la terre ; & que par consequent nous pourrions auoir quelque sympathie de volonte. Cependant, moy qui ne fus jamais peu sensible à la rencontre de ces objects, (si ce n'est depuis la loy, que ie me suis moy-mesme imposée, d'observer constamment les vœux que i'ay faicts à Diane, dont la seule image purifie mes pensées, & bannit de mon cœur routes passions terrestres, & mortelles.) Je ne voulus point l'obliger à beaucoup d'affection, par beaucoup de discours, ny luy jurer ce que ie ne luy pouuois iamais tenir : ayant

toufiours obferué cela parmy toutes fortes de perfonnes, que mes paroles ne foient en rien différentes de mes intentions: Mais bien, tafchay-je de luy rendre, dès le commencement que ie la vis, toutes mes actions agreables, pour en meriter quelque bienveillance. C'est l'ordinaire qu'en ces occafions nous fentons quelque chofe qui nous anime fi fort, & qui excite en nous les defirs d'une affection fi naturelle, que nous auons beaucoup de peine à nous vaincre, & à ne donner point de cognoiffance de noftre fentiment. Et quant bien, pour ce refpect, noftre inclination feroit moins forte, fi eft-ce que la bienfeance nous oblige de ne nous tefmoigner pas du tout infenfibles.

Les grandes beautez ont ie ne
ſçay quoy de plus diuin, & de plus
puissant que les Sceptres, & les
Empires: Et l'extrême disposition
que nous auons de les aymer, fait
que nostre opinion leur adjouſte
encores de nouvelles puiffances,
& de nouveaux charmes. Elles
ſçauent ſi naturellement, & ſans
l'auoir iamais appris, l'art de per-
ſuader, & de contraindre, que
leur ſilence meſme eſt plus elo-
quent que toute ſorte de langage.
Nous ne les ſçaurions voir ſans
eſtonnement, ny ſans trouble; Et
leur ſeule preſence en vn inſtant,
nous fait perdre le iugement, la
force & le courage. Car il ſort de
certains eſprits de leurs yeux, qui
nous dōnent telle inſpiratiō, & tel
mouuement que bon leur ſemble,

& par des chaines inuifibles, nous forcent, & nous tirent si doucement, qu'ils nous obligent de les fuiure fans aucune contradiction, & fans resistance. Vn ris, vn geste, vn mouuemēt nous rait en admiration, nous faict soupirer, & nous transporte : Que diray-je dauantage? vn seul regard nous charme, nous enforcele, nous boit le sang, nous transforme, & nous rend insensé. Non, Pyzandre, ie croy que si le monde estoit sans femmes, nous aurions vne familiere conuersation avec les Dieux. Car en effect qu'est-ce qu'elles ne peuvent point sur nos ames? & quelle persuasion, quelle contrainte, ou quelle gesne est comparable à la force de leurs appas? O Iupiter! toutes les offenses, les malices, les

propos deceuants, les artifices, les faux serments, la perte du temps, & les vains trauaux auxquels elles nous obligent, ne nous feront-ils point pardonnables? Moy qui ne deuois, & ne pouuois plus rien aymer au monde, & qui ne respirois que le seruice d'une Deesse; Si est-ce qu'en quelque part que ceste belle me fust presente, j'auois beaucoup de peine à m'empescher d'vser de ie ne sçay quel langage des yeux; d'un silence persuasif; d'un geste plus eloquent que la parole mesme; d'une negligence pleine d'artifice, & d'une façon discrète, & modérée en foy mesme; mais enuers autrui, pleine de violence. A quoy l'innocente liberté de son aage, & le peu d'experience qu'elle auoit, luy

defendoit de prendre garde au commencement ; mais dans peu de iours, elle me fit bien voir qu'elle auoit le cœur auffi tendre que les autres ; & qu'elle n'estoit point d'une nature incapable d'affection , quelque soing qu'elle eust de la tenir secrette. Vne femme plus experte à dissimuler sa pensée, m'eust donné plus de peine à la recognoistre. Mais Sthenobée (ainsi s'appelloit-elle) qui n'auoit point encore appris, que l'amour est vn feu, qu'il est bien mal-aysé de cacher, & d'empescher de luire, & dont l'ardeur donne mille inquietudes, qui causent autant de diuers mouuemens : croyoit que pour bien celer son ressentiment il luy suffisoit de se taire ; comme si l'Amour n'auoit point d'autre

organe que la bouche pour se faire entendre. En effect, vne seule parole ne rendoit tesmoignage de ses pensées. Si bien que c'estoit vn Amour muet, & non pas aueugle; mais il sembloit qu'il eust osté le bandeau de dessus ses yeux, pour le mettre sur sa bouche. A quoy donc, dit Pyzandre, pouuois-tu cognoistre qu'elle t'aymoit? la fin, respondit Endymion, te rendra assez de preuue de la verité. C'est ce qui me le fit croire moy mesme; mais ie ne laisseray pas de te dire ce qui dès le commencement me le fit imaginer. Ie pourrois mettre en compte l'extrême soin qu'elle auoit de moy; la recommandation qu'elle en faisoit aux autres; & les tesmoignages que j'en lisois au visage de ses seruantes, & aux

petits

petits mellages qu'elle me faisoit à tous propos, sous d'autres pretextes; soit qu'elle m'enuoyast de petits presens, soit qu'elle voulust sçauoir où j'estois, si tost qu'elle m'auoit perdu de veüe: Tout me rioit ensemble, & me regardoit d'un œil de bienueillance. Mais tu pourrois estimer que c'estoit pour la coustume qu'ils auoient de traicter ainsi ceux qu'ils voyoient destinez à mourir pour eux. Aussi ne m'arrestant pas beaucoup à de si legeres preuues, ie fus tout estonné de la voir deuenir en si peu de temps si differente d'elle mesme; & changer cette premiere franchise, & ces actions libres, & peu curieuses, signes d'une ame saine, en vne humeur pensue, solitaire, & languissante. Elle auoit or-

dinairement le visage passe, & les yeux enflez, tesmoins de ses veilles, & de son inquietude. Ses regards estoient tantost vagues en l'air, & tantost attachez à la terre, comme d'une personne qui respire profondement. Tantost elle commençoit de parler à quelqu'un, mais elle n'acheuoit point, car elle ne sçauoit ce qu'elle deuoit dire. Tantost laissant là ses ouurages imparfaicts, & oubliant ses plus doux exercices, puis qu'ils ne luy pouuoient faire oublier sa peine; elle se portoit à toute sorte de changement, & s'en alloit impatiemment par tout chercher le repos qu'elle ne pouuoit trouuer en pas vn lieu. Par fois, comme si elle se fust apperceuë qu'elle se descouuroit, & comme si elle se fust reprise elle mesme, elle

se mettoit en quelque deuoir de resister à son mal, & de monstrier vn visage plus gay. Et si la pitié qu'elle auoit de ma fortune, ne luy eust deffendu de m'affliger d'auantage, elle eust mesme feint quelquesfois de me hayr, de peur d'estre accusée de me trop aymer. Mais quoy qu'elle fist, cela ne pouuoit gueres durer; & bien tost apres elle se laissoit aller, comme vaincuë, à sa premiere passion. Elle souspiroit continuellement, sans aucune cause apparente de desplaisir; ny de tristesse; & ne s'en pouuoit empescher, quelque effort qu'elle fist de presser ses soupirs, & de les estouffer dès leur naissance. Puis, ie ne sçay comment le cœur force l'œil de se tourner vers ce qu'il ayme; il n'y auoit rien qui

la peust si fort occuper , qu'elle n'en destournast mille fois ses yeux, pour venir sans besoin, & sans propos, chercher incessamment le sujet de sa pensée. Je t'ad-uouëray bien que par fois ie remarquois beaucoup de changement en son humeur; & de telle sorte qu'elle me faisoit desmentir moy mesme ma premiere croyance, ou craindre qu'elle me jugeast indigne de son affection, pour ne luy en tesmoigner pas assez de respect. D'ailleurs si ie luy eusse fait juger que mon ame eust esté si fort preoccupée de quelqu'autre soin plus agreable, c'eust esté jouër à m'en faire hayr. Les femmes ont ceste disposition naturelle, de se porter soudainement d'une extrémité à l'autre. De deux choses l'un-

ne; ou elles aiment, ou elles haïssent, il n'y a rien de troisieme. Tout ce qu'elles veulent, elles le veulent absolument; & si d'avanture on ne leur accorde au moindre signe qu'elles donnent de leur volonté, il n'en faut point esperer d'excuse. Au contraire elles sont toutes prestes de faire voir à tout le monde le peu d'estime qu'elles en font, & de sauver leur interest au prejudice mesme de ce qu'elles ont le plus aymé. Quand vne fois elles ont changé d'humeur, & d'affection, comme elles se donnent telle croyance qu'il leur plaist des choses passées, elles nous veulent à la fin persuader qu'elles n'ont point esté. Mais ne pouvant pas desmentir nos sens, & nostre jugement; à tout le moins comme elles ont

perdu la volonté d'une chose, elles veulent que nous en perdions aussi la mémoire. La dessus nous n'osons seulement nous plaindre; & la bienfiance nous oblige de nous taire; pour ce que leur tyrannie, à laquelle nous deférons du tout, a tellement gagné sur nous, que la vérité même nous feroit toujours imputée à erreur, & à vanité. Mais de bonne fortune Sthenobée n'eut le temps, ny l'occasion d'en venir à la repentence, ny de me faire esprouver ses rigueurs: Car ie me tins toujours esgalement aux termes du deuoir, & de l'honneur que j'estois obligé de luy rendre: sans toutesfois qu'on me peust rien imputer au prejudice de ma constance, ny des vœux que j'auois faicts de servir eternal-

lement Diane. Et bien que Sthe-
nobée fust telle, qu'on ne pouuoit
preferer à son affection, que celle
d'une Deesse, & qu'il est mal-aisé
d'estre aymé de la plus aymable
personne du monde, sans en auoir
beaucoup de ressentiment; si est-
ce que j'eus tant de pouuoir sur
moy, que ie ne fus nullement tou-
ché de son amour; mais bien de sa
douleur, & du regret que j'auois de
ne luy pouuoir rendre la pareille.
O! trop digne sujet d'une meilleu-
re recognoissance! & d'une affe-
ction aussi fidelle, & aussi sainte
que la sienne! Que ny ma captiui-
té, ny ma mort inéuitable, ny tant
de justes raisons qui la combat-
toient, ne peurent jamais faire
changer de resolution. Ne dois-je
point maudire le jour que ie vis

Diane en humeur de metesmoigner sa bienueillance , & de me promettre ses faueurs ; puis qu'apres m'auoir fait mespriser & perdre toutes choses, elle me porte encores au mespris, & à la perte de moy mesme ?



C de Pas inven.

I Picart fecit.



L'ENDYMION

DE GOMBAULD.



LIVRE CINQVIESME.



E pendant que je repaissois mon esprit de ces douceurs ; & que ie m'entretenois aussi principalemēt de l'esperance de reuoir Diane ; Je fus tout estonné, que sans y penser, ie me vis à la veille de la feste. Chacun s'employoit avec diligence

aux choses necessaires pour le lendemain ; à parer le Temple, & les Autels ; à nettoyer les vaisseaux avec le sel, & le souffre. On ne voyoit que paniers de fleurs, & que rameaux de pin. Les femmes, & les filles estoient la pluspart empeschées à faire des guirlandes, & des bouquets : les vnes preparoient l'encens, & toutes sortes de bonnes odeurs ; & les autres, les vestemens, & les ornemens sacrez. Car bien que ces peuples contens de ce que leur apporte leur terre naturellement fertile, n'ayent presque point de commerce les vns avec les autres, & qu'ils mesprisent les richesses estrangeres: Si est-ce que pour la quantité des vœux, & des offrandes que viennent rendre tous les jours à la Deesse, les Roys,

& les peuples des prouinces circonuoisines; ils ne laissent pas d'apporter assez d'eclat & de magnificence à leurs sacrifices. Pour moy, ie me resioüissois en l'esperance que j'auois de voir toutes choses en leur lustre. Mais ayant desia veu des Bisches, & des Taureaux, qui auoiēt la corne dorée, avec vne infinité d'autres hosties; ie ne m'jmaginois pas que j'en fusse la principale piece. Or voyant qu'on apprestoit le char de Sthenobée, qui deuoit faire vne partie de l'office; je cherchay l'occasion de la voir avec plus de passion que ie n'auois encore fait, comme estant plus esmeu de cette nouuelle pompe, qui luy estoit preparée; & moins satisfait de ce que depuis peu de jours, ie l'auois moins veüe que de cou-

stume. Mais soit qu'il y eust trop de peine, & de contrainte pour elle, à me voir ignorer la fin prochaine à laquelle j'estois destiné, & à ne donner point de cognoissance de la pitié qu'elle en auoit; ou soit qu'elle fust par trop empeschée: tant y a qu'ayant esté priué de sa veüe, tout le reste du jour, non sans en souffrir beaucoup d'impatience, ie m'en allay coucher pour la dernière fois au beau lit qu'elle mesme m'auoit préparé dès le commencement; d'où j'entendois, la nuit principalement, le moindre bruit qu'on faisoit dans sa chambre, qui estoit tout joignant la mienne. L'auois de fortune passé la meilleure partie de la nuit en vn fort doux repos; & l'oiseau du jour à peine auoit chanté

la premiere fois pour appeller l'Aurore : Quand oyant du bruit à ma porte; ie me refueillay en sur-faut; puis entr'ouurant vn peu le rideau pour regarder ce que c'estoit, le vis entrer vn jeune garçon, avec vne torche de cire blanche à la main : & apres luy vn esclau qui porta sur la table vn vase plein d'eau lustrale, avec vn rameau de pin. Car en ce pays-là, les esclaves ont particulierement le soin des choses sacrées. Au mesme temps j'en vis paroistre quelques autres, au milieu desquels estoit Timétes qui prenant le rameau, m'en jetta de loin trois fois vne legere rosée, avec la mesme reuerence que l'on rend aux Dieux, & à leurs Autels: & puis s'estant approché de moy, il me dit ces paroles.

Nous auons jusques icy reconnu les grands auantages que les Dieux t'ont donné sur les autres hommes, Endymion : Mais il reste encores quelque chose à la perfection de ta gloire : Et voicy le iour solennel, que nous deuons voir les plus notables preuues de ta générosité. En quoy nous n'auons rien à desirer, siñ que tu sois tousiours semblable à toy mesme. Les grâds courages ne succombent jamais aux efforts d'aucune aduersité; ils ne trouuent rien de plus grand qu'eux; & toutes les choses humaines, leur semblent si petites, qu'ils desdaignent de viure pour l'amour d'elles. Que s'il n'y a point de labeur qui les estonne, ny de douleur qui les face plaindre; qu'est-ce qu'ils pourroient redouter

ter en la mort , que tant de vertueux méprisent , que plusieurs mesme desirent , & que tous les hommes doiuent souffrir vne fois ? Les Oracles sortis de ta propre bouche nous ont appris que tu es plus digne du Ciel , que de la Terre : & que la Deesse ta choisi sur tous , pour estre la plus chere & la plus agreable victime qu'on luy scauroit presenter sur son Autel. C'est pourquoy nous t'auons tousiours tant honoré ; dequoy nous serons assez recompensez ; si tu te portes aujourd'huy constamment ; ne craignant point d'accourcir ta vie ; pour accroistre si fort ta renommée. Iustifie nous donc avec toy ; & (si j'ose ainsi parler) Iustifie la Deesse mesme en l'eslection qu'elle en a faicte : & nous serons

obligez d'en celebrer eternellement la memoire, comme de celuy que ses mœurs & sa vie auront rendu si cher aux Dieux, & sa mort si salutaire aux hommes. Ce jour est pour toy le plus heureux de tous, Endymion, où tu dois auoir tant de tefmoins de ta gloire; quād tu leur feras cognoiftre qu'ils ne te conduifent pas tant à la mort, qu'à l'immortalité. Fay donc voir non feulement que tu es homme, mais que tu as vne grande refsemblance aux Dieux mefmes qui te veulēt rauir d'entre les hommes.

A ces paroles, chacun d'eux regardoit attentiuement quel feroit mon geste, & mes premiers mouuemens, que ie tafchay de vaincre autant qu'il me fust poffible. Car qui est celuy qui puiſſe entendre

sans émotion quelque nouvelle extraordinaire, & inopinée, encore qu'elle ne le touche point; & qu'il n'y ayt pour luy particulièrement aucun sujet de joye, ny de tristesse? Et puis la mort est tousiours assez hideuse d'elle mesme, en quelque forme avantageuse qu'on la puisse presenter: Neantmoins prenant resolution sur le champ, ie leur respondis ainsi. Quoy donc est-ce pour l'amour de Diane qu'il faut aujourd'huy que ie meure? Ouy mon fils, dit Timétes, pour la plus belle, pour la plus grande, & pour la meilleure de toutes les Deesses. Celuy là dis-je a trop heureusement vescu, qui a esté trouué digne de mourir pour Diane. C'est la plus agreable nouvelle que vous me puissiez apporter: n'en foyez

point en doute; la resolution en est toute prise. Aiguisez vos couteaux, trempez les hardiment dás mon sang, espendez le pour l'amour d'elle jusques à la derniere goutte, & que tout son Autel en rougisse; tant s'en faut que l'apprehension m'en trouble, & m'en estonne, que j'en attends l'heure avec impatience. La journée, dit-il, est encore toute à toy. Et bien que les sacrifices des Dieux Celestes se celebrent ordinairement en la presence du Soleil; ie ne sçay par quel destin il nous est ordonné d'attendre la nuit, & de rendre cestuy-cy plus recommandable par la presence de la Deesse; sinon pour ce que tu luy es plus cher, & plus agreable que toutes les autres victimes qui luy ont esté jamais offer-

tes. Courage donc mō fils, adjousta Timétes, en me baissant, & m'embrassant: Encore estoit il necessaire de t'en aduertir, afin que tu en foyes tousiours d'autant mieux préparé. Allez, allez dis-je, pouruoyez au reste; ie seray plustost prest que vous, & le retardement de la mort, me sera plus fascheux que la mort mesme.

Ainsi me laisserent ils, se regardans les vns les autres; non sans jetter quelques souspirs & quelques larmes. Ah Sthenobée, dis-je alors en moy mesme; est ce pour cela que tu fus tout hier cachée? As tu bien eu le courage de me refuser vn seul dernier jour ta veuë? comme si j'eusse desiré quelque autre chose de ta faueur. M'ostant ainsi deuant le temps, vn des plus

doux plaisirs de ma vie, tu commences la première à me faire mourir. Et toy, Ismene, que sont devenues tes promesses? est-ce là le soin que tu devois avoir de moy? Peut estre ne crois-tu pas estre obligée de me donner le secours que ie ne t'ay point demandé. Mais ce que tu ne dois point à mon desir, à tout le moins tu le dois à ta promesse; & ne te mettant point en deuoir de me le rendre, tu n'en demeures pas moins coupable. Helas ! vn peuple brutal & barbare, a pitié de ma destinée: Ceux qui me veulent faire mourir, me pleurent; & celuy qui me doit donner le coup mortel, me baise, & m'embrasse des mesmes bras qui doiuent plonger le cousteau bien auant dans mon sang, & m'ouurir

les entrailles : Et toutes ces choses ne me font pas meriter de Diane vn seul traict de pitié : elle demeure tousiours insensible, & se soucie aussi peu de ma mort que de ma vie.

Est-ce donc sur vn Autel, Diane, qu'il se faut presenter à toy pour te trouuer fauorable, & pour receuoir les effects de tes promesses ? Faut il les aller chercher par les eaux de Stix, & par des fleuves de sang, & de larmes ? Est ce par là qu'on va prendre possession d'une place entre les Astres : & sans quitter la despoüille de ce corps mortel & terrestre, ne peut on paruenir aux honneurs du Ciel, ny participer à la gloire des Dieux ? Non, non, ie voy bien que c'est : ne m'en ayant donné que des paroles, dont

en vain je garde le souuenir ; tu veux que j'en perde l'esperance avec la vie ; & que par ce moyen j'aille noyer toutes choses dans vn eternal Oubly. Tu t'es repentie de m'auoir fauorisé de trop de bienveillance ; mais encore que tu me faces mourir , tu ne scaurois faire que ie ne me repente de t'auoir trop fidellement adorée. Et bien que mon affection soit du tout effacée de ton cœur ; si est ce qu'elle ne le scauroit estre de ta memoire , qui me suffira contre toy mesme , pour te reprocher à iamais ton changement , & ton ingratitude. Adjouste encore à ma mort quelque nouveau tourment ; & pourueu qu'il te soit agreable , ne doute point qu'il ne me tienne lieu de felicité. Au moins quelque grande que

tu fois entre les Dieux, & me pourray vanter d'avoir quelque chose de plus grand, & de plus divin que toy, puis que j'auray plus de constance.

Comme ie disois ces choses d'une voix basse, & d'une ame fort resoluë, bien que fort offensée; les soursuspirs & les sanglots de Sthenobée, percerent le mur qui estoit entre sa chambre & la mienne, & vindrent iusqu'à mes oreilles. Ce qui m'imposa silence tout à coup, pour escouter vne plainte qui me devoit estre si chere, & qui me plaignoit mieux que ie ne faisois moy-mesme.

Est-il possible, disoit-elle, que ie puisse voir aujourd'huy d'un œil sec, vn spectacle si tragique, & si lamentable? & qu'il me faille

assister, & comme consentir à vne action si cruelle, & si contraire à ma vie, & à mon repos? Et mesme que ie face vne partie de l'office? Endymion, Endymion, pardonne-le moy, ie te prie; & sçache qu'au dessein que j'auois de te deliurer, i'ay long-temps oublié ce que ie deuois à ma patrie, & à moy-mesme, pour te rendre ce que ie ne te deuois point. Car qui a veu jamais aymer si fidèlement que moy, & n'auoir que tout sujet de n'en rien esperer? Deuois-je seulement tourner les yeux sur vne personne pensiue, solitaire, & preoccupée de quelque soin que ie ne pouuois comprendre; & qui ne se soucioit autrement de moy, que pour s'acquiter de la bienfaisance, & par quelque cou-

stume d'honorer mon sexe ? Mais
hélas ! il est temps de te plaindre,
& non plus de t'accuser. Sçache
donc encore, que si tu reçois au-
jourd'huy le coup mortel, j'auray
la plus grande part au sentiment,
tu en souffriras quelque moment
la violence ; & moy j'en rendray
la douleur immortelle. O Endy-
mion ! pourquoy ne m'ont les
Oracles mise en ta place ? pour-
quoy n'y puis-je estre receuë ? ou
à tout le moins que ne puis-je
mourir avec toy, puisque le mal-
heur m'en veut tant que ie n'y
puisse viure ? Et toy Deesse , si
grande, & si puissante, qu'est-ce
qu'il te reuient d'un mal auquel tu
peux si facilement apporter du re-
mede ? La gloire, & la felicité qui
t'environnent ont-elles besoin de

nostre affliction pour les rendre plus grandes? & tirent-elles quelque avantage, & quelque perfection de nos douleurs, & de nos peines? Ou si nostre superstition te donne ce que tu ne nous demande pas; ne permets point que nostre erreur continuë plus longtemps, n'y qu'en cet acte d'inhumanité qui n'a pour objet, & pour cause que ton service, ie tesmoigne plus de ressentiment & de pitié que toy mesme. Contente toy d'un plus doux sacrifice, & fay trouuer en la place d'Endymion quelque biche, ou quelqu'un de ces bœufs vagabonds marquez de la lampe, qui te sont consacrez en Perse, & qui viuent inutilement, sur les bords de l'Euphrate, cependant que les plus excellens des

homme te font immolez. Ou, si tu l'aymes mieux, reçois ma vie pour la sienne: La mort en cette occasion me sera grandement favorable; soit que tu me l'ordonnes pour la recompense des services que ie t'ay rendus; ou pour la punition de t'auoir estimé trop cruelle.

Ainsi se lamentoit la pauvre Sthenobée, & l'excez de sa douleur ne pouuant plus souffrir de contrainte, ny se retenir dans les bornes d'aucune consideration, luy faisoit espandre encore plus de larmes que de paroles. Ce m'estoit beaucoup d'heur, Pyzandre, d'estre plaint de la façon, & beaucoup de peine d'oïr, qu'elle se tourmentoît si fort, & ie ne sçay comment cela tout ensemble me

soulageoit en m'affligeant , de telle sorte mesme que me voyant ainsi regretté , j'eusse eu du des-plaisir de ne mourir pas. L'auois tout sujet de trouuer la mort douce, & souhaitable, tant pour estre offert à Diane, que pour estre pleuré de Sthenobée : Mais toutes ces choses n'estoient encores que les premiers traits de son desespoir.

Cependant le iour estoit grand, & l'heure de se leuer estoit desja venuë , quand ie vis venir, non plus les Esclaues qui auoient accoustumé de me seruir, (Car ils se tenoient loin de moy, & ne me rendoient plus d'autre deuoir, que celuy des larmes;) mais vn de ceux qui auoit le principal soin des choses sacrées ; lequel m'apporta des habits plus blancs que neige,

& dont la bonne odeur surpasseoit les plus doux parfums de la Sabée, & les delices des Assyriens. Apres me les auoir presentez avec plus de respect, & de reuerence, que si ç'eust esté au plus grand Monarque de la terre, il se retira incontinent: Car c'estoit desormais à Sthenobée de commencer à faire son office. Mais outre que c'est la coustume des filles d'estre extrêmement longues à s'habiller, les iours principalement qu'elles doivent estre parées; il ne faut pas douter que sa tristesse ne la rendist encores plus lente. Si bien qu'elle se fit long temps attendre. En fin la voicy venir plus magnifique, & plus pompeuse que ie ne l'auois encores veüe, coiffée ce sembloit de la main des Graces, qui n'a-

uoient pas oublié de donner à ces cheueux toutes les façons que Venus leur auoit apprises ; d'y faire esclater les pierres les plus precieuses , ny de la couronner des plus belles fleurs. Lors ie recognus celle dont j'auois tant de peine à me reffouuenir au cōmencement ; que j'auois premierement veuë en songe dans la forest sacrée ; & qui sembloit ne deuoir jamais paroistre deuant moy, avec tout l'appareil de ses appas , & de ses charmes , que pour me rendre criminel, ou bien pour me faire mourir. Je la recognus aux riches ornemens de sa teste, à sa ceinture d'or, & d'émeraudes , & à sa robe parsemée de fleurs ; dont le fonds estoit de ie ne sçay quelle estoffe blanche, fine, & luisante, que font des
plus

plus exquisés toisons du monde, les Nymphes qui habitent les riuages de Phasis. Il ne luy restoit plus , pour estre en toutes choses celle-la mesme qui m'apparut dás la forest, que d'auoir le couteau dans la main , qu'elle eut aussi, quád nous fusmes deuant l'Autel. Mais ie ne vis jamais sur elle en nulle part le Myrthe qu'elle m'obligea de couper, & qu'elle deuoit tousiours porter en ma faueur. Cōment dit Pyzandre, ne voyois tu point ce qui paroissoit le plus en elle? Car cet amour extrême qu'elle auoit en vain pour toy, estoit le vray Myrthe qui deuoit lōg. temps fleurir dans son sein, bien que sans esperance d'aucun fruiet. Telle n'estoit point Thetis, dit Endymion, le jour qu'elle espousa Pelée:

T

ny telle n'estoit point celle qui sert les Dieux à table, quand par Iunon mesme elle fut présentée à Hercule. Et bien qu'alors la pauvre Sthenobée plus esmeuë que jamais, n'eust point de couleur asseurée; qu'au mesme instant on la vist rougir, & pallir; & que tous les traicts de la douleur fussent peints en son visage; si est ce que sa beauté ne laissoit point de luire malgré son affliction: ses larmes estoient sur les jouës, comme la rosée du matin sur les roses: & sembloit que la douleur mesme luy adjoustast encores quelque nouvelle grace. Quand au reste, elle estoit suiuite de quelques vnes de ses plus fidelles compagnes, toutes propres, & gentilles, & de ses seruantes, qui portoient les ornemens dont elle me

deuoit parer. La premiere chose qu'elle fit, elle m'arrofa, comme auoit faict Timétes de quelque goutte d'eau, qui fut bien tost apres fuiuite d'un torrent de ses larmes. A peine auoit elle commencé de mettre le bandeau de pourpre sur mon front, & de le lier sur mes cheueux, avec vne main tremblante, que son cœur gros d'angoisse, & d'amertume, se desborde plus que jamais en pleurs, & en souspirs. Elle n'a plus de pouuoir, ny de cōmandement sur soy mesme, & la raison n'estant plus absolue, la douleur s'emancipe. En vain ces pauvres filles se trauaillent à la faire resoudre; la pitié qu'elles en ont les emporte elles mesmes, & les contraint presque d'en faire autant. Si bien que cela m'obli-

gea de luy parler ainfi.

Que veut dire cela Sthenobée ?
Es-tu venue icy pour m'affliger ?
As-tu plus de pitié de moy , que
moy mefme , ny que Diane ? Si tu
estois en fa place , à ce que ie voy ,
peut eftre ne mourrois-je pas. Iuf-
ques icy ma resolution ne m'a
point permis de m'eftonner ; & tu
veux feule m'apporter du trouble.
Laisse moy de grace mourir en
paix ; & contente toy que ie te die ,
que j'ay plus de pitié de ta dou-
leur , que ie n'ay d'apprehenfion
de la mienne. Je ne fentirois pas
mefme la mort , fi ton desplaifir ne
me la faisoit fentir ; & la destinée
ne m'est cruelle , qu'en ce qu'elle af-
flige ta beauté pour l'amour de
moy. Certes fi tu continuës , ce se-
ra me faire mourir plus d'une fois.

O. Sthenobée! Garde mon ame, & mon sang pour l'Autel, & ne les espan point avant le temps, en tes souspirs, & en tes larmes.

Je n'eus pas si tost prononcé les premieres paroles, qu'elle se mit à redoubler ses pleurs: & sembloit que le desir que j'auois de la consoler l'obligeast encores à s'affliger d'auantage. Et lors que i'eus acheué elle voulut parler; mais elle n'en eut pas le pouuoir, tant sa douleur estoit grande. En fin comme apres vn effort violent, on n'en peut recommencer vn autre, sans prendre quelque relasche: Ainsi ayant pour vn peu de temps essuyé ses yeux, elle raschoit assez lentement de se remettre en son deuoir, & s'approchant de moy, elle commençoit tantost vne chose, & tan-

toſt vne autre, mais elle n'en ache-
uoit pas vne. Car eſtant outrée, &
faisie du deſeſpoir, qui n'agueres
luy auoit fait perdre la parole, elle
perdit encore à la fin le ſoulage-
ment des pleurs, & des ſouſpirs, &
ne luy reſta plus que des ſanglots,
ſeuls reſmoins de quelque peu de
vie en elle, & de beaucoup de dou-
leur. Si bien que s'eſtant panchée
ſur mon lit, les autres furent con-
traintes, de mettre la main à l'œu-
re; & quelqu'une d'elles me di-
ſoit. Helas! elle a bien fait tout ce
qu'elle a peu pour en faire mettre
vn autre en ta place; juſqu'à s'en
conſeiller à des femmes fort an-
ciennes, dont elle croyoit que l'art,
& l'experience, luy peuſſent four-
nir quelque inuention pour cet
effect. Et d'ailleurs ſon apprehen-

sion estoit quelque peu diminuée par l'esperance que luy donnoient les nouveaux murmures de quelques esclaves, qui tous d'une voix sembloient predire que pour cette année, l'ordre des sacrifices devoit estre changé; & que la Deesse en qualité de Vierge demandoit une Vierge pour victime. Quoy qu'il en soit, elle n'a jamais sçeu trouver le moyen de te deliurer. Elle appelle, luy dis je, me deliurer, que d'exposer encore ma vie à mille desplaisirs. Non, non, ie suis las de voir le Soleil, puis que la Lune se lasse de me voir. Mais elles n'entendirent point ce que ie voulois dire. Cependant elles employerent trois ou quatre heures à me bigarrer de toutes couleurs; à m'attacher à la teste, au bras, & de tous costez

mille rubans , & mille fleurs diuerfes. Apres cela Sthenobée eſtant quelque peu reuenüe à ſoy meſme, à force de conjurations, & de remonſtrances qu'elles luy firent, ſ'en vint ſeulement repaſſer de l'œil, & de la main toutes choſes ; & puis prenant vne petite phiole d'huyle precieufe, elle me la verſa ſur la teſte, & pour la fin elle me couronna d'vne belle guirlande, qu'elle meſme m'auoit preparée.



Le Soleil auoit def-ja fait la moitié de sa course, & le peuple m'attendoit il y auoit long temps au Temple de Iupiter, où se faisoit l'assemblée, pour aller sur les hauts lieux, qui estoient assez loin dans la forest, & où l'on celebroit le sacrifice annuel: Quand voicy venir Timétes, plus venerable que de coustume, avec la tyare, où brilloit vne quantité de diamans, & d'autres pierres precieuses; & avec le manteau à la Phrygienne, qui luy descendoit depuis la teste iusqu'en bas. Ses principaux Ministres avec leurs chapeaux de fleurs, & tous leurs ornemens sacrez, vindrent aussi avec luy me querir; & me conduisirent au temple, où les voix & les instrumens firent ouïr leur plus douce

harmonie, iufques à tant que i'euf-
fe efté confacré deuant les Autels,
où fe faisoient les ordinaires facri-
fices; & deuant les images de leurs
Dieux, Iupiter, le Soleil, & la
Lune. Là toute l'afsemblée auoit
les yeux tournez fur moy: D'un
cofté eftoient tous les hommes,
depuis les plus grands, iufques aux
moindres, & de l'autre les femmes,
où les meres, les nouuelles ma-
riées, & les filles faisoient monftre
de tous leurs plus beaux orne-
mens. Il fallut incontinent partir
de là, pour s'en aller au grand
Autel; où le refte du iour à peine
nous peût conduire. Mais Endy-
mion, dit Pyzandre, tu t'en ac-
quites bien legerement: s'en vont-
ils comme cela fans ordre, & fans
aucune magnificence à leurs fa-

crifices? & n'y a t'il rien en tout leur appareil & leur pompe, qui vaille la peine d'estre representé? Tu vois bien Pyzandre, respondit Endymion, que ie n'en pouuois pas estre si fidelle spectateur, puis que j'estois moy mesme vne grande partie du spectacle. Toutesfois ie ne laisseray pas de te dire brieffuement ce que j'en peus voir.

Ceux qui portoient l'eau lustrale, les bannieres, & les images des Dieux, selon la coustume alloient deuant; Et apres eux on menoit toutes les victimes, entre lesquelles on voyoit vn grand nombre de Taureaux noirs, & blancs, qui tesmoignoient assez la fertilité du pais, estans comme ils estoient grands en toutes choses, ayans les cornes esleuées, & la teste large,

l'eschine d'une longueur sans proportion & sans mesure; tous tels que les Egyptiens les adorent, & tous dignes de ravir Europe, & d'estre mis au rang des signes celestes. Encores ne te scaurois-je dire, s'il y en auoit ou plus ou moins d'une Hecatombe. Mais bien voyois-je en suite, cent ou six vingts filles; dont les vnes porteroient à pleins paniers les fleurs & les fruiets; & les autres la Myrrhe, & l'Encens, & toutes choses aromatiques; tellement que tous les lieux d'alentour en estoient parfumez. C'estoit vn plaisir de les voir avec leurs paniers sur la teste, leurs cheueux espars, qu'un petit vent faisoit flotter sur leurs espaulles, leurs mains sur leurs costez, leur taille longue & droite, avec leurs

jupes & leurs corps de diuerſes couleurs ; En fin elles eſtoient telles que volontiers Ceres , & Pomone les choiſiſſent , quand elles veulent enuoyer quelque preſent de leurs plus beaux fruits aux Dieux , & aux Deeſſes. Apres cela ſuiuoit tout l'honneur de la troupe , Sthenobée haut eſſeuée dans vn beau char peint d'azur , eſmaillé de diuerſes couleurs , & tiré par deux Cerfs , dont les teſtes eſtoient argentées. A ſes coſtez marchotent douze vierges , choiſies entre les plus belles , qui eſtoient les mieux coiffées , & les plus parées qu'on ſçauroit voir , & qui portoient l'arc , & le carquois , comme les Nymphes de Diane. Les joüeurs de flute , de muſette , de harpe , & de violon , ne ceſ-

soient jamais entr'elle, & moy qui
suiuois monté sur le char de la Lu-
ne, ainsi appellent-ils celuy dont
ils honorent pour la fin de tous
leurs honneurs, ceux qu'ils vont
sacrifier ; duquel mesme ils ont
souuēt vn commun dire à la bou-
che contre ceux qui sont sans
esprit, & sans industrie, principa-
lement contre leurs esclaves:
Vrayement, disent-ils, tu n'as que
faire de craindre, on ne te verra
jamais assis au char de la Lune. En
effect il represente l'vn & l'autre
char de la Deesse, estant moi-
tié d'yuoire, & moitié d'ebe-
ne ; & attelé tout de mesme de
deux cheuaux, l'vn blanc, & l'au-
tre noir. C'est là où j'estois esle-
ué plus que nul autre de la troupe,
& où j'auois plustost la mine d'un
vainqueur

vainqueur qui triomphe, que d'une victime que l'on meine à l'Autel. Toute la fleur des jeunes gens superbement, & somptueusement vestus, marchoit à mes costez; & derriere suiuoient d'autres jeunes hommes portans des Couronnes de Pin, choisis entre les esclaves; & desquels on a accoustumé de prendre les mieux inspirez pour les sacrifier; & les autres pour auoir le soin des choses sacrées. Il sembloit qu'ils fussent transportez de quelque fureur, car tousiours saurons & dansans, ils murmuroient ie ne sçay quels Oracles; & tantost ils chantoient les loüanges de la Deesse sous des noms tous differents, selon les lieux qu'elle habite, ou les offices qu'elle exerce; & selon les pais dont ils estoient eux mes-

mes. Si bien que ie l'entendois nommer à tous propos , Diane Ortygienne , Diane Laphyréc, Diane Ephesienne , Pergeane, Scythienne, Ecbatane, Alpheonienne , Mynthiade, Ilithie, Lucine, Latonienne, Cynthie, Artemis, Dictine ; & de mille autres noms, dont elle est renduë celebre par tout le monde. Entre les derniers paroissoit le bon-homme Timétes, monté sur vn petit cheual pie, qu'il sembloit que la Lune luy eust enuoyé; & que la nuit & le iour auoient partagé si également de leurs couleurs, qu'en le voyant d'vn costé seulement, on l'eust pris pour estre tout noir, & de l'autre pour estre tout blanc. Apres cela venoit la pompe des principaux, & des plus honorables d'entre les

hommes, qui estoient fuiuis de la presse du populaire, & puis confusément de routes les femmes. Or comme on alloit fort lentement, il estoit des-jà tard, & le Soleil estoit entré bien auant dans l'Océan, quand nous entraſmes dans la forest: si bien que le iour nous auoit des-jà quittez, quand nous arriuaſmes sur les hauts lieux. De là, l'on voyoit d'vn costé la ville d'Albe, comme de ce mont Lathmos on void celle d'Heraclee: & la forest paroissoit au dessous comme vne plaine ondoyante. Là, au milieu d'vn fort grand espace, il y a vn autel large, & spacieux, venerable tesmoin de la Religion des Anciens, horrible & effroyable à cause de la forest mesme; & qui n'est guere plus ef-

leué qu'à fleur de terre, le lieu estant si haut, que rien n'empesche qu'il ne soit esclairé du premier rayon de la Lune. La viennent rendre à la Deesse leurs vœux plus solemnels, non seulement les habitans d'Albanie, mais aussi plusieurs d'entre les peuples circonuoisins, comme ceux d'Arménie, & de Colchos, les Iberiens, & les Nomades, depuis les palus Meotides iusques à la mer Caspienne.



Des-ja les Esclaues se tenoient rangez d'un & d'autre costé; & me faisoient voye entre eux pour aller à l'Autel : & des-ja l'on voyoit mille torches allumées; & le peuple se hastoit de prendre place de toutes parts. Sthenobée seule plus tardiue & plus lente, estoit encore aupres de son char, d'où elle ne faisoit que de descendre. Je ne scauois point ce qui la retardoit tant: Car les filles qui luy seruoient ce jour la de Nymphes, comme si elle eust esté quelque'autre Diane, se renoient tellement sujettes à l'entour d'elle, qu'elles m'empeschoiēt mesme de la voir. Il sembloit qu'elles fussent fort attentiues à cōsiderer quelque nouvelle auanture, ou qu'on leur racontast quelque chose qu'elles n'auoient point

accoustumé d'ouïr. Cependant Timétes , & ses principaux Ministres , me vindrent prendre ; & comme ils me menoient à l'Autel, Ismene me vint en la pensée : si bien que ie disois en moy mesme, Ismene , Ismene , que ton secours est tardif , & qu'il faudroit que ton art fust puissant , en quelque part que tu sois , pour me deliurer de la main de ces gens icy. Quelle gloire , & quel aduantage auras-tu d'auoir entrepris ce que tu ne pouuois effectuer ; ou d'auoir promis ce que tu ne voulois point tenir ? Si ie t'accuse à tort , les Dieux le sçauent , & ta conscience t'en doit rendre tesmoignage. Ce n'est pas que ie desire plus ton assistance , ny que i'en sois fort en peine : Car afin que tu sçaches qu'il m'impor-

te beaucoup moins qu'à toy mesme, il me fascheroit aujourd'huy de te trouuer veritable, & ma destinée respond tellemēt à mes vœux, que la mort que ie vay souffrir, m'estonne beaucoup moins que ton infidelité. A la fin me voyla deuant l'Autel, où ie me tenois tout droit avec vn maintien grave, & plein d'asseurance, monstrant vn visage à la mort, que les plus contents mesmes ne monstrent pas à la vie: La douleur se presentoit deuant moy en toutes ses formes diuerfes. Je ne voyois que pleurs de toutes parts, & n'entendois que souspirs, & sanglots. Tout me plaignoit fors que moy mesme; & pas vn d'eux n'estoit si ayse de viure, que je l'estois de mourir. Lors tout à coup ils esleuerent leurs

voix, & chanterent comme pour commencer mes obseques, ie ne sçay quels hymnes tristes & funestes, d'une façon piteuse & lamentable. Et moy cependant j'adressois tous mes vœux au Ciel, où ie leuois continuellement mes yeux, de long-temps accoustumez à contempler la Lune, qui montoit sur l'horison, plus belle, & plus claire que l'on ne l'auoit jamais veüe, & à qui leur chant me donna la liberté de dire ces paroles au lieu de priere. Hasteto-y donc Deesse variable, pour assister au plus agreable deuoir que ie te sçauois jamais rendre, & regarde au moins de bon œil ma mort, puisque tu fais si peu de conte de ma vie. Apres cela le desir de reuoir Sthenobée pour la derniere fois, me fit

baïſſer la veüe. Je la vis dont fort
pres de moy, vn peu en arriere de
Timétes. Je la vis hélas ! mais plus
belle, & plus tranquille que de
couſtume: ſoit que deuant l'aſſem-
blée elle compoſaſt ſon geſte, avec
plus de puiſſance ſur ſes paſſions,
qn'elle n'auoit pas fait aupara-
uant : ſoit que la mauuaïſe fortu-
ne, qui nous donne de la deſſiance
de toutes choſes, fiſt naiſtre en
moy ſur l'heure cette erreur, & cer-
te opinion pour m'affliger d'auan-
tage. Tant y a que ce n'eſtoit plus
celle qui jectoit nagueres tant de
larmes: Au contraire me regar-
dant d'vn œil ſec, avec vne façon
route aſſeurée; c'eſtoit elle qui
comme vn autre Atropos tenoit
en la main le couſteau, non plus
pour en couper vne branche de

Myrthe , mais le fil de ma vie : & dont le taillant estoit si subtil , & si bien affilé , qu'il en estoit presque imperceptible. Il sembloit mesme à la voir , qu'elle eust grande haste de le presenter à son Oncle ; & ie ne sçay qui l'auoit si bien consolée ; mais tant s'en faut qu'il restast en son visage aucune trace de sa douleur , qu'on y voyoit tous les tesmoignages sinon de quelque joye , à tout le moins d'une grande moderation. Dieux dis-je quel changement est ce-cy ? celle qui n'agueres estoit inconsolable , & qui me vouloit tant sauuer la vie , est deuenue tout à coup grandement resoluë ; & maintenant il semble qu'il luy tarde qu'on ne me l'ayt ostée. Ha sexe fragile ! tu as espandu toute ta douleur en tes

larmes: tes regrets, estoient trop violents, pour auoir beaucoup de durée: c'estoient eux qui seuls me pouuoient faire mourir à regret. Mais puis qu'ils sont si tost passez, mourons desormais libres de tout soucy, & du consentement de Sthenobée, à qui des-jà nostre destinée semble mesme trop lente. Au mesme instant ils acheuerent leurs hymnes, & moy qui n'attendois plus à tout moment que le coup de la mort, ie leuay de rechef les yeux vers la Lune, & Timétes rendit la main à Sthenobée pour en reccuoir le cousteau. Mais à peine l'eut il tant soit peu considéré, qu'il se tourna brusquement vers elle. A quoy penses tu, dit-il, Sthenobée, & qu'est ce que tu me donnes. Auons nous accoustumé

de nous servir d'un tel cousteau en nos sacrifices ? Il est si foible & si leger, qu'il me semble que ie n'ay rien en la main. D'où est-ce que nous est venuë cette nouveauté ? Demande-le, respondit Sthenobée, à cette femme que voicy pres de nous, elle t'en dira des choses merueilleuses. Lors me tournant un peu pour regarder ce que c'estoit ; ie fus tout estonné que ie vis Ismene, qui commença de parler ainsi.

O Sacrificateur, & vous peuples d'Albanie ; vous apprendrez que la Deesse estant l'autre jour à la chasse en la contrée des Cimmeriens, il luy prit quelque enuie, de s'aller reposer chez un des Dieux du pays, lequel luy fit goustier en un festin, les douceurs dõt il char-

me les soucis des hommes, & des Dieux. Et puis luy ayant fait voir dans ses grottes, & ses cauernes, comme dans vn autre monde, le recueil de toutes choses, quelques rares qu'elles puissent estre; il luy fit present d'vn des cousteaux, d'ont il prend ses plaisirs, & tranche ce que bon luy semble en ces exercices nocturnes. Deesse, luy dit il, qu'est-ce que ie te sçaurois donner à propos à toy qui aymes si fort la chasse, sinon le meilleur cousteau que nostre Vulcan ayt jamais faict de sa main propre; affin que tu en coupes toutes sortes d'empeschemens, & qu'il te face voye parmy les forests, les plus espaiſſes? Le don pleut extrêmement à la Deesse, le voyant si proprement fait, si leger, & si bien à la main. Mais ie ne sçay

comment aussi tost qu'elle l'eut pris, elle voulut porter sur le tail-
lant le poulce de la main gauche,
ce qu'elle ne peut faire si legere-
ment, tant il estoit subtil, & bien
affilé, qu'elle n'en fust blessée, &
qu'il n'en sortist quelque goutte
de sang. Helas Deesse! dit alors le
Dieu; ie ne te l'ay pas donné pour
cet usage. Je n'en doute point, res-
pondit elle; Mais puis qu'il est si
friant de sang, ie veux qu'il soit
employé pour l'amour de toy, au
plus agreable sacrifice qu'on me
sçauroit jamais faire. Elle m'a donc
commandé, adjousta Ismene, de
l'apporter en ces lieux, & de le don-
ner, comme j'ay faict, à la Vierge,
qui sert à l'Autel. Ne doutez donc
point d'obeyr au mandement de
la Deesse: Lors vous esprouuerez
que

que l'obeyſſance adjouſtée au ſacrifice , a pouuoir de tirer les Dieux du Ciel. Car vous la verrez incontinent deſcendre , (ſi vous n'eſtes aveuglez) pour venir gratifier d'un doux accueil, l'offrande que vous luy faiſtes de ce jeune homme.

Elle n'eut pas ſi toſt acheué, qu'on entendit un murmure de voix différentes par toute l'aſſemblée ; dont la pluſpart receurent une courte joye ; eſtimant que ce meſſage tendoit à ma deliurance. Mais voyant qu'il m'eſtoit ordonné de mourir ; ils recommencerent les meſmes traits de pitié qu'auparavant. Je te laiſſe à penſer ſi ie fus eſtonné de voir que celle la ſeule de qui ie deuois attendre la deliurance, & la vie , apportoit le cou-

steau pour me faire mourir. Lors Timétes dit à haute voix ; peuples Albaniens, esleuez vos yeux, & vos cœurs au Ciel, & rendez graces à la Deesse qui prend aujourd'huy tant de soin de vous, & de vos sacrifices. Et puis se tournant vers moy ; Endymion, dit il, soit que tu ayes esté choisi pour l'offense que tu as commise ; ou pour la generosité qui est en toy ; tu vois bien comment la Deesse confirme l'election que nous en auons faicte. Maintenant c'est à toy de te porter si courageusement, que nous n'ayons point de sujet de nous repentir de t'auoir offert, ny la Deesse de l'auoir desiré. Moy que l'apprehension de la mort touchoit beaucoup moins que le desplaisir, & le soupçon que j'auois eu du

changement de Sthenobée; comme en ces extremités la moindre apparence d'infidélité que nous voyons en ceux qui ont fait profession de nous aymer, nous est beaucoup plus sensible, que tout ce qui d'ailleurs nous est contraire: Je ne me peus empêcher de luy dire ces paroles. N'as tu pas ouy, dis-je, Timétes, que la Deesse a commandé expressément que le couteau fut donné à la Vierge qui sert à l'Autel? pourquoy donc le prens tu de sa main, & l'empêches tu de me donner la mort, puis que mesme elle en a plus de volonté que toy, & qu'elle se montre si resoluë? sans doute elle s'en acquitera bien mieux, & le sacrifice en sera beaucoup meilleur. Cela ne va pas comme tu penses, dit Ti-

métes. Ce n'est ny l'intention de la Deesse, ny nostre coustume. Il faut, Endymion, que ce soit celuy de toute l'assemblée qui t'ayme le plus, ou qui te doit le plus aimer, qui te donne le coup. Ha, dis-je lors, ce ne sera donc pas Sthenobée. Mais elle me regardant d'un œil d'estonnement, & d'innocence, se trouua fort surprise d'ouïr ces paroles; & de receuoir injustement cette offense de celuy qu'elle auoit tousiours si fort obligé: & de la receuoir encore de telle sorte que le temps de s'en justifier luy estoit pour jamais osté, puis que ie m'en allois mourir en cette croyance. Ce qui luy toucha tellement au cœur, que ie vis de plus en plus paroistre en elle l'extrême desplaisir qu'elle en auoit; tant qu'elle se re-

tira tout a fait derriere Timétes : soit qu'elle ne me voulust plus voir ; soit qu'elle voulust cacher le changement qui paroissoit en son visage.

Ce pendant Timétes voyant qu'il ne restoit plus que ma mort, à l'accomplissement du sacrifice ; haussant la main de laquelle il tenoit le cousteau , me dit : A cette heure il est temps, Endymion, que tu donnes vne notable preuve de cette nature excellente qui a fait que tu as esté choisi pour les Dieux. A peine auoit-il acheué ces paroles, qu'il se fit vne soudaine esmeute du peuple qui estoit derriere luy, & particulièrement des filles, qui se tenoient pres de Sthenobée ; dont quelques vnes s'auancerent pour la receuoir en-

tre leurs bras, où elle tomba comme morte, ou pasmée. Le regret en partie, & en partie le despit, & la colere, la faisièrent, & la suffoquerent de telle sorte, qu'à la fin le moyen de respirer ne luy fut pas moins interdit, que celuy de parler. Quel sacrifice est cecy ? disoit le pauvre Timétes tout esperdu. Les Dieux nous en demandent ils aujourd'huy deux pour vn ? Endymion pour la Lune, & Sthenobée peut estre pour le Soleil ? Moy chetif, & miserable ! que ne suis-je aussi receuable pour Iupiter, afin que tous nos Dieux ayent chacun leur victime ; Que deuins-je, Pyzandre, quand ie vis cette beauté mourante, tout l'honneur de la troupe gisant à terre. Ah, dis-je, Sthenobée, es-tu donc si sensible

à mes injustes reproches, & moy si peu recognoissant de tes bons offices? Si ie n'ay point eu sujet de croire ton changement; à tout le moins en ay-je eu de le soupçonner. Mais c'est en vain que ie confessevne faute que ie ne veux point qu'on me pardonne. Je demandois tout à cette heure la mort de ta main; & c'est moy qui te l'ay donnée. Comment pourray-je suffire tout seul à l'expiation de tant de crimes? Il me faudroit auoir deux vies, affin d'en espandre l'une pour Diane, & l'autre pour Sthenobée. O Sthenobée! tu m'apprens à mourir, & ie tarde encore de te suivre: & mon esprit pert en ces vaines plaintes l'occasion d'accompagner le tien. Lors ie fus despité contre moy mesme, & contre ma

destinée. Et ne pouuant plus souffrir la vie, j'appellay trois fois Timétes: Mais il ne m'entendoit point: car d'autre costé il appelloit incessamment sa fille, celle qui seulement estoit sa Niepce: & qui, de quelque nom qu'il l'appellast, n'estoit point capable de luy répondre. En fin l'ayant obligé de retourner à moy, à force de le tirer par son vestement. Pourquoi, luy dis-je, pers tu plus de temps apres elle, puisque tu n'y gagnes rien? Et qu'est ce que ton soin peut adjoûter à sa vie, & à son repos? Ne sçais tu pas bien qu'il n'est pas loisible d'interrompre les sacrifices des Dieux pour choses inutiles, & vaines. Veux tu faire viure ceux que Diane veut faire mourir? Que sçais tu si ce n'est point là vñ coup

de sa main ? Ne vois tu pas qu'elle ne demande que morts de toutes parts ? Vse donc maintenant du cousteau qu'elle t'enuoye, & ne me tien point d'auantage en langueur, moy qui meurs d'enuie, & d'impatience de mourir.

Timétes pressé du temps, & de mes paroles, ayant fait signe de la main à toute l'assemblée, pour imposer silence au murmure qui s'estoit esleué sur l'accident de Sthe-nobée ; & pour obliger vn chacun d'apporter l'attention, & le respect qu'il deuoit au sacrifice, me presenta le cousteau par le manche d'ebene. Et comme ie le regardois avec estonnement, ne sçachant ce qu'il vouloit dire, & m'imaginant que son esprit fust outre mesure troublé de cette auanture. Quoy,

dit-il, Endymion, n'as tu point encore appris nos loix, & nos coustumes? Ne sçais tu pas bien que les sacrifices sont heureux lors principalement que les victimes ne meurent point à regret? Or nous à qui les Oracles ont ordonné d'offrir des hommes à la Deesse; nous n'esprouuons point autrement leur resolution, & leur constance, pour estre asseurez qu'ils se portēt volontairement à la mort, qu'en les obligeant de se la donner eux mesmes.

Cela va bien, luy dis-je, Timétes, en prenant le cousteau. Je sentiray bien mieux moy mesme ou ma vie sera cachée; & ne manqueray point de me trouuer le cœur du premier coup. Et puis adressant mes dernieres paroles à la Lune: Deesse luy dis-je, j'ay failly, je

l'aduouë; mais la cause de toutes mes erreurs cest d'auoir creu que les Dieux fussent tousiours veritables, & non sujets au changement. Ce cœur trop fidelle gardien de l'affection, & de la foy qui m'ont conduit où ie suis, en expiera tout à cette heure la faute. Contente toy, Deesse, de voir qu'ayant perdu toutes choses pour l'amour de toy, ie perds encore icy la vie, & suis tien jusques à l'Autel, & au de-là s'il est possible. En acheuant ces mots, ie me plongeay le cousteau bien auant dans le sein; & me donnay le coup qui trancha si soudain le fil de ma vie, qu'il ne me laissa de sentiment que pour ouyr vn piteux hélas, de mille, & mille voix confuses, au mesme instant que ie tombay dessus l'Autel.



Qu'est ce que tu me racontes, Endymion, dit Pyzandre, en luy prenant la main : si ie ne t'auois point embrassé dès le commencement ; & si ie ne te touchois point encores ; ie croyrois que ce seroit vne ombre qui parleroit à moy, & non pas vn homme. Je ne sçay pas moy mesme ce que ie suis, respondit Endymion ; & tu me feras plaisir à la fin de m'en esclaircir ; si tu vois plus clair que moy dans mes propres auantures. En quoy il y a encores quelque chose de plus funeste, & de plus tragique ; Il y a encores vne autre victime, & vn autre sacrificateur. Et ie croy que les Dieux voyans le peu de conte que j'ay fait de la mort ; & de tout ce qu'elle a de plus redoutable, me veulent aujourd'huy contraindre

deviure, afin de m'estre plus cruels, & de me voir perpetuellement tourmenté du regret, & du desplaisir que j'ay d'auoir esté la cause d'un autre sacrifice plus estrange, & plus lamentable. Quelle sorte de sacrifice est cecy ? dit Pyzandre ; & qu'est ce que tu me sçauois dire de plus estrange ? Endymion il y a mille & mille voyes ouuertes pour partir de cette vie : mais à peine y en a t'il vne seule pour le retour. Comment donc, respondit Endymion, l'ay-je trouuée en ne la cherchant pas ? Et comment suis-je reuenu à moy, moy qui en auois si peu d'enuie. O douce mort ! mais trop briefue ! Qui m'a donc empesché que ie n'aye esté voyr le Royaume des ombres ? Son triste, & morne Seigneur, & ses Iuges

inexorables; Et que de là ie ne sois en fin parvenu aux champs d'Elise, où coulent eternellement les fleuves de laiçt, & de miel, parmy les prez tous esmaillez de fleurs, que nul hyuer n'offense, & qui jamais ne flestrissent? De combien s'en a il fallu que ie ne participasse aux delicieux festins, aux doux concerts, & aux danses des enfans, & des mignons des Dieux? Ie fus jusqu'aux bords de l'Acheron, avec vn extrême desir de passer outre; mais ce vieux & rude Nautonnier ne me voulut jamais recevoir dans son batteau: soit que ie ne portasse point l'obole dans la bouche comme les autres, pour payer le passage: soit que mon corps ne fust point encores sous la sepulture. I'eus la patience de le voir aller,

& reuenir, & de me presenter plusieurs fois à luy, pour voir si d'auanture vn temps ne me rendroit point plus receuable que l'autre; mais toute mon esperance fut vaine, & ie ny sceus jamais rien gagner. Lors retournant sur mes pas, & considerant la multitude des ames, qui arriuoient de tous costez, en pareil nombre qu'on voit tomber les feuilles dans les bois, quand le premier froid les a touchées: l'ombre triste & malheureuse de la pauvre Sthenobée, se vint presenter à moy, avec tous les mesmes traicts que i'auois accoustumé de voir en elle, hors-mis qu'elle estoit beaucoup plus grande. Ce qui surprit tellement mes yeux, & ma pensée que ie ne scauois ce que j'en deuois croire, jusqu'à

jusqu'à tant qu'elle me dit ces paroles.

Quelle estrange aduanture, Endymion, te fait errer parmy ceste nebres, où ton destin ne t'appelles pas encore? Car (anfi que tu ne fois point en peine de me faire la mesme demande) ce n'est pas l'ordonnance du Ciel, ny que tu meures si tost, ny que ie viue d'auantage. Peut estre que les Dieux à la fin lassés de m'estre si contraires, t'enuoyent icy, pour me permettre de me justifier du blasme dont tu as iniustement accusé mon innocence : seul desplaisir qui me pouuoit traualler apres la mort mesme. C'est à tort que tu m'as creu si resoluë à te voir mourir, & si tost consolée de ta perte. Toute la resolution que j'auois prise, Ismene me

l'auoit donnée avec l'esperance que le cousteau ne te feroit point de mal, & que ta vie estoit plus assurée que la mienne. Mais tu m'as imputé à crime la joye que i'auois de ta deliurance, & tes plaintes par trop injurieuses à mon affection, m'ont esté si sensibles qu'à la fin mesme elles m'ont fait perdre le sentiment, & m'ont fait tomber deuant toy, vraye victime de l'Amour premierement, & bien tost apres de Diane. Tout le soin qu'ont eu les filles qui m'enuironnoient, de me tirer de la presse, & de me mettre sur l'herbe, n'a seruy de rié qu'à me porter d'une mort à l'autre; & sous ombre de me faire respirer plus à mon ayse, & de chercher quelque remede à mon mal, elles m'ont fait trouuer celuy de

tous mes maux ensemble. Car Diane qui depuis quelque temps n'a cessé de me pourfuiure ; faisoit tenir vn serpent aux embusches, qui de sa morsure & de son venin mortel m'a toute infectée, deuant que j'aye eu le loisir, ny de reuenir à moy, ny de m'en plaindre. Estrange sorte de sacrifice, où Timétes n'a porté qu'un vain tiltre de sacrificateur, mais vn serpent en a fait l'office. Endymion a esté présenté; mais Sthenobée a esté prise. I'eusse esté plus heureuse, Endymion, si tu n'eusses point esté si curieux, & si tu n'eusses jamais veu l'Albanie. Quelqu'un des Dieux ne se fust point seruy de ma ressemblance pour te faire violer la forest sacrée. Vn autre n'eust point allumé dans mon cœur vne passion si contrai-

re à mes vœux. Ce sont deux choses incōpatibles, que d'estre amoureuse, & d'estre voüée à Diane .Je ne me fusse point presētée à sō Autel, possedée d'un autre soin, que de celuy que ie deuois à son seruice; & ce n'eust point esté à regret, que j'eusse veu tōber les autres victimes qu'ō luy eust offertes. Ainsi m'ayant trouuée beaucoup plus coupable que toy; pour te sauuer, elle m'a fait mourir. Mon ame a payé pour la tienne: Et maintenāt la mesme image qui ta rendu criminel, te viēt absoudre. Adieu dōc, Endymion, n'oublie jamais le tesmoignage que ie te dōne au deçà mesme du tombeau; que j'ay plus eu d'affection pour toy, que pour les Dieux mesmes. Voyla le Nau-tonnier qui me presse, & m'appel-

le, ne m'empesche point d'aller trouuer mō repos apres ma mort, comme tu as faiet durant ma vie.

Au mesme temps qu'elle acheuoit ces paroles, ie tendist trois fois la main pour tascher de prendre la sienne, & de la retenir; mais trois fois ie ne pris rien que du vent. Elle s'enfuit de deuāt mes yeux, & s'esuanoüit comme vn songe; sans qu'il me fust possible de la voir d'auantage, ny de la recognoistre. Je taschay de la suiure jusques dans le batteau; mais j'en fus encore plus rudement repoussé qu'auparuant. Lors ie voulus ouurir la bouche, pour crier ou Caron, ou Sthenobée; & pour faire mes supplications, & mes plaintes, mais ie me trouuay sans voix, & sans parole. Ourré de douleur, & de des-

espoir ie voulus pleurer, mais mes yeux se trouuerent aussi sans larmes. Helas ! disoit mon pauvre esprit ; où dois-je donc aller ? Puisqu'en l'estat où ie suis, ie ne puis estre receu ny parmy les viuans, ny parmy les morts ? Ainsi ie fus contrainct d'errer par-cy, par là, sur le riuage, où au lieu des troupes bien heureuses, que ie pensois aller voir, ie ne vis rien que le Deuil, la Crainte, les Soucys, les Trauaux, & tels autres miserables habitans de ces limites. Puis ie me tins sous l'ombre noire d'un grand arbre, qui estendoit ses branches au long, & au large, dont les fructs sont les songes vains, & les feuilles à mon aduis, sont les vaines esperances.

En fin apres auoir esté quelque temps tel qu'un homme qui son-

ge, qui dort, qui est mort, ou qui n'est point du tout; comme ie ne sçay quelle voye ie tins pour me trouuer en ces lieux; aussi ne sçay-je point ce que fit mon esprit pour se rendre à mon corps, ny par où ie peus reuenir à moy mesme. Tāt y a que ie commencay de me sentir, & de me mouuoir, puis de soupirer, & d'ouurir les yeux. Toutes-fois sur l'heure ie fus en doute, si c'estoit ceux du corps, ou ceux de l'esprit: pour ce que, comme si j'eusse esté rauy dans les Cieux; ie me vis insensiblement approché de la Lune. Mais apres l'auoir regardée plus attentiuellement, ie jugeay que c'estoit elle qui s'approchoit de moy. Je la voyois donc descendre tout doucement sous la faueur du silence, & des tenebres.

On eust dit qu'elle se vouloit desrober du Ciel, ou qu'elle auoit peur d'apporter en terre le iour au milieu de la nuict. Car auant que de partir, elle auoit mis vn voyle sur son visage; mais soit qu'il fust trop subtil, & delié, ou que ses yeux fussent trop clairs, cela ne m'empeschoit point de la voir, ny de la recognoistre. Et des-jà l'honneur que ie m'en promettois me faisoit oublier tous mes malheurs passez; & songer à ce que ie luy deuois dire: Lors qu'ayant touché du pied la terre, elle me preuint & me voulut cōtenter de ce langage.

Ton bon heur, Endymion, surpasse tes vœux, & tes esperances. Cesse en fin d'accuser les Dieux, qui donnent beaucoup mieux que les hommes ne demandent. Tes

labeurs sont aujourd'huy couronnez de gloire , & te mettent au nombre des immortels : Ce que tu dois à ton affection, ou si tu l'aymes mieux , à la mienne. Le nom de la plus grand'part des Astres, est à peine cognu dans le monde; mais tant qu'on parlera de la Lune, & qu'elle luira dans les Cieux ; le tien fera dans la bouche, & dans la mémoire des hommes.

Elle continuoit de payer ainfi mes peines de vent, & de fumée, quand tout à coup vn bruit esclatant de trompettes, & de clairons, vn tintamare confus de cymbales, & de toutes sortes d'instruments d'airin , & de cuiure , sortit des monts, & des valées; & frappa l'air avec tant de violence , qu'il me la vint raurir, & la fit retirer, &

disparoïstre en vn moment. Lors j'ouuris les yeux à bon escient, & tel qu'une personne qui se refueille en sursaut; Je portay d'un mesme temps la teste, & les mains en avant comme si j'eusse voulu tascher de la suiure, ou de la rappeler, mais l'ayant du tout perduë, & ne la voyant plus, ie regarday si ie reuerrois l'assemblée qui nagueres estoit autour de moy; mais ie ne la vis plus aussi, ny l'Autel ny le Sacrificateur : ie ne me voyois pas moy-mesme, tant j'estois environné d'obscurité : & me servant plus de mes mains que de mes yeux, pour tascher de recognoistre à tastons, le lieu où ie pouuois estre; vne fois ie creus estre en fermé dās vu sepulchre : En fin ie m'apperçeus d'une petite clarté qui paroïst-

soit peu à peu, & me portant du costé que ie la voyois naistre; ie fus tout estonné que ie me vis sur le mont Lathmos; & la Lune dans le Ciel, à qui ie faisois ma plainte alors que tu m'es venu trouver.

Certes Endymion, dit Pyzandre, si ie ne me trompe, ie commence à descouvrir tout le mystere de tes auantures: Et à mon aduis, ie puis dire que tu as fait beaucoup de chemin, sans partir d'un lieu; qu'en reposant tu as beaucoup trauaillé; & que tu as veu des villes, des peuples, & en somme un fort grand pays, dans une fort petite grotte. Sans doute d'un mesme bruit nous auons rappellé la Lune de son esuanoüissement, & toy du long sommeil qu'Ismene t'a fait dormir, par une ruse de son

arr, ou par quelque inspiration de Diane mesme. Car depuis qu'elle te donna cette eau pour t'obliger comme elle te dit, de reposer ce pendant qu'elle trauailleroit pour toy; ie n'ay point remarqué qu'elle t'ayt refucillé. Seulement t'ay-je ouy dire que tu sentis qu'elle te tira par la main, pour te faire marcher au trauers de l'obscurité où tu fis rencontre de tous ces monstres estranges que tu m'as representez; qui ne sont autre chose que les songes, images toutesfois de la verité que nous voyons aujourd'huy. Quand au reste, les flesches du fils de Venus, qui partant de la main de Diane, te firent tomber dans la forest, au pied d'un arbre; ny le cousteau de Morphéc apporté, comme tu as dit, du pays des Cim-

meriens, séjour ordinaire du Sommeil, de leur nature, ne font mourir personne, qu'en la façon que tu en es mort, si d'avanture quelque autre cause n'y est adjoustée. Mais veux-tu de plus claires preuues de ce que ie te dis, que les paroles que la Vierge Parthenopée te prononça dès le commencement en forme d'Oracle?

*Vn Charme pesant, & leger,
T'arreste, & te fait voyager,
Te fait mourir, & te fait viure.*

Quel est ce charme, sinon celuy du sommeil? par le moyen duquel Ismene, pour satisfaire aucunement à ta curiosité, t'a fait auoir les visions de ta fortune bonne, ou mauuaise; de l'estat auquel tu es avec Diane; & en fin des mesmes choses que tu pourrois peut estre voir


ayant les yeux ouuerts ; si tu les voulois bien confiderer. Je m'en doutois bien Pyzandre, dit Endymion ; que mes auantures te sembleroient si estranges, que tu les prendrois plustost pour des songes, que pour des veritez.


Des-ja les oyseaux auoient fait ouyr leurs diuers ramages, & s'estoient resioüis de la venue du iour ; & des-ja l'on entendoit le bruit des chariots, & des hommes, qui retournoient à leur labeur ordinaire ; Quand Endymion à la sollicitation de Pyzandre, descendit du mont Lathmos ; & s'alla rendre à ses dieux domestiques, dans la ville d'Heraclee, & à mille vœux que ses amis faisoient incessamment pour le reuoir. Depuis ce temps là tousiours il continua de


raconter à tout le monde les loüanges de Diane, bien qu'elle fust la seule cause de ses malheurs, & de ses peines; & qu'il eust perdu la meilleure part de son temps, & de sa vie, soit aux longues veilles qu'il auoit employées à la contemplation de ses beautez, & de sa gloire; soit au long sommeil qu'elle l'auoit faict dormir.

FIN.

Il est de la nature de la chose à laquelle on se propose de donner un nom, d'être susceptible d'être désignée par un nom. C'est pourquoi, si l'on veut donner un nom à une chose, il faut qu'elle soit susceptible d'être désignée par un nom. C'est la raison pour laquelle on ne peut pas donner un nom à une chose qui n'est pas susceptible d'être désignée par un nom. C'est la raison pour laquelle on ne peut pas donner un nom à une chose qui n'est pas susceptible d'être désignée par un nom.













SPECIAL

87-B

1607

THE GETTY CENTER
LIBRARY

WILLIAM SALLOCH
Pines Bridge Road
Ossining, N.Y. 10562

